

Basef Amama Bu'wami Luk Nanda'ami

Basef bandami Luk nanda'ami

1:1-4 Basef Luk nanda'am mali'i

1:4-2:52 Jon napisi'as embeli nataga ea' Maria kola Jisas

3:1-20 Jon nandandomba eafa Jisas neafi'i

3:21-4:12 Jisas nofa' baptais ea', Satan nafi'i nagwambana ma neanda' waf aonai

4:13-9:50 Jisas nafe' etap hiagoma Galili nawalipasa basef bu'wami nanda' enis epes awes nanda'asi sataga bo'wes

9:51-19:27 Jisas nakwaha Galili na'i notanima nefe' Jerusalem nowalipasa basef Godi

19:28-23:56 Jisas nafe' Jerusalem nawalipasa basef bu'wami ea' agufumi manda'mana basef maundana lawag usi'inai tu'wanainai ma sohana neaga'

24:1-53 Jisas nahafel wapoti' nase'asa opeh alupumi ananimi

Basef amama Luk nanda'ami mafe'mago Tiofilus

1 ¹O dembinai Tiofilus, fowa' amam hiami manda' basef hiami mail buk ma amamaga hiami God nanda'am mataga la'afena afa'i. ²Fowa' dambadamba Jisas nafela opeh nanda'am ea' amam dambadamba mali' mati amamaga amama naep amamumi dei' mawalipafa basef amama ea' afa' wanda'am mail buk. ³Ae' dambadamba ali' ahali' enisa basef amama afi'i afi'i dei' egawam andeande' si'i fowa' mataga, anom amam mihi'ambamam dei' ae' egawa basef amama ofagema. Amama atom dei' ae' elagen andeande'ma enda' anom basef mefe'mago ine', dembinai Tiofilus. ⁴Anda'ama ine' neagawa andeande' basef amama ofagema esis sawalipanami endilisimi atom.

Ensel na'ipa Sekaraia ma waulu'mana kola Jon

⁵Nemaf anama anona king Herot dembinai gavamani numafi etap hiagoma Judia, anona aman pris nape, agilinama Sekaraia. Anan wambota Abiya, anan aman dembinai fowa'inai. Sekaraia waulu'mana Elisabet. Akwa'w kwataga wambota Aroni. ⁶Esis bias Sakaraia Elisabet sape bo'wes ma naep Godi saila mi'uli ananinai hianai hi'alana. Ea' saila basef Godi andeande' basef ofagema a'as. ⁷Ea' Elisabet asa'w ea' esis bias awasi a'as, ahages ea'.

⁸Nogota anama amam hiami wambota Sakaraiai nemaf amamunai nataga ma meanda' maol Godi, ea' Sekaraia nawis ipat lu'unai Godi nanda' maol nondolalima God. ⁹Amam maila waf amamunai mandandepana ma niowis ipat anama nomon nofa' amamaga amama nogoh alogw bu'wami ma'ami. ¹⁰Nogota anama anan nawis naofa amamaga, esis amam nematawa hiesi sanda' lotuwi sandatama sape sanda' beten ande'.

¹¹Ea' Sekaraia nati anona ensel dembinai Godi nataga naitu balata wa'ol lagel da'isinai. Balata anama amam pris mondolalima Goda amamaga amama alogw bu'wami ma'ami. ¹²Ea' Sekaraia natolona gegelalasangana ombamahana nomonas matamea ma ensel anama. ¹³Ea' ensel anama na'ipana na'ama na'i, "Sekaraia, ina umba mohena, owa'. God name'enama beten ine'inai ea'. Waulu'mina ine'ikwi Elisabet nambimb kola enin awani aman ine'inai. Ea' ine' nefalana agel ananinai Jon. ¹⁴Okom ine'inai nambimb nope andeande' nendanifela awani inima. Ea' esis amam nematawa hiesi wapoti' sondanifa so'uso'uni inima netaga. ¹⁵Dei' main, enin anona nemaf netaga dambeni nefa' agel lu'unai ma naep Dembinai. Enin ina nea' embel wainim moloma embel la'ifimi, owa'. Enin ata' nape opaf mama'wanai, Ambal Bu'unai Godi napaina si'ina nonda'ana la'ifina. ¹⁶Anona nemaf enin netaga damben nomboma amam nematawa hiesi Israeli ma nefa'as sotanmani seafe'ma God Dembinai asasinai. ¹⁷Enin nili' nefe'ma Dembinai nefa' pepel Godi ma neanda' maol ananinai si'i fowa' Elaija nofa'ana nanda'anai. Ea' nomboma opalef ahapasi mefe'ma awasi ma esis ukup mi'imi'ias. Ea' nomboma epes isima sosambala basef Godi ma sofa' nomonas bu'wami ma niegiambamas nonda'as sondandombam seapoma Dembinai neafi'."

¹⁸Ea' Sekaraia nahali' ensel anama na'i, "Ae' atuwasi iti maina ikwafa eagawa basef amama meataga endilisi? Ae' hagewe ea' waulu'mi wapoti' ea' hage'w." ¹⁹Ea' ensel nagwamana basef na'i, "Ae' Gebriel, aitu naep Godi. Anan atona nasapa'e afi'i a'ipina basef amama bu'wami. ²⁰Ine' name'am etin, ine' owa' nembale'a basef ae'ami. Na'ama etin dei' malogel ine'inai nese'ena, ina nambimb ni'i, owa'etin. Ea' nefe' nefe' neatagama amamaga amama ae' a'ipinami meatagamena. Basef amama ae'ami nambimb meataga na'ama etin anona nemaf God na'ianai."

²¹Ea' esis amam nematawa hiesi sape sohafa Sekaraia ande' ukup matamea sa'i, "Main natagamana nape nogota laona ipat lu'unai Godi nomon?"

²²Anan nawisi ande', ina na'i anom basefa esis, owa'. Na'ama esis sogawana sa'i anan nati anom amamaga mandati na'ami ipat lu'unai Godi nomon.

Ea' anan nape nanda'masa lagel atona na'ipasa amamaga, ea' malogel ananinai nase'ana nape. ²³Maol Sakaraiai hi'alana, notanima nafe' wambel ananinai.

²⁴Anan nape anom nimeguf, waulu'mana anani'wi Elisabet a' opafu'w. Ea' kwandabaho' etin kwape ipat aomb wanemb biamb kwa'i na'ama kwa'i, ²⁵"Dei' Dembinai okom na'ina'i ae' ma nagiangbame na'ama. Fowa' ae' asawe, ambal ae'anai aona ma esis amam nematawa ea' dei' owa'etin."

Anona ensel na'ipa Maria ma kola Jisas

²⁶Elisabet opafu'wa aomb wanemb biamb ea', dei' anona aon wapoti' wanemb wanemb. Dei' God nasapa' ensel anama Gebriel nafe' anona wambel Nasaret nape etap hiagoma Galili. ²⁷⁻²⁸Wambel anama ano'w nemata'w awiawai'wi kwape, agel akwa'unai Maria. Ina dei' kwase' anona aman, ata' owa'. Dei' sandandepa'wa kweaso' anona aman agilinama Josep. Anan nataga wambota anama akunamana king Deviti. Ea' ensel anama nafe'ma akwa'w na'i, "Nemaf bu'wafi, nemata'w. Dembinai God okom na'ina'i ine' endilisi. Anan nofalo'mena nape nalomena la'ela'ef numafina."

²⁹Maria kwame' basef amama okom akwa'unai a' nimanina endilisi. Okom akwa'unai natanea na'i, "Basef amama ofagema mataga mi'imama?"

³⁰Ea' ensel anama na'ipa'w na'i, "Maria, ina ombamohena, owa'. Okom Godi bo'onama ine'. ³¹⁻³²Ine' neme'. Nambimb ine' opafina nela enin awani aman. Ea' nenda'mana agel Jisas. Anona nemaf anan nope aman dembinai, sefela agel ananinai lu'una. Ea' sofala Anan nogalomana God nape ilifi. Anona nemaf dembinai God nenda' awani inima nofa' agel lu'unai nepe dembinai king si'i fowa' gani Devit nape king. Devit anan wambota anama dei' awani inima neataganai. ³³Anona nemaf enin nepe dembinai king numafi epes hiesi Jekopi la'ela'ef. Enin etin nepe dembeni la'ela'ef ma amamaga hiami moloma epes ananisi."

³⁴Ea' Maria kwa'ipa ensel anama kwa'i, "Amama meataga mi'imama? Ae' ina dei' aso' anona aman, ata' owa'etin." ³⁵Ea' ensel anama nagwama'wa basef na'i, "Ambal Bu'unai Godi nifi'mai ine', pepel God nape ilifi nose'alina. Ea' dei' awani inima nambimb nelani enin bo'wen. Ea' esis nambimb sefela agel ananinai lu'una sofalana si'i Anan

Nogalomana Godi. ³⁶Neme', amani'mina ine'ikwi Elisabet akwa'w hage'w ea', dei' ea' opafu'w. Fowa' esis sa'i, 'Akwa'w asa'w, ea' dei' akwa'w opafu'w aomb wanemb wanemb akwa'umi mafe' ea'. ³⁷Owa' anom amamaga ahifima God nonda'am, owa'etin."

³⁸Ea' Maria kwagwamana basef kwa'i, "Ae' ape anda' maol Dembinai. Ae' a'i Anan nonda'meam motaga si'i ine' na'i."

Ensel anama na'ipakw na'ama ma ea', nakwaho'w nafe'.

Maria kwafe' kwati Elisabet

³⁹Nemaf anama Maria kohafel mehip kondondomba amamaga kondowasa' anona wambel nape halafutagw anona etap hiagoma Judia, ⁴⁰kwafe' kwawis ipat Sakaraiai kwanda'makwa nemaf bu'wafi Elisabet. ⁴¹Elisabet kwame' Maria ata' kwanda'makwa gude etin, awani Elisabeti fete' etin nape opaf akwa'unai nomon. Ea' Ambal Bu'unai Godi si'inama akwa'w, ⁴²koga kwa'i mehip kwa'i, "God nofalo'mena nanda'ena nandanifel endilisi. Danifel ine'inai nikila' danifel anowa nematawa ofa'anai. Ea' awani inima nambimb nelan, enin wapoti' God nofalo'mana nonda'ana nondanifel. ⁴³Ae' gegelalasowe ma God okom bo'oma ae' nanda'e endanifel ma nanda' ine' mama'wana Dembinai ae'anai nafi'mai ae'. ⁴⁴Neme', aligah ae'ami ata' mame' nemaf bu'wafi ine'inai atona, batawin nape opaf ae'anai nendanifel fete' etin nape. ⁴⁵Ine' nandanifel endilisi, nembale'efa basef Dembinai na'ipinami nambimb meataga na'ama etin si'i anan nali' na'ipina."

Awaf Maria kwanda'anai

⁴⁶Ea' Maria kwanda' anona awaf kwa'i,

"Ae' a'i basefa Anan Dembinai afela agel ananinai lu'una. Okom ae'anai napoma basef amama,

⁴⁷God nofa'e etanimani. Dei' andanifel ma anan.

⁴⁸Dei' main? Ae' nemata'w anda' maol Ananinai, ae' falafuwei, ea' anan okom napoma ae' nagiambame. Ipe' peme'. Dei' epe anona nemaf owagama wapoti' epes hiesi sigi' seatagai la'ela'ef sehafel seapani sofale si'i, 'Dembinai God nagiambame nase'e danifel.'

⁴⁹Dei' main, God la'ifinai endilisi nanda'me amamaga pepel ma ae' eafela agel ananinai lu'una nape andeande' la'ela'ef.

⁵⁰Okom dahowinai ananinai nape la'ela'ef ma emi egafis umbamahasa sa'i sila Anan. Ea' nape la'ela'ef naloma epes isima sope na'ama etin dei' awasi bafasas ehasas anona nemaf seatagai.

⁵¹Lagel ananinai nanda' amamaga la'ifimi. Ea' ukup asasimi ma'i esis etis sofa' agof lu'wami ea' nali'amonas safe' gani gani hiagoma.

⁵²Anan natalogofa amam king dambami ea' nafela agofa isima sape owina enis epes.

- ⁵³ Anan nase'asa amamaga bu'wami ma isima nolomahasa waf bu'unai, ea' epes isima amamaga hiamisi, natofam mafe' etin.
- ⁵⁴⁻⁵⁵ Anan okom napoma basef na'aim ananinimi endilisimi la'ela'ef mope owagama gani. Amama fowa' gani na'iam naloma bafapapa akupapa. Basef amama fowa' gani na'ipa Abraham naloma wambota ananinai owagama sigi' setagai. Ama anona nemaf neati esis uwahipisa niegiambamas la'ela'ef. Anan nagiangama ape' Israel manda' maol Ananinai.”
- ⁵⁶ Maria kwape kwaloma Elisabet aomb wanemb, ea' kotanima kwafe' wambel akwa'unai.

Elisabet kola Jon napisi'as embeli

⁵⁷ Nema'f anama nataga ea' Elisabet kola so'uso'win aman. ⁵⁸ Esis wambel atona saloma esis wambota akwa'unai seme' basef ma Dembinai nati owahipi'w endilisi ma kola awani inima. Ea' esis sandanifel saloma'w. ⁵⁹ Nimeguf 7-peleim mafe' mali'mana ea', nema'f nafe'ma 8i, esis safi'i sa'i seatopa'mana alop ananinai, ea' sa'i sofalana agel Sekaraia si'i ahalomana. ⁶⁰ Ea' mama'wana kwa'i, “Owa'. Ape' monda'mana anona agel Jon.”

⁶¹ Ea' esis sa'ipakw sa'i, “Owa', esis wambota ine'inai tagasi ina enis sanda' agel anama Jon, owa'etin.”

⁶² Ea' sanda' lagof atom sahali' ahalomana sa'i anan ni'i nonda'mana maina agel. ⁶³ Ea' Anan nanda' logel atona na'ipas sofa'ai anota selet ma nonda' agel nogalomanai. Ea' nanda'ana na'i, “Agel ananinai Jon.”

Ea' esis gegelalasis kwapete'. ⁶⁴ Anan ata' nanda' agel etin, noga na'i malogel ananinai, afega ananinai neawi andeande', nandanifel nafela agel Godi lu'una. ⁶⁵ Ea' esis hiesi wambel anama umbamahas. Ea' dei' amamaga amama gatom mafe' wambel hi'agoma nape halafutagw etap hi'agoma Judia. ⁶⁶ Ea' amam nematawa hiesi same' basefa amamaga amama, ukup asasimi matamea mafe' sa'i, “Anona nema'f awani inima nepe ni'imama?”

Dei' main, esis sogawa pepel la'ifinai Dembinai nape nalomana.

Basef Sakaraia

⁶⁷ Awani inima Jon ahalomana Sekaraia, Ambal Bu'unai Godi nape si'ina anan ea' nawalapa basef Godi si'i amam profet fowa' gani mawalipasam na'i,

⁶⁸ “Ae' a'i ape' mofela agel Godi Dembinai lu'una, God ape' Israeli. Anan nafi'i nagiangama ape' amam nematawa ananipai. Ea' natagahepa makwaha waf aonai ape' manda'anai.

⁶⁹ Ea' nandandepa anona aman la'ifinai nambimb nofa'apa nokwahamapa waf aonai meatanimani. Fowa' gani Devit nanda'

opoh Godi, ea' dei' aman anama nofa'apa motanimani, anan akunamana Deviti.

- ⁷⁰ Basef amama si'i fowa' gani nawalapama amam profet bu'wami ananiami ma'iam malogof amamumi.
- ⁷¹ Ma'i anona nemaf anan nofa'apa meatanimani mokwaha lagof esis naumbih ape'isi soloma epes isima ukup aom endilisi ma ape'i.
- ⁷² Fowa' gani anan na'i anona nemaf niati akusapa ape'isi fowa'isi uwahipis nigiangamas. Ea' anan okom nopoma basef bu'wami fowa' gani na'iam endilisi mope owagama gani.
- ⁷³ Anan na'i basef amama endilisimi atom na'iam la'ifimi gani ilif naloma akunamapa ape'inai Abraham.
- ⁷⁴ Ma anan na'i notagahepa ma lagof esis naumbih ape'isi ma meanda'mana opeh ananiami, ina umbamohapa, owa'.
- ⁷⁵ Anan na'i basef amama ma ape' mope etap anae' monda' opeh ananiami nimeguf hiami danda mefe' mefe' meatagama meaga'. Ma naep ananiami monda' opeh amama ma waf ananinai bu'unai andeande'.
- ⁷⁶ Ea' ine!, awani ae'inai, basef ine'imi amama. Anona nemaf sofalena profet nanda' opeha God pepel hianainai. Dei' main, nambimb ine' nefe' nili'ma Dembinai nenda'mana eaf ananinai.
- ⁷⁷ Ama neawalipa amam nematawa ananisi seagawa anan nefa'as seatanimani. Ama neakwaha waf aonai asasinai.
- ⁷⁸ God ape'inai nati esis uwahipis endilisi dei' nakwahamasa waf aonai asasinai. Anan nambimb nosapa'i howalagon mape heveni mifi'mai ape' molomapa mope la'ela'ef. ⁷⁹ Ama howalama epes sape akoti, ea' isima ga' na'i neatagamasi. Ama nenindina ape' ma meape eaf opalef awanami."

⁸⁰ Anom nimeguf mafe' ea', awani inima nataga damben la'ifina ea' okom ananinai negawa. Anan nape etap wafiguma epes a'agoma nape nape ma nemaf anama nataga nandawalap alihinama naep esis Israeli.

Maria kola Jisas

(Mt 1:18-25)

2 ¹ Anona nemaf anona aman gavman dembinai esis Romi Sisar Ogastus nape, nanda' anona mi'uli gavmani na'ama. Anan na'i nofa' agofa esis amam nematawa hiesi sape etap hiagoma esis Rom sumafiagoma mil buk gavmani. ² Nemaf anama dambadamba anan nali' nofa' agof. Nemaf anama anona aman Kwirinius nape gavman dembinai ma etap hiagoma Siria. ³ Ea' amam nematawa hiesi safe' wambel ofagama asasima ma sonda' agof asasimi. ⁴ Josep anan aman wambota Deviti. Ea' nakwaha Nasaret nape etap hiagoma Galili, nondowasa' nafe' wambel Deviti Betlehem. Wambel anama nape etap hiagoma Judia. ⁵ Ea' Josep

nafe' naloma ano'w nemata'w Maria, esis sandandepana'w sa'i nese'akw ma esis bias sonda' agof asasimi. Ea' akwa'w opafu'w. ⁶Esis bias ata' sapani etin wambel Betlehem, nemaf akwa'w kolanefi a' nataga. ⁷Ea' kwali' kola awani aman ako'uni nali'i. Ipat sa'ohanai asi'ina. Ea' dei' kowa'ana lowaf kwalana nomon bokis gwa'aimi bulmakauwi malama.

Amam ensel ma'ipa amam mumafi sipsipi

⁸Felefele'ma wambel anama anom amam mumafi sipsipi mape wa'ol mumafi sipsip mape owamb. ⁹Ea' anona ensel nafi'i nalumai howalagon Dembinai, howalama amam ea' umbamaham endilisi. ¹⁰Ea' ensel anama na'ipam na'i, "Ipe' ina umbamohepa, owa'. Peme', ae' ifa'mipei basef bu'wami ipe', amama monda' amam nematawa hiesi hi'ilas sondanifal endilisi. ¹¹Dei' nemaf anae' ano'w nemata'w kwape Betlehem wambel Deviti kola enin awani aman. Anan aman anama nokwahomepa waf aonai nofa'epa peatanimani. Anan Krai, God nandandepana nasapa'ana nafi'i, anan Dembinai. ¹²Ipe' pefe' piti awani inima pegawan na'ama. Piti sanda' lowaf so'unai sowa'ana salana na'oh bokis isima sala gwa'aimi bulmakauwi malami."

¹³Ensel anama na'ias na'ama ma ea', mehipe anom ensel hiami si'i ami misila'i gani heven mataga maloma ensel anama ea' mandagala mafela agel Godi ma'i,

¹⁴"Ape' mafela agel God nape gani ilif endilisi lu'una. Pepel howalagon ananinai atona. Ea' epes emi sape etapi God okom bo'ona ma esis, opalef asasimi mope awanem."

Amam mumafi sipsipi mafe' mati Jisas

¹⁵Ea' amam ensel makwaha amam mumafi sipsipi motanima malata heven. Ea' amam mumafi sipsipi manda'ipama etin ma'i, "Wale, ata' ofe' Betlehem uti amamaga anama Dembinai nihi'ambafami."

¹⁶Ea' mohafel mehipe mafe' mati Maria kwaloma Josep sape. Awani salana na'oh bokis nomon sala gwa'aimi bulmakauwi malami. ¹⁷Amam matolona ea' mawalapa basef ensel na'ipamami ma awani inima. ¹⁸Ea' amam nematawa same' basef amama amam ma'iami, esis hiesi same' basef amama gegelalasis ea' nomonas matamea. ¹⁹Ea' Maria kwame' basef amama hiami okokomam mape okom akwa'unai. ²⁰Ea' amam amama motanima mafe' mafela agel Godi lu'una ma'i anan dembinai bu'unai. Amam mandanifela amamaga amama hiami mame'am matulumi mataga si'i ensel na'ipamami.

Esis sanda'mana agel Jisas

²¹Nemaf nafe'ma Si nataga, nemaf anama amam ma'i motopa'mana alop awani. Ea' motopa'mana alop awani inima amani. Ea' sofalana agel Jisas si'i ensel nali' na'ipakwanai nogota anama owa' ata' kofa' opaf.

Simeon naloma Ana sati Jisas ipat lu'unai Godi nomon

²²Nemaf anama nataga ea' ma esis sonda' awani inima noloma mama'wana sondolali sonda' ofa setaga bo'wes si'i basef mail mi'uli anama fowa' God naso' Mosesanai na'iam. Ea' esis mamasana sao'wana safe' sondowasa' Jerusalema sose'ana awani inima Dembinai Goda naep ananimi. ²³Esis sanda'am na'ama si'i basef mape buk Baibeli ma'iana mi'uli Dembinai ma'i, "Awasi amam wali' dambadamba olami, amama ipe' pefalam pi'i amam dembinai Godi atom."

²⁴Ea' bias sa'i sondolalima God sila basef mail mi'uli anama Dembinai fowa' gani na'ipa Moses na'i, "Esis bias sofa' amiguf mai'unamb biam, o sofa' ambegof sa'umi biam."

Ea' sefa'am sanda'am na'ama.

²⁵⁻²⁶Ea' anona aman nape Jerusalemi agilinama Simeon. Anan naila waf bu'unai Godi andeande'. Anan nape nahafa nogota anama God nifi'i nigiangbama esis Israel nokwaha waf aonai esis sanda'anai. Ea' ambal bu'unai Godi nape okom ananinai nihi'ambana anan ina nambimb noga' ulal, owa'. Anan ata' nepe niti Kraiss, Dembinai nandandepana nosapa'ana nafi'i. ²⁷Ambal Bu'unai Godi nafelana nafe' nawis ipat lu'unai Godi. Ea' esis mamasana Jisasi sao'wana safi'i sandolalimana si'i mi'uli Godi na'iam. ²⁸Ea' sanda'am etin, Simeon nandalombasana lagof ananimi nanifela God nafela agel ananinai lu'una na'iam na'ama na'i,

²⁹"Dembinai, nahapila pepel hianai ae' anda' opeha ine'. Dei' ine' nenda' opaf ae'anai nupe awanena ea' ega' efo'o si'i basef endilisi atomi fowa' gani na'iami.

³⁰Naep ae'ami atilin ea' awani aman inima ine' nasapa'ana nafi'i nofa'apa meatanimani. Na'ama dei' ine' nekwaha ae' ega' efo'o.

³¹Ine' nanda' awani inima natagama amam nematawa hiesi satolona ea'.

³²So'uso'win inima si'i anona howalagon howalama epes isima sololama Godi nihi'ambas. Ama nonda' amam nematawa ine'isi Israel sofa' agof lu'wami."

³³Ea' mamasana Jisasi gegelalasis ukup asasimi matamea ma basef amama Simeon na'iami. ³⁴Ea' Simeon na'ipasa basef bu'wami nanda'as la'ifis ea' na'ipa mama'wana Jisasi na'ama na'i, "Ine' neme'. Awani inima God nandandepan ea' ma nahambombaga enis amam nematawa Israel sowa' alafugaha enini. Ea' enis epes nofa'as sokwaha waf aonai siefi'mai enin. Enin si'i anona ikwaf God nanda'anai ma enis epes hiesi sosambala basef ananimi sondaiwa'mana. ³⁵Awani inima napoma newalapa nomonas hiami mape mandambahi'i motaga alihim. Maria, ine' nambimb okom nimanina si'i anona bainat hi'alinalai notopa' okom ine'inai."

³⁶Ea' ano'w nemata'w profet agili'wa Ana kwape kwalomas. Ahaloma'w ako'unai Fanuel. Wambota lu'unai akunama'wi Asa. Akwa'w ahage'w

endilisi. Fowa' kwase' aman kwalomana sape afagof 7-peleim. ³⁷Ea' waulunama'w naga'. Ea' kwape etin, kwafe' kwafe' dei' afagof akwa'umi mataga 84-peleim. Akwa'w ina kwakwaha ipat lu'unai Godi anom nimeguf, owa'etin. Akwa'w kololama gwa'aimi kwape kwanda' beten ea' kwanda' lotu kwahapila opeh Godi kwanda'am kwafe' owamb alip. ³⁸Nemaf anama dei' atef akwa'w kwafi'i anama Simeon naloma Josep Maria saituma kwanifela God. Enis wapoti' saitua na'ama sape sehafa nemaf anama nambimb God nigiangbama esis sape Jerusalemi nofa'as setanimani seape wafifis. Ea' akwa'w wapoti' kwa'ipasa basefa so'uso'win inima.

Josep nao'was satanima safe' Nasaret

³⁹Esis Josep naloma Maria sanda'am sailam ea' opeh ahalomana si'i Dembinai fowa' gani na'iama mi'uli ananinai ea' satanima safe' Nasaret اساسima ofagama etap hiagoma Galili. ⁴⁰Ea' so'usowin Jisas nataga dambena la'ifina ma gawa hianai. Ea' God okom nainailana nagiangbamana etin nanda'ana la'ifina.

Jisas ata' sa'ona nape ipat lu'unai Godi

⁴¹Afagof danda mamasana Jisasi sondowasa' safe' Jerusalema sanda' gwa'aimi lu'wami sofalam sa'i Pasova. ⁴²Afagof Jisasi dei' mataga 12-peleim mahape'ana ea' sao'wana sondowasa' Jerusalem saila waf asasinai si'i afagof danda sanda'anai. ⁴³Ama nimeguf amama Pasovaimi hi'alam, esis mamasana satanima safe'. Ea' sa'usa'win ina nafe' nalomas, owa'. Sakwahona napani Jerusalem. Esis ina sagawa anan napani, owa'. ⁴⁴Sa'i nali' nafe' naloma enis epes safe'. Esis safe' anona nemaf si'ina hi'alana, ea' sagolopana la'afena esis wambota atona saloma esis alupisi. ⁴⁵Esis mamasana sagolopana sati owa'etin, ea' satanima safe' Jerusalem sagolopana. ⁴⁶Esis bias sagolopana safe' nimeguf wanom. Ea' satolona nape nomon ipat lu'unai Godi. Anan nape naloma amam Juda gawaimi mawalipasa mi'uli Godi. Nape nagahembe'ma basef amomumi ea' nahali' amam. ⁴⁷Amam dambami maloma esis hiesi same' basef ananimi, gegelalasoma basef maloma gawa ananinai nagwamama basef amam. ⁴⁸Ea' mamasana satolona nape la'afena amam dembemi nalomam mape ea' gegelalasam kwapete'.

Ea' mama'wana kwa'ipana kwa'i, "Nogalome, dei' maina ine' nanda' na'ama ma afa'? Ahalomena naloma ae' opalef afa'imi nimanim endilisi ma wagolopena."

⁴⁹Ea' anan nagwamas na'ipas na'i, "Dei' maina ipe' bipa pagolope pafe' hi'alagon? Ae' dei' ape anda' opeh ipat Ahalome Godi, amama ipe' pegawam o owa'?"

⁵⁰Ea' esis ina sogawa basef anan na'ipasami ofagema, owa'.

⁵¹ Ea' Jisas nafe' naloma esis bias safe' Nasaret, name' esis naila abasef اساسيمي nimeguf hiami. Ea' mama'wana anani'wi okom napoma basef hiami ma amamaga amama matagama sa'usa'win akwa'uni nape okom akwa'unai. ⁵² Jisas ea' nataga dambena. Ea' gawa ananinai nataga lu'una andeande' bo'ona, ea' God naloma epes wapoti' satolona ambo'ona endilisi.

Jon napisi'as embeli nandondomba eaf Jisasi

(Mt 3:1-12; Mk 1:2-8; Jo 1:19-28)

3 ¹ Anona afagel anona gavman dembinai esis Romi Taiberius Sisar nape dembinai ma etap hiagoma esis Romi afagof 14-peleim hi'alama anona afagel wapoti', nafe'ma 15-peleim, Pontius Pailat ata' nape dembinai gavmana etap hiagoma Ituria naloma Trakonitis wambel hiagoma Herot ata' nape dembinai numafi wambel hianai etap hiagoma Galili. Ea' Lisaniyas nape dembinai gavman numafi wambel hiagoma etap hiagoma Abilene. ² Ea' afagel anama atona Anas naloma Kaiafas amam biam pris dambami mape mali'ma pris hiami. Nogota anama ma afagel anama basef Godi mafi'mai Jon, Sekaraia nogalomana nape anona etap wafiguma fatauguma. ³ Ea' nafe' anama hiagoma walemb Jordan na'ipasa basef Godi amam nematawa. Na'ipasa somboma opalef sowa' alafugaha waf aonai sofa' baptais ma God nokwahomasa waf aonai esis sanda'anai. ⁴ Anon nawalapa basef amama Godi si'i profet Aisaia fowa' gani nawalapam nanda'am mail buk Baibeli ma'i,

“Anona etap wafiguma fatauguma, malogel anona amani anona nemaf noga ni'i, 'Pendondomba eaf Dembinai, penda' ana nefe' usi'ina.

⁵ Pewam gambiwah asiasinuguma ma si'igin dondo' etin, petopa' halalef laumi bandami hiami ma mowala dondo'am. Dilindila'ma penda'agon usi'igin. Ea' ufiawa amama manda' lotasila'ma sonda'am andeande'.

⁶ Ea' amam nematawa hiesi hi'ilas anona nemaf siti God nagiambama enis amam nematawa nofa'as sotanimani.' ”

⁷ Hiesi amam nematawa safi'mai Jon ama sa'i nupisi'as embel. Ea' na'ipas na'i, “Ipe' panda' waf aonai, si'i awasi iguf awami molaipei. Emi na'ipipa ma pa'i pefa' pefe' pindihima okom wandafunai Godi anona nemaf na'i neatagama ipe'i? ⁸ Ea' dei' a'ipipa. Penda' waf bu'unai ma pihi'ambas ipe' pamboma opalef endilisi paila waf bu'unai. Ipe' ina ukup mondanda' mi'i, 'Abraham anan ahalomapa ape'inai', owa', hapaimi. Ae' a'ipipa endilisi, God anan la'ifinai ma nonda' otamba amama motaga epes si'i awasi Abrahami. ⁹ Tamia'w nandandombol na'oh neatopa' lawah ofagem nombalefima. Maim lawah owa' mil mola su'utip bu'wami, amama anona nemaf solam sokwahom mefe'ma nif.”

¹⁰Anan na'iam ea', esis hiesi sahali'ana sa'i, "Ape' nambimb monda' main?"

¹¹Ea' Jon na'ipas na'ama na'i, "Emi epen siaogw biam atumi nese'anana anona enin siot a'ani, ea' emi gwa'aimi ma'omani inima nenda'am newalogam wapoti'."

¹²Ea' anom amam mofa' takisi mafi'mai Jon ma'i nupisi'am embel ea' mahali'ana ma'i, "Dembina, nambimb afa' onda' main?"

¹³Ea' anan na'ipam na'i, "Ipe' pefa' otamba mondahama si'i gavman na'ipipam. Ipe' ina pefa' anom wapoti', owa'."

¹⁴Ea' anom soldia mafi'i mahali'ana ma'i, "Afa' nambimb onda' main?" Anan nagwamam na'ipam na'i, "Ipe' ina pembaso'ma epes piumbelis penda'as umbamohas penda'mas basef pelela'epasa moni asasinai, owa'. Ea' opalef ipe'imi mope awanema otamba ipe'imi dondo'ma ikwaf amam dambami mandandepami."

¹⁵Ea' dei' nomonas esis amam nematawai hiesi mohafel la'ifim, ea' ukup mandanda'ma Jon sa'i, "Jon anan Kra, ma'una God nandandepana nasapa'ana nafi'?"

¹⁶Ea' Jon nagwamasa basef na'ipas na'i, "Ae' apisi'ipa embel atom. Ea' anona aman nambimb niefi'i, anan la'ifinai nikila' ae'. Ae' ina aman bu'uwei ma eatagaha mandelefa su ananiami, owa'etin. Nambimb anan nese'epa Ambal Bu'unai Godi nope opalef ipe'imi nomon ea' nese'epa nif wapoti'. ¹⁷Anan nahapila anona savol lagof ananiami ma niesimba wit si'i rais amama nisimba'am andeande'. Nefa' wit bu'unai nuwis nembe'am ipat ananinai. Ea' tukwakwaniami awami nembefam nofam nif amama lu'wami fandom la'ela'ef mapani."

¹⁸Ea' Jon nawalapa anom basef hiami wapoti' ma neafela ukup asasimi ma sonda' waf bu'unai. Ea' nawalipasa basef bu'wami Godi.

Herot nanda' kalabusima Jon

¹⁹Ea' Jon na'ipana basef la'ifimi aman anama Herot, gavman dembinai asasinai, ma waf aonai hianai anan nanda'anai. Anan nandalombana Herodias nemata'w sahalomana nase'akwi, ea' nanda' waf aonai hianai wapoti'. ²⁰Dei' nowatani anona waf aonai wapoti' ma nanda' Jon nanda' kalabus.

Jon napisi' Jisas embel

(Mt 3:13-17; Mk 1:9-11)

²¹Jon napisi'a amam nematawa hiesi ma ea', napisi' Jisas wapoti'. Jisas nofa' baptais ea', anan ata' nanda' beten etin ea', heven uta nandausi'. ²²Ea' Ambal Bu'unai Godi nisila'i si'i amil mai'una nufia' nisilamanai. Ea' anona malogel na'i natagai heven ilif na'i anom basef na'i, "Ine' Nogalome ae'inai. Ae' okom nohafel nainailina endilisi. Okom ae'inai bo'ona ma ine'."

Agofa epes hiesi bafapana Jisasi

(Mt 1:1-17)

²³Nemaf anama Jisas nasefela opeh nanda'am, afagof ananiami mataga felefele'ma 30-peleim. Esis amam nematawa ukup mandanda' etin ma'i anan nogalomana Josepi. ²⁴Bafapana Jisasi agufuma amama. Josep, anan Heli nogalomana. Ea' Heli, Matat nogalomana. Ea' Matat, Livai nogalomana. Livai, Melki nogalomana. Melki, Janai nogalomana. Ea' Janai, Josep nogalomana. ²⁵Josep, Matatias nogalomana. Matatias, Emon nogalomana. Emon, Nahum nogalomana. Ea' Nahum, Esli nogalomana. Ea' Esli, Nagai nogalomana. ²⁶Nagai, Mat nogalomana. Mat, Matatias nogalomana. Ea' Matatias, Semen nogalomana. Ea' Semen, Josek nogalomana. Josek, Joda nogalomana. ²⁷Joda, Joanan nogalomana. Joanan, Resa nogalomana. Resa, Serubabel nogalomana. Serubabel, Sealtiel nogalomana. Sealtiel, Neri nogalomana. ²⁸Neri, Melki nogalomana. Melki, Adi nogalomana. Adi, Kosam nogalomana. Kosam, Elmadam nogalomana. Elmadam, Er nogalomana. ²⁹Er, Josua nogalomana. Ea' Josua, Elieser nogalomana. Ea' Elieser, Jehoram nogalomana. Jehoram, Matat nogalomana. Ea' Matat, Livai nogalomana. ³⁰Livai, Simeon nogalomana. Ea' Simeon, Juda nogalomana. Juda, Josep nogalomana. Ea' Josep, Jonam nogalomana. Jonam, Eliakim nogalomana. ³¹Eliakim, Melea nogalomana. Melea, Mena nogalomana. Mena, Matata nogalomana. Matata, Natan nogalomana. Natan, Devit nogalomana. ³²Devit, Jesi nogalomana. Jesi, Obet nogalomana. Obet, Boas nogalomana. Boas, Salmon nogalomana. Salmon, Nason nogalomana. ³³Nason, Aminadap nogalomana. Aminadap, anan Atmin nogalomana. Atmin, Arni nogalomana. Arni anan Hesron nogalomana. Hesron, Peres nogalomana. Peres, Juda nogalomana. ³⁴Ea' Juda anan Jekop nogalomana. Jekop anan Aisak nogalomana. Aisak, Abraham nogalomana. Abraham, Tera nogalomana. Tera, Nahor nogalomana. ³⁵Nahor, Seruk nogalomana. Seruk, Reu nogalomana. Reu, Pelek nogalomana. Pelek, Eber nogalomana. Eber anan Sela nogalomana. ³⁶Sela anan Kenan nogalomana. Kenan, Arpaksat nogalomana. Arpaksat, Siem nogalomana. Siem, Noa nogalomana. Noa, Lamek nogalomana. ³⁷Lamek, Metusela nogalomana. Ea' Metusela, Enok nogalomana. Enok, Jaret nogalomana. Jaret, Mahalalel nogalomana. Mahalalel, Kenan nogalomana. ³⁸Kenan, Enos nogalomana. Enos, Set nogalomana. Set, Adam nogalomana. Adam, God nogalomana. Bafapana Jisasi ea' ma'um.

Satan nagwamba Jisas anona etap wafiguma fatauguma epes a'agoma

(Mt 4:1-11; Mk 1:12-13)

4

¹Ambal Bu'unai Godi nape si'inama Jisas ea' nakwaha walemb anama Jordan nandegiai natanima nafe!. Ea' Ambal Bu'unai Godi

nofa'ana nafe' anona etap wafiguma fatauguma epes a'agoma. ²Jisas nape anama nimeguf hiami ea' Satan nafi'i nagwambana aon si'inai tu'waninai. Jisas ina na' gwa'aimi, owa'. Nolomahana.

³Ea' Satan na'ipana na'i, "Ine' na'i ine' Nogalomana Godi, dei' kipa owap anama na'oh etapi notaga si'i bret."

⁴Ea' Jisas nagwamana basef na'ipana na'i, "Baibel na'i bret atona ina nose'asa ambagof namumi epes, owa'."

⁵Ea' Satan nao'wana mafe' anona halaf launai endilisi nihi'ambana amamaga hiami bu'wami mape etap hiagoma maloma amam nematawa. Nihi'ambana la'ifina mehip etin. ⁶Ea' na'ipana na'i, "Amamaga hiami pepel amama amam king hi'alam mumafiami maloma epes hiesi agel lu'unai, amamaga bu'wami hiahaom maim, amamaga amama hiami God nase'eami ae'ami. Ea' dei' i'i ese'anam enin epen, ae' ese'anam. ⁷I'i ine' nindiwa nembawa netawa nenda' lotu ma ae', amamaga amama ine'imi atom."

⁸Ea' Jisas nagwamana basef na'ipana na'i, "Baibel na'iam na'ama na'i, 'Ipe' penda' lotuma Dembinai God ipe'inai atona, ea' penda' opeh ananiami atom.' "

⁹Ea' Satan nao'wana nondowasa' Jerusalem nahaponana naitu ipat Godi lu'unai sanda' lotuwanai ilif.

Ea' Satan na'ipana na'i, "Ine' na'i ine' Nogalomana Godi, dei' netoma nukupa' newa etap. ¹⁰⁻¹¹Dei' main, anom basef Godi mail buk Baibeli ma'i na'ama ma'i,

'God ni'ipa amam ensel Ananiami mifi'i muhapilina lagof amamumi mumafina ma otamba ina moha bo'wagah ine'imi, owa!.' "

¹²Ea' Jisas nagwamana basef na'i, "Anom basef Godi wapoti' mape na'ama ma'i,

'Ipe' ina pegwamba Dembinai God ipe'inai nonda' waf aonai, owa!.' "

¹³Satan nagwambana ma ea', nakwaha Jisas nafe' nohafana ma anona nemaf nifi'i neagwambana wapoti'.

Jisas nafela maol nanda'ana gani etap hiagoma Galili

(Mt 4:12-17; Mk 1:14-15)

¹⁴Pepel Ambal Bu'unai Godi nape opaf Jisasi ea' natanima nafe' etap hiagoma Galili. Ea' same' basef gato mafe' anan mafe'agon hi'agon wambel hiagoma Galili. ¹⁵Anan nawalipasa basef Godi ifagw esis Juda sa'i basef sapeimi. Ea' amam nematawa hiesi safela agel ananinai lu'una.

Esis Nasaret sase'ana alafugaha Jisas

(Mt 13:53-58; Mk 6:1-6)

¹⁶Ea' Jisas nafe' Nasaret taun anama ofagama, fowa' anan ata' so'uso'win napoma.

Nape ea' nemaf anama Sabat esis Juda sapoma noma'wanai, nafe' nawis ipat esis Juda sa'i basef sapeinai si'i la'ela'ef nanda'am. Anan naitu natalifa basef Godi, ea' sase'ana anona pepa lounai. ¹⁷Pepa anama anom basef Godi fowa' gani profet Aisaia nanda'am mailanai. Anan naofa pepa anama nati anom basef natalifam ma'i na'ama ma'i,

¹⁸ “Ambal bu'unai Dembinai nape ae'. Ea' nandandepe ma eawalapa basef bu'wami ma epes isima kwahusi amamaga a'ami. Nasapa'e afi'i ma ewalapa basef na'ama i'i, 'Ipe' panda' kalabusi pekwahe kalabus pefe' wafifipa. Ipe' epes naep masi'ipei, ipe' piti andeande' wapoti'. Anan nasapa'e afi'i iegiangama isima sofa' nimanimi seape andeande'. ¹⁹Ea' i'ipasa basef hiesi ma nogota anama bu'unai ma Dembinai niti uwahipis nigiangamas seape andeande'.”

²⁰Ea' Jisas nambomefa pepa anama nase'anana anona aman numafi ipati ea' anan nape. Ea' amam nematawa hiesi sape nomoni sati anan atona. ²¹Ea' na'ipas na'i, “Ipe' pame' ae' atalifa basef Godi fowa'imi etin ea', dei' mataga alihim endilisi mandawalapa ae'.”

²² “Ea' esis hiesi safela agel ananinai lu'una sa'i anan aman bu'unai ea' gegelalasisa basef bu'wami mataga malogel ananinai. Ea' esis sandahali'ma sa'i, “Aman anama Josep nogalomana?”

²³ “Ea' Jisas na'ipas na'ama na'i, “Endilisi etis ipe' nambimb penda' basef amama womun etina ae' pi'i, 'Dokta, ine' nenda' alop ine'inai notaga bo'ona nili', ea' pi'i wapoti' pi'i waf anama nali' nanda'ana Kaperneam, anama ape' mame'ana ea'. Ine' dei' nenda'ana notaga na'ae wambel ofagama ine'ima.’”

²⁴ “Ea' anan na'iam na'ama wapoti' na'i, “Ae' a'ipipa endilisi! Anona profet epes ina sase'ana opalef same' basef ananinimi wambel ofagama ananima, owa'. ²⁵ “Ae' a'ipipa endilisi. Nogota anama fowa' gani Elaija napenai owaf atona naluwi, asaf ina ata' nalai afagof wanom aomb wanemb wanemb, owa'etin. Ea' nolomahas lu'unai nataga ganima hiagoma. Nogota anama nematawa hiawai Israeliwai amam maga' mialifawa wapen. ²⁶ “Ea' God ina nasapa' Elaija nafe'ma anowa awamai, owa'etin. Anan nasapa'ana nafe'ma ano'w nemata'w kwape Serafat, wambel nape anona etap lu'wagoma Saidon. Ea' akwama ato'w. ²⁷ “Ea' nogota anama anona awes aonai^s nataga nanda' alop esis amam nematawa Israeli alop pambo'. Ea' ina enin epen asasini nataga bo'wen, owa'etin. Anona aman Naman Siriainai ea' anan atona nataga bo'ona.”

²⁸ Ea' esis hiesi sape ipat anama same' basef amama, nomonas wandafum kwapete'a Jisas. ²⁹ Ea' sohafel sagalo'mana nawisi taun ande'.

a 4:22 Lu 3:23; Jo 6:42 **b** 4:23 Mt 4:13; Jo 2:12 **c** 4:24 Jo 4:44 **d** 4:25 1 Kin 17:1,7; 1 Kin 18:1 **e** 4:26 1 Kin 17:8-16 **f** 4:27 2 Kin 5:1,14 **g** Awes anama Tok Pisin sa'i sik lepra, basef amama ina ma'i awes anama ape' ma'i awes lepai, owa'. Basef amama ofagama ma'i anona awes dei' alop nambo' hi'alana.

Taun anama asasinai natoma halafuta ilif. Ea' sofa'ana safe' halafuta anama sa'i sogwale'ana nowala tata. ³⁰Ea' anan nisila' esis hiesi nafe'.

Jisas natofa ambagof awami mape anona amani ambo'ona
(Mk 1:21-28)

³¹Ea' Jisas niliana Kaperneam anona taun nape etap hiagoma Galili. Anan nape ea' nemaf anama Juda sapoma noma'wanai sa'i Sabat, anan nawis nomon ipat esis Juda sa'i basef sapeinai nawalipasa basef Godi. ³²Same'ana sa'i anan nofa' agel lu'unai dei' na'lipasa basef la'ifimi. Ea' sohafel gegelalasis kwapete'as endilisi. ³³Anona aman ambafuh manda'anai nape ipat anama, ambal aonai napaina. Anan na'i mehip endilisi na'iam na'i, ³⁴“E! Jisas ine' Nasaretinai, na'i nifi'i nenda' maina ape'? Ine' nafi'i ma nehambombagapa? Ae' egawa ine' nogalomana God bu'winai andeande'.”

³⁵Ea' Jisas ninifalona na'ama na'i, “Ine' aonai awinai sopama malogel kwaha aman anama.”

Ea' ambalip anama nakwahona nowa etap la'afena esis hiesi nawisi nafe', ina ata' nahambombagana wapoti', owa'etin.

³⁶Esis hiesi gegelalasis sandakoto'ma sanda'ipama sa'i, “Amama maim basef? Anan natofa ambagof awami na'ipam si'i anona aman la'ifinai nofa' agel lu'unai. Ambagof awami mame' basefa anan, makwahona mafa' mafe'.”

³⁷Ea' basef amama nanda' amamaga amama la'ifimi mafe'agon hi'alagon wambel nape felefele'i.

Jisas nanda' Saimon Pita nandagi'mokwi ambo'okw
(Mt 8:14-15; Mk 1:29-31)

³⁸Saimon nandagi'mokwi awesi'w alop ako'unai nifina kwapete'. Ea' Jisas nohafel nakwaha ipat anama sanda' kolasanai, nafe' nawis ipat Saimoni. Ea' sahali'ana ma niegiambama'w. ³⁹Ea' anan nafe' naitu felefele'ma akwa'w natofa awes anama nafe' nakwaha akwa'w. Ea' kohafel mehip kwanda'masa gwa'aimi esis.

Jisas nanda' amam nematawa hiesi sataga bo'wes
(Mt 8:16-17; Mk 1:32-34)

⁴⁰Aon newala naso', esis amam nematawa sofa'ai enis awes naninani nanda'asi sofa'as safi'mai Jisas. Ea' nasa lagofas atona etin nanda'as bo'wes hi'alas. ⁴¹Ea' ambagof awami hiami makwaha esis hiesi mawisi mafe' ea'. Ambagof amama awami mofalana mehip ma'i, “Ine' nogalomana Godi.” Amam mogawa anan Krai, God nandandepana nasapa'ana nafi'i. Ea' Jisas ninifalom na'i ina ata' mi'i anom basef, owa'. Mosopama malogof.

Jisas nawalapa basef Godi taun hianai
(Mk 1:35-39)

⁴²Kuhimbita atona Jisas nakwaha wambel anama nafe' anagon wafiguma fetauguma epes a'agoma. Esis safe' sogolopana satolona safe'ma anan. Esis sa'i anan ina nokwaha esis nofe', owa'. Sa'i sembalo'ana nope la'ela'ef nolomas. ⁴³Ea', na'ipas na'i, "Ae' a'i ewalapa basef bu'wami ma epes siowis wambota Godi numafias. A'i ewalapa basef amama anagon taun hianai wapoti'. Dei' main, God nasapa'e afi'i enda' maol anama atona." ⁴⁴Ea' nafe' nawalapa basef Godi ifagw esis Juda sai basef sapeimi nawalapam nafe' etap hiagoma Judia.

Jisas na'ipa Saimon Pita, dei' nowafa agof hiami
(Mt 4:18-22; Mk 1:16-20)

5 ¹Anona nemaf Jisas naitu akata walemb batupa'manai lu'unai Genesaret naloma amam nematawa hiesi sala'ambemana sape same' basef Godi. ²Ea' nati bogw sa'umi biam mala embel felefele'ma nimbap walemb batupa'manai. Ea' amam mowafa agufi mandani' mafe' masa'opa anemb amamumi. ³Ea' Jisas nalata natoma bot Saimoni ea' na'ipana na'i, "Sapa' bot nokwaha bandagoma nefe' laogoma."

Ea' Jisas natoma bot nawalipasa basef esis amam nematawa. ⁴Anan na'ipas ea' na'ipa Saimon na'i, "Ine' sapa' bot nofo'o walemb embel laogoma ea' pekwaha anemb mowala pewafai anom agof."

⁵Ea' Saimon nagwa basef na'i, "Dembina, do'ok owamb laona afa' wanda' maol lu'unai ea' ina wagi anom agof, owa'. Ea' na'ipa ae' na'ama, dei' ekwaha anemb mowala."

⁶Ea' mokwaha anemb mowala mowafai agof hiami. Ea' anemb ma'i pele'etama agof hiami endilisi. ⁷Ea' amam mofalai alupumi amamumi mape anona boti mafi'i magiambama mowafai agof malam bogw biam si'ima agof ma'i mowala. ⁸Saimon Pita nati na'ama, ea' nindiwa nembawa natawa felefele'ma bo'wagah Jisasi na'ipana na'i, "Dembina, ine' kwaha ae', fo'o. Ae' aman aowei, anda' waf aonai!"

⁹Dei' main, anan naloma amam malumanai mati agof mowafami umbelimi endilisi. Ea' amam gegelelasom nomonas matamea.

¹⁰^hBatausana Sebedi biam Jems naloma Jon maloma Pita mandau'umai wapoti' gegelelasoma agof amama.

Ea' Jisas na'ipa Saimon na'i, "Ina umbamehena, owa'. Dei' atef nesafela maolan nenda'ana la'ela'ef ni'pa enis epes sila Ae'."

¹¹ⁱEa' amam manda' bogw mafe' bandagoma, makwaha amamaga amamumi hi'alam ma'oh, ea' mailana mafe'.

Jisas nanda' anona aman awes aonai nanda' alop nambu'anai ambo'ona
(Mt 8:1-4; Mk 1:40-45)

¹²Nogota anama Jisas nape anona taun, anona aman awesinai' alop nambu'anai nape. Anan nati Jisas nafi'i, nande' nembawa natawa etap na'ipana mehipe na'i, "Dembina, i'i ine' ni'i awi, nenda' ae' etaga bo'owe."

¹³Ea' Jisas nasa lagel alop aman anamai na'ipana na'i, "Ae' a'i a'e ma ine' netaga bo'wena."

Ea' dei' atef awes anama aonai nakwahona ea' nataga bo'ona.

¹⁴Ea' Jisas na'ipana basef la'ifimi na'i, "Ina nefe' ni'ipa enin epen ni'i ae' anda'ena bo'wena, owa'. Ine' fo'lo nihi'ambana alop ine'inai ma aman anama pris. Ea' nese'ana amamaga amama anan nondolalima God ea' ine' ninifelona ma nataga bo'wena si'i mi'uli ananinai fowa' gani Moses na'ipasanai na'i. Ama esis hiesi sogawa ine' ambo'wena."

¹⁵Owa'etin. Diga basefa amamaga amama Jisas nanda'manam aman anama gatom mafe' ganigani. Fowa' ina hiesi same' basef amama, owa'. Dei' hiesi endilisi. Amama atom dei' epes hiesi safi'i ma some' anona nonda eses awes nanda'as setaga bo'wes. ¹⁶Ea' nimeguf hiami Jisas nafe' anama wafiguma epes a'agoma ma nape nanda' beten.

Jisas nanda' anona aman lagof bo'wagah maga'anai ambo'ona
(Mt 9:1-8; Mk 2:1-12)

¹⁷Anona nemaf Jisas nape nawalipa esis amam nematawa ea' anom Farisi maloma anom mawalipasa mi'uli Godi tol mape. Anom mafi'i wambel hianai etap lu'unai biefina Judia naloma Galili. Ea' anom mafi'i Jerusalem. Ea' pepel Dembinai Godi nape Jisas, ama nanda' epes awes nanda'asi sotaga bo'wes wapoti'. ¹⁸Ea' anom amam mofa' anona aman lagof bo'wagah maga' mailanai, na'oh lehis mofa'ana mafi'i. Ea' ma'i mofa'ana mefe' muwis ipat mombe'ana felefele'ma Jisas. ¹⁹Ea' si'igina amam nematawa hiesi. Amam ina mati anona eafa mofa' aman anama muwis nomon, owa'. Ea' malata ipat ilif mihianama bogwan ilif mala aman anama awes nanda'anai naloma lehis nowala nomon la'afena amam nematawa mambe'ana na'oh naep Jisasi.

²⁰Nogota anama Jisas natolom nogawa amam mombale'efana la'ifinai ma niegiambama aman anama awes nanda'anai. Ea' na'ipa aman anama na'i, "Ine' epen ae'inai. Waf aonai ine' nanda'anai ae' akwahomenana ea'."

²¹Ea' amam mawalipasa mi'uli Godi maloma amam Farisi atom ukup atifim mandanda' ma'i, "Aman anama emi egafuna nanda' God findiwanai? Owa'etina anona aman la'ifinai naima nekwaha waf aonai. God atona nakwaha waf aonai."

j Niti futnot Luk 4:27.

²²Jisas nogawa nomonas amamumi. Ea' na'ipam na'i, "Dei' maina ukup ipe'imi mape na'ama? ²³Dei' amamaga maim ipe' pa'i ahifima ae'? Ae' la'ifiwei ma i'ipa awes nanda'anai i'i, Ae' ekwahomena waf aonai ine' nanda'anai o i'ipana i'i, fela lehis ine'imi nehafel nefe'. Basef amama ma nefela lehis ananimi, ipe' pa'i amama ahifima ae'. ²⁴Ea' ae' a'i ipe' pegawa ae' ataga epen endilisiwei, la'ifiwei ma ekwaha waf aonai hianai amam nematawa sape etapi sanda'anai. Ae' a'i ihi'ambepa ae' la'ifiwei ma enda' amamaga amama."

Ea' anan na'ipa aman anama awes nanda'anai na'i, "Ae' a'ipina endilisi, ine' hafel fela lehis ine'imi fa'am nefe' ipat ine'inai."

²⁵Jisas na'ipana etin na'ama, nohafel naitu nafela lehis ananimi naep amam nematawa hiesi. Ea' ata' nafe' etin eaf, nandanifel nafela agel Godi lu'una nafe' ipat ananinai.

²⁶Ea' amam nematawa isima hiesi gegelalasis kwapete'as umbamahas endilisi safela agel Godi lu'una sa'i, "Dei' ape' mati anona waf dambainai fowa' owa' meatolonai."

Jisas nofala anona aman Livai

(Mt 9:9-13; Mk 2:13-17)

²⁷Amama mataga ea', Jisas nohafel nafe' nati anona aman nofa' takisi tol nape ipat sofa' takisanai, agilinama Livai. Ea' Jisas na'ipana na'i, "Ine' fi'i nila ae'."

²⁸Ea' nohafel nailana nafe'. Amamaga hiami ananimi nakwahom ma'oh.

²⁹Ea' Livai nanda' anom gwa'aimi lu'wami ipat ananinai nanifela Jisas. Ea' amam hiami manda' waf aonai mofa' takisi maloma anom amam wapoti' mape ma' gwa'aimi maloma amam biam. ³⁰Ea' anom Farisi maloma anom amam mawalipasa mi'uli Godi, amam Farisi, mape manda' megah maham ma amam alupumi Jisasi ma'i, "Dei' maina ipe' pape pa' gwa'aimi paloma amam mofa' takisi maloma amam amama manda' waf aonai? Na'ama ina andeande', hapaimi."

³¹Ea' Jisas nagwamam na'ipam na'i, "Isima awes a'asi ina safe'ma dokta, owa'. Esis bu'wasi. Ea' isima awes nanda'asi etis safe'ma dokta.

³²Ae' ina afi'i ma efala epes sape andeande'i somboma opalef, owa'. Ae' afi'i ma efala epes sanda' waf aonai etis somboma opalef sokwaha waf aonai sefe'ma God."

Waf sololama gwa'aimi

(Mt 9:14-17; Mk 2:18-22)

³³Ea' enis epes sa'ipa Jisas na'ama sa'i, "Alupumi Joni maloma alupumi amam Farisi ukup mapoma basef Godi. Ea' anom nimeguf wikifah hiami amam mololama gwa'aimi monda' beten etin. Ea' alupumi ine'imi owa' monda' waf anama. Amam ma' gwa'aimi embel maim nimeguf hiami."

³⁴Ea' nagwamas na'i basef womun etin na'i, "I'i enis sonda' anom gwa'aimi lu'wami ma enis aman nemata'w bias sondase'ama, ipe' ina la'ifipama penda' esis alupisi sondaiwa'ma gwa'aimi nemaf anama anan naso' nemata'wi nape nalomas, owa'etin. ³⁵Ea' nemaf anama anan naso' nemata'wi nokwaha esis nafe' anagon laogoma, esis sakwaha gwa'aimi."

³⁶Ea' Jisas na'ipasa anom basef womun etina luwaguf na'i, "Ina andeande'ma petopa' lowaf namunai pesana neloma anona lowaf apinai, owa'. I'i enis sonda'am na'ama, lowaf ina noloma apinai na'ama etin, owa'. Namunai pele'etana etin.

³⁷Ea' ina enin epen nakolo'wa embel wainim dambaimi agwahup apinai mafinina, si'i botowagof, owa'. I'i enin nenda'am na'ama, wain netef hiana, nohape' agwahup anama pepe'etana ea' wain kolo'olana aona hi'ilana. ³⁸Ea' wain dambainai sakolo'wana agwahup dambainai atona. ³⁹Ea' emi noga' wain apinai enin ina atuwasi okom ni'i wain dambainai, owa'. Enin na'i, 'Wain apinai bu'unai nikila' dambainai.' "

Jisas nape Dembinai ma nemaf anama Sabat esis Juda sapoma noma'wanai
(Mt 12:1-8; Mk 2:23-28)

6 ¹Anona nemaf esis Juda sapoma noma'wanai Sabat, Jisas nafe' anagon ea' nataga anona aof sawa witanai nawis. Ea' alupumi ananiami mafe' malomana, ea' magi anom wit maufi moka'isam lagof amamumi magwa'am. ²Ea' anom Farisi mahali'am ma'i, "Ina penda'am na'ama ma nemaf ana'e Sabat mapoma noma'wanai, owa'. Dei' maina panda'am na'ama?"

³Ea' Jisas nagwamam na'ipam na'i, "Ipe' pegawa basef amama ma waf fowa' gani dembinai King Devit nanda'anai. Nemaf anama Devit naloma alupumi ananiami nolomaham ⁴anan nawis ipat lu'unai Godi nomon na' bret anama amam pris mondolali maso' Godanai. Ea' na'ana naso' alupumi ananiami wapoti' ma'ana etin. Ea' mi'tuli ape'inai na'i amam pris atom mea'ana."

⁵Ea' Jisas na'ipam wapoti' na'i, "Ae' ataga epen endilisiwei, ape Dembiwei ma nemaf anama Sabata i'ipipa maina maol andeande'ma pila basef penda'ana nemaf anama."

Nemaf anama Sabat esis Juda sapoma noma'wanai Jisas nanda' anona
aman lagel aonainai bo'ona
(Mt 12:9-14; Mk 3:1-6)

⁶Anona nemaf esis Juda sapoma noma'wanai Sabat nataga. Ea', Jisas nafe' nawis nomon ipat esis Juda sa'i basef sapeinai nape na'ipasa basef esis amam nematawa. Ea' anona aman nape nalomas, lagel da'isinai ananinai aona naga' nail. ⁷Amam mawalipasa mi'tuli Godi maloma anom Farisi ma'i mogolopa anona eafa meambaso'ma Jisasa anom basef

baso'maimi ma monda'mana basef. Ea' manda'ana naep di'inde'ana. Ma'i muti anan nonda' aman anama bo'ona nemaf anama Sabat o owa'? ⁸Ea' Jisas nogawa nomonas amamumi, na'ipa aman anama lagel aonainai na'i, "Ine' hafel nitu naep hiesi la'afena esis seatilina."

Ea' anan nohafel naitu.

⁹Ea' Jisas na'ipam na'i, "Ae' a'i ihali'ipa ma mi'uli ape'inai na'iam na'imama? Nemaf ana'e ape' monda' waf bu'unai o monda' waf aonai? Na'i ape' mi giambama epes ambal namunai napeis o mohas sogal'?"

¹⁰Ea' natologon tulif amam nematawa hiesi, na'ipa aman anama na'i, "Dowa lagel ine'inai usi'ina."

Ea' nando lagel nataga bo'ona wapoti'.

¹¹Ea' amam Farisi maloma amam mawalipasa mi'uli Godi opalef wandafum kwapete' endilisi ma anan. Ea' manda'ipama ma'i, "Afa' nambimb onda' maina Jisas?"

Jisas nandandepa alupumi ananiami 12-peleim

(Mt 10:1-4; Mk 3:13-19)

¹²Anona nemaf Jisas nandowasa' nafe' halafutagw nanda' betena God. Ea' owamb anama laona anan nape nanda' beten nafe' ea' lala. ¹³Aon natefi, anan nofala alupumi ananiami hiami mafi'i. Amam 12-peleim nandandepam Aposel. ¹⁴Anona Saimon, ea' Jisas nanda'mana agel wa'ana Pita. Ea' Andru, owalomana Saimoni. Ea' Jems naloma Jon, Filip naloma Bartolomyu, ¹⁵Matyu naloma Tomas ea' Jems nogalomana Alfiusi. Ea' Saimon anan epes hiesi Seloti'. ¹⁶Ea' Judas nogalomana Jemsi, naloma Judas Kariotinai, aman anama nawalapa Jisasa naumbih ananiami.

Jisas nanda' amam nematawa hiesi awes nanda'asi sataga bo'wes

(Mt 4:23-25)

¹⁷Ea' Jisas niniala naloma alupumi ananiami mafe' anagon bembel'agoma, do'ok esis alupisi hiesi ananisi safi'i sali' saituma. Ea' epes hiesi safi'i. Enis safi'i wambel hiagoma Judia ea' enis safi'i wambel biefina Tair naloma Saidon nape felefele'ma naoh, enis safi'i Jerusalem. ¹⁸Esis safi'i ma some' basef ananiami ma natofa awes nanda'asi. Ea' esis amam nematawa ambagof awami mahambombagasi safi'i, Jisas nanda'as bo'wes wapoti'. ¹⁹Pepel ananinai nafe' nanda' esis hiesi bo'wes. Ea' dei' esis hiesi sa'i sombale'efana.

Jisas na'ipasa waf sealifanai ea' seandanifelonai

(Mt 5:1-12)

²⁰Jisas nati amam alupumi ananiami na'ipam na'i,

- “Ipe' kwahupei otamba maim a'ipei, ipe' pawis ea' wambota Godi numafipa. Amama atom dei' ipe' pandanifel pape.
- ²¹ ^mIpe' epes nolomahipei, dei' pandanifel pape andeande'. Dei' main, anona nemaf ipe' pea' gwa'aimi elihipa endilisi. Ipe' epes opalef nimanima palef, dei' pandanifel pape andeande'. Dei' main, anona nemaf ipe' pandanifel pinda'iaf.
- ²² Ae' ataga epen endilisiwei. Nambimb enis epes siti ipe' pila ae', esis opalef aoma ipe' endilisi. Ea' sowa' alafugaha ipe' sese'epa agof awami endilisi si'i ipe' epes aopai sindaiwa'mepa sogalo'mepa.
- ²³ Nemaf anama esis sonda'epa na'ama, ipe' pandanifel pialemb etin. Dei' main, amamaga hiami bu'wami ipe'imi ma'oh heven ilif. Fowa' gani akupas bafapas asasisi sanda' amam profet aom na'ama etin.
- ²⁴ Ipe' otamba wiga maim hiamipei, ipe' pindumafuma ma amamaga awami nimanimi meatagamipei. Dei' main, ipe' dei' pefa'am ea' amamaga monda'epa pandanifelamami.
- ²⁵ Ipe' dei' pa' gwa'aimi elihipei, pindumafuma ma amamaga awami nimanimi meatagamipei. Dei' main, anona nemaf ipe' nolomehepa. Ipe' dei' panda'iafi, ipe' pindumafuma ma amamaga awami nimanimi meatagamepa. Dei' main, anona nemaf ipe' pelefa penda'aga endilisi.
- ²⁶ Ipe' dei' epes hiesi hi'alas safela agof ipe'mi sa'i ipe' bu'wipei, ipe' pindumafuma ma amamaga nimanimi lu'wami meatagamipei. Dei' main, fowa' akusas bafasas asasisi sa'ipam na'ama etina amam profet mambaso'mami ma'ipasa basef Godi. Sanda'mamam na'ama etin, safela agof amamumi.

Anom basefa ukup mimila epes isima naumbih
(Mt 5:38-48)

²⁷Ea' ipe' pame' basef ae'ami, ipe' ukup mimila naumbih ipe'isi, penda'masa waf bu'unai isima opalef aoma ipe'i. ²⁸Ipe' pihali' Goda nonda'mas waf bu'unai ma epes isima sanda'mepa waf aonai. Ea' penda' betena epes isima sanda'epa aopei. ²⁹I'i emi egelin nehepa aomb wa'ol, pendamboma nehepa wa'ol wapoti!. I'i emi egelin nefa'epa saket ipe'inai, ina pinda'imana, owa'. Pese'ana wapoti!. ³⁰I'i emi egefin nefalepama anom amamaga, ipe' pese'anam. Ea' i'i emi egefin nefa' amamaga ipe'imi, ipe' owa' pi'ipana mehupa negwamepam, owa'. ³¹Maina waf ipe' pa'i esis sanda'mepana ipe'i, ipe' penda'masana na'ama etin.

³²I'i ipe' ukup mimila epes isima ukup maimaila ipe' etipa, nambimb pefa' maim amamaga bu'wami ma waf anama? Owa'etin. Epes sanda' waf aonai esis sanda'ana na'ama etin. Ukup maimaila epes isima ukup

maimailasi. ³³I'i ipe' penda' waf bu'unai ma isima sanda' waf bu'unai atona ma ipe'i, nambimb emi nefela agof ipe'imi? Owa'etin. Epes isima sanda' waf aonai esis wapoti' sanda' waf na'amainai. ³⁴I'i ipe' pese'asa anom amamaga epes isima ipe' pegawa esis nambimb seagwamepami, anona nemaf emi nefela agof ipe'imi? Owa'etin. Epes sanda' waf aonai wapoti' sase'asa anom amamaga enis sanda' waf aonai, ma esis seatanima seafa'am na'ama etin mondagwama si'i sali' sase'asam. ³⁵Ea' ipe' ukup mila naumbih ipe'isi, penda'mas waf bu'unai esis pese'asa amamaga. Ipe' ina ata' pi'i anona nemaf esis sogwamepam, owa'. Ipe' penda'as na'ama anona nemaf God la'ifinai nape ilifi nese'epa amamaga lu'wami bu'wami ma pepe awasi ananipei. Dei' main, anan na'i uwahipis esis isima owa' seanifelonae saloma isima sanda' waf aonai. ³⁶Ahalomepa ipe'inai na'i uwahipis esis sanda' waf aonai. Ipe' penda'am na'ama etin si'i anan nati esis uwahipis.

Waf mowaloga enis epes si'i anona jas dembinai

(Mt 7:1-5)

³⁷Ipe' ina pewaloga enis epes si'i anona jas dembinai nawaloga basef kot lu'unai, owa'. Ama anona nemaf God ina nowalogepe, owa'. Ipe' ina pembaso'ma enis epes, owa'. Ama anona nemaf God ina nombaso'ma ipe' wapoti', owa'. Ipe' pekwaha waf aonai enis sanda'ma ipe'anai. Ama anona nemaf God nogwam nokwaha waf aonai ipe'inai. ³⁸Ipe' pese'asa amamaga enis epesa God nose'epa amamaga ipe'. Anona nemaf anan nose'epa amamaga hiami si'im mosaminiala ma ipe'. Ikwaf ipe' pease'asana enis epesi, ikwaf anama atona God nese'epana ipe'." ³⁹Ea' Jisas na'ipasa anom basef womun etin wapoti' na'i, "A'i enin epen naep mase'ani la'ifinama nihi'ambaman eaf enin epen naep mase'ani? Owa'etin. Atuwasi esis bias sondakolas dogwas sefe' sowala etin kwambiwag. ⁴⁰Epes sanda' skul etini ina sape dambes sikila' tisa asasinai, owa'. Esis sanda' skul sambefan ea', sotaga na'ama etin si'i tisa asasinai. ⁴¹Dei' maina ipe' pati usan sa'unai nape naep sahin owan ipe'isi, ea' ipe' owa' pegawa hapataf lu'unai nape naep ipe'imi? ⁴²Dei' maina ipe' ata' pa'ipa alupisi pa'i, 'Owalome, ae' a'i iwafamenana usan sa'unai nape naem ine'inai.' Ea' ine' hapataf lu'unai anama nape naep ine'imi. Ipe' malogof biamipei pambaso'mami. Ipe' ata' pili' pewafa hapataf lu'unai nape naep ipe'imi, ma piti andeande' pewafamenan usan sa'unai nape naep alupisi ipe'isi.

Lawag aonai nola gwa'aimi awami

(Mt 7:17-20, 12:33-35)

⁴³Lawag bu'unai ina nola gwa'aimi awami, owa'. Ea' na'ama etin lawag aonai ina nola gwa'aimi bu'wami, owa'. ⁴⁴Ape' mati gwa'aimi mailami,

mogawa lawah bu'wami awami. Ape' ina mola su'utip fik si'i ahip anona mandof higataunai, owa'. Ea' ina mola su'utip wainim anona mandof pipi'embim, amama wapoti' owa'. ⁴⁵Epes na'ama etin. Epes bu'wasi, esis ukup bu'wami mapeis ukup asasimi sawalapa waf bu'unai. Ea' epes awasi waf hianai aonai napeis ukup asasimi. Ea' sawalapa waf aonai atona. Dei' main, waf bu'unai aonai nape si'ina ukup asasimi, anama atona dei' malogof mawalapana nawisi ande'.

Waf biefina sala' ifagw

(Mt 7:24-27)

⁴⁶Dei' maina ipe' pa'i ae' Dembiwei, Dembiwei, ea' ipe' owa' pila malogel ae'anai? ⁴⁷Emi egafis sifi'mai ae' sieila malogel ae'anai, dei' ae' indila'wifa waf ananinai ma ipe' pegawana. ⁴⁸Epen inima si'i anona aman nala' ipati. Anan nandoma olalef mowala gani etap owin otamba ma'oma. Ea' nala' ipat netawa etap anama otambaiguma la'ifiguma. Ea' asaf lu'unai nalai, walemb nawisi lu'una embel kolo'walami mafe', ipat ina nandagwamba, owa'. Dei' main? Aman anama nanda'ana la'ifina. ⁴⁹Ea' emi egefin name' basef ae'ami owa' nilam, inima si'i anona aman nala' ipat falafunai. Anan nanda'ana nala'ana etin natoma etap atona ilif. Ea' anom nimeguf mafe' ea' walemb mawisi embel magwale'ana nowa aona hi'alana."

Jisas nanda' aman nanda'mana maol dembinai numafi amam soldiai bo'ona

(Mt 8:5-13)

7 ¹Jisas na'ipasa basef amama laumi esis amam nematawa seme'am ma hi'alam, ea' nafe' nataga anona wambel Kaperneam. ²Anona aman dembinai nape. Anan kepten numafi soldia hiami 100-peleim. Anona nanda' maola anani awes nanda'ana felefele'ma neaga'. Ea' kepten okom nainailana. ³Ea' name' basefa Jisas nasapa' anom agufumi Judai mafe' mofala Jisasa nifi'i nonda' aman anama bo'ona. ⁴Ea' mafe' matagama Jisas ma'ipana mehip ma'i, "Kepten anama aman bu'unai, andeande'ma ine' nigiamamana nenda' aman nanda' maolanani bo'ona. ⁵Dei' main, anan okom nainaila ape' Juda nala' ipat ape' ma'i basef mapeinai."

⁶Ea' Jisas nafe' nalomam nafe' nataga felefele'ma ipat ea', Kepten anama nasapa' anom alupumi mofa'ai basef ananimi mafi'i ma'ipa Jisas na'ama ma'i, "Dembinai, ine' nefe'o owa', hapaimi. Ae' ina aman bu'uwei ma ine' nefe'o niwis ipat ae'anai, owa'. ⁷⁻⁸Amama atom ae' wapoti' ina bo'owe ma efe'mago ine', owa'. Ine' ni'i etin, atuwasi anan bo'ona. Dei' main, ae' ape owina anom soldia dambami mumafi mase'e maol. Ea' ape ilifa anom soldia ae'ami imafiam. I'ipa anona i'i, 'Ine' fo'o', name'e nafe'. Ea' i'ipa anona i'i, 'Ine' fi'i', neme'e nafi'i. Ea' i'ipa anama agel a'anai

nanda'me maoli i'i, 'Ine' da'a maol anama', anan name'e nanda'ana. Ine' dembinai. Ea' awes anama atuwasi neme' basef ine'imi nefe'. Dei' ine' ni'i etin, ea' anan ambo'ona wapoti'."

⁹Jisas name' basef ananiami okom natanea ea' nandamboma na'ipa amam nematawa hiesi sagi'ma anani na'i, "Ae' a'ipipa, soldia dembinai anama anan ina ipe' Israelinai. Ea' dei' nembale'efa ae'. Ina anona aman Israelinai nembale'ef na'ama, owa'etin. Anan nikila' ipe' Israela nembale'efa ae' la'ifina."

¹⁰Ea' amam amama kepten nasapa'am mafi'i motanima mafe' ipat mati aman anama nanda' maola kepteni ambo'ona.

Jisas nafela enin so'uso'win nataga bo'wen wapoti'

¹¹Anom nimeguf mafe' ea', Jisas nafe' anona wambel Nain. Alupumi ananiami maloma enis amam nematawa hiesi safe' salomana. ¹²Anan nafe' felefele'ma uta sawis wambel anama, ea' nati enis sofa' enin so'uso'win naga'i safi'i sa'i sowan. So'uso'win inima mama'wan alifi'wi. Akwa'w kola enin etin, waulunama'w a' naga'. Ea' esis amam nematawa hiesi sape wambel anama safi'i salomai akwa'w. ¹³Dembina nati akwa'w, okom ananinai na'i uwahipi'w ea' na'ipakw na'i, "Ine' nelef owa'."

¹⁴Ea' anan nafe' felefele' nasa lagela bokis salanami. Ea' amam mofa'ai bokis amama maitu.

Ea' Jisas na'i, "Souso'win, ine' neme! Ae' a'ipina, ine' hafel."

¹⁵⁻¹⁶So'uso'win inima naga' ea'i nehafel nape na'i. Ea' Jisas naso'akwan mama'wan anani'wi. Na'ama esis umbamahas endilisi safela agel Godi sa'i, "Anona aman profet dembinai nataga ea' la'afena ape'. God nafi'i ma nigiamama ape' amam nematawa ananipai."

¹⁷Ea' basef amama ma maol Jisasi mafe'agen hi'alagon anama etap hiagoma Judia ea' anama hiagoma wapoti'.

Jon nasapa' alupumi biam mafe'ma Jisas

(Mt 11:2-19)

¹⁸Alupumi Joni ma'ipana amamaga amama pepel anama Jisas nanda'anai. Ea' Jon nofala alupumi biam ananiami ¹⁹nasapa'am mafe' mahali' Dembinai Jisas ma'i, "Ine' aman ma'wina nafi'i o ata' mope mohafa anona?"

²⁰Amam matagama Jisas ea' ma'i, "Jon napsi'as embeli nasapa' afa' biafa wafi'mai ine', anan na'i nogawa, 'Ine' aman ma'wina nafi'i o ata' mope mohafa anona?" "

²¹Nemaf anama atona Jisas nanda' amam nematawa awes naninani nanda'asi sataga bo'wes. Anan natofamasa ambagof awami mapeisi. Hiesi naep mase'asi nanda'masam mati andeande'.

²²Ea' Jisas nagwamama basef na'i, "Ipe' pitanima pefe' pi'ipa Jona amamaga amama dei' patolomi pami'ami. Isima naep mase'asi sati

wapoti', bo'wagah awamisi safe' andeande'. Isima awes aonai nanda' alop asasinai nambu'wi ambo'wes, aligah mase'asi same' basef andeande', saga'i sotanima sohafel wapoti' ea' kwahusi same' basef bu'wami Godi. ²³Emi egafis ukup etifim sombale'efa ae', isima sondanifel endilisi."

²⁴Amam biam mofa'ai basef Joni motanima mafe'. Ea' Jisas na'ipa esis amam nematawa ma Jon na'i, "Fowa' ipe' pafe' anona etap fatauguma wafiguma epes a'agoma pafe' pati main? Pafe'ma pati anona aman ina nembale'ef andeande' si'i anona elifita uf nefa'ana nanda' felifal? Owa'etin. ²⁵Ea' pafe' pati main? Pafe' pati anona aman nala luwaguf bu'wami atumi? Owa'etin. Epes isima sotala amamaga bu'wami atumi ma moni hianai sala luwguf bu'wami atumi, epes isima sape ifagw bu'wami king dambami atom mapeimi. ²⁶Dei' ipe' pafe' pati main? Pafe' pati anona aman profet? Endilisi ae' a'ipipa, anan profet dembinai nikila' profet hiami hi'alam. ²⁷Aman anama ea' ma'una anan atona si'i basef mape Baibeli na'iana God fowa' gani na'iam na'i,

'Ine' neme', anona nemaf ae' esapa' aman nofa' basef Ae'ami nili' nefe' nendondombamena eaf ine'inai.'

²⁸Ae' a'ipipa endilisi. Jon dembinai nikila' amam hiami ma etap anae'. Ea' emi egafis dei' siowis wambota Godi numafias, isima dembesi sikila' Jon. Ea' emi egafis agof a'asi ma wambota Godi, esis wapoti' dei' sape dembesi sikila'ana."

²⁹Ea' amam mofa' takisi maloma epes hiesi same' basef Jisasi esis sa'i, "A'e, waf Godi andeande'."

Dei' main, Jon atona napisi'asi. ³⁰Ea' amam Farisi maloma amam mawalipasa mi'uli Godi ina mofa' baptaisa Jon, owa'. Amam manda'am na'ama dei' mandamboma mowa' alafugaha eaf bu'unai God nihi'ambamanai.

³¹Ea' Jisas na'i, "Dei' ae' indili'wifa ipe' amam nematawa dei' pape etap anae'i i'imama? Ae' i'ipipa maim basef womun etina pegawa waf ipe'inai?" ³²Ipe' pape si'i enis awasi sandakolas sapoma sofala enis awasi sa'i,

'Ape' mandanifel mufapula batagwa ipe', ea' ipe' ina palemb. Ape' manda' awalef malef matamea, ea' ipe' ina palef.'

³³Aman anama Jon napisi'as embeli nafi'i, ina na' gwa'aimi embel wainim, owa'. Ea' pa'i ambal aonai napaina. ³⁴Dei' ae' ataga epen endilisiwei afi'i a' gwa'aimi maloma embel wain, ea' patolowe pa'i, 'Piti anan aman na' gwa'aimi hiami, na' embel wain hianai endilisi. Anan alupunai ma amam mefa' takisi maloma amam manda' waf aonai!' ³⁵Ea' emi egafis sila gawa bu'unai Godi, esis isima sihi'ambapa gawa anama Godi bu'unai endilisi ma sombale'efana!"

Ano'w nemata'w kwanda' waf aonai kwakolo' sanda bo'wagah Jisasi

³⁶Anona aman Farisi nahali' Jisasa nifi'i nea' gwa'aimi nolomana. Ea' nafe' ipat anama Farisi nalomana ma' gwa'aimi. ³⁷Ea' ano'w nemata'w kwape taun anama

kwanda' waf aonai. Akwa'w kwame' basefa Jisas na' gwa'aimi ipat anama. Ea' kofa' anona botol bu'unai si'i owap embel sanda alogw bu'wami ma'anai kwafi'i. ³⁸Ea' kwawis kwafe' kwaitu alafuga Jisasi felefele'ma bo'wagah ananiami kwalef. Ea' embif akwa'umi maluwi mowala bo'wagah Jisasi ea' kwanda' auf balagaimi kopati' embif akwa'umi, kwape kwasisi' bo'wagah ananiami kwanda' lotumana. Ea' kwakolo' sanda anama bo'wagah ananiami.

³⁹Ea' Farisi anama nahali' Jisas nafi'i nati amama, nomonas ananiami matamea na'i, "I'i aman anama endilisi anan profet, anan nogawa nemata'w akwama kwahapila anani, nogawa waf akwa'unai. Dei' main? Akwa'w kwanda' waf aonai."

⁴⁰Ea' Jisas nagwamana nomonas amama Farisi anama na'ipana na'i, "Saimon, ae' a'i i'ipina anom basef."

Ea' Saimon na'i, "Tisa, ine' walapa basef ine'imi."

⁴¹Ea' Jisas na'i, "Amam biam anona wiaf napoma amoma anona aman otamba hiamunai. Anona nowaola wiafa 100 kina ea' anona 10 kina atona. ⁴²Amam biam ina la'ifima meagwa wiaf anama, owa'. Ea' dei' aman anama nakwahomoma wiaf anama amam biam. Ea' amam biam nambimb emi okom ninila anan endilisi nikila' anona?"

⁴³Ea' Saimon nagwa basef na'ama na'i, "Ae' a'i aman anama nase'ana wiaf lu'unai 100 kinai."

Ea' Jisas na'i, "Ine' nawalogam andeande'."

⁴⁴Ea' nandamboma nati nemata'w akwama na'ipa Saimon na'i, "Ine' niti nemata'w akwama? Ae' afi'i awis ipat ine'inai. Ine' owa' nase'e embel esa'opa bo'wagah ae'ami, owa'etin. Ea' nemata'w akwama kwasa'opa bo'wagah ae'ami ma embif maluwi naep akwa'umi. Ea' kopati'am balaga akwa'unai. ⁴⁵Ine' owa' niesisi' ae'. Ea' do'ok ae' afi'i awis etin, akwa'w kwape kwasisi' bo'wagah ae'ami la'ela'ef kwape kwafi'i kwataga dei'. ⁴⁶Ine' owa' neanda' wel nekolo'am ma balaga ae'anai. Ea' akwa'w kwakolo'am bo'wagah ae'ami embel sanda bu'unai. ⁴⁷Na'ama dei' ae' a'ipina. Akwa'w okom nainaila ae' endilisi. Waf anama okom nainaila ae'anai nihi'ambapa waf aonai akwa'unai hianai ae' akwahomakwana hi'alana. Emi epen God nokwahoman waf aonai ananinai kwasala'una, epen inima enin nambimb ina okom ninila God endilisi."

⁴⁸Ea' Jisas na'ipakw na'i, "Ae' akwahomena waf aonai ine'inai."

⁴⁹Ea' amam mape ma' gwa'aimi malumanai mape ukup matamea mandalipama mali, "Aman anama emi egafuna na'i la'ifina ma nokwaha waf aonai?"

⁵⁰Ea' Jisas na'ipa nemata'w akwama na'i, "Ine' nembale'efa ae' la'ifiwei. Amama atom God nakwahomena waf aonai ine'inai nofa'ena netanimani. Ine' fo'o, ea' opaf ine'inai nope awanena."

Anowa nematawa wafe' waila Jisas

8 ¹Anom nimeguf mafe' ea', Jisas nafe' wambel hiagoma na'ipasa basef bu'wami amam nematawa sape taun anama wambel

hiagomai. Na'ipasa basef amama bu'wami ma nambimb siowis wambota Godi numafias. Alupumi ananiami 12-peleim maloma ²anowa nematawa safe' salomana. Nematawa awama fowa' awes nanda'awa Jisas natofamawa ambagof awami nanda'awa bo'owa. Ano'w Maria sofala'w sa'i Makdalai'wi, fowa' natofama'wa ambagof awami 7-peleim mapai'wi. ³Ea' ano'w Joana nemata'w anona aman numafi ipat Heroti, agel ananinai Susa. Ea' ano'w Susana kwaloma anowa nematawa hiawai wapoti' wafe' walomana. Awo wagiambama anan naloma alupumi ananiami ma otamba gwa'aimi maim awaumi.

Aman nowaha nalelef gwa'aimi aof

(Mt 13:1-9; Mk 4:1-9)

⁴Esis amam nematawa hiesi sape safi'i taun hiagoma, safi'i sandakolas safi'mai Jisas. Ea' anan nase'asa basef hiami womun etin na'ama na'i, ⁵“Anona aman nafe' nowaha olelemb witimi si'i rais anona aof. Nowahom nafe', anom mowa eaf safe'ma. Enis epes safe' safofosom ea' amiguf mufia' mafi'i ma'am. ⁶Ea' anom mowa anagon otambaiguma. Ea' mataga ea' etap owa' embelina. Masilimb ina mowala ea' alim. ⁷Anom mowala la'afena mandelef wandafumi mataga malomam maofenia wit, ea' amam ina mail mola gwa'aimi, owa'. ⁸Ea' anom mowa mafe' etap bu'unai ea' mataga malo mail mola gwa'aimi. Anom mataga malo mail mola gwa'aimi hiami 100-peleim.”

Jisas na'iam na'ama ma ea', na'ipas mehip na'i, “Ipe' aligah magalipei, peme'am andeande' ukup mopomam.”

Jisas na'ipasa basef amama ofagema na'ipasam womun etin

(Mt 13:10-17; Mk 4:10-12)

⁹Ea' amam alupumi Jisasi mahali'anama basef ofagema womun etini.

¹⁰Ea' nagwamama basef na'i,

“God nihi'ambepa basef ofagema mape mandambahi'i ma ipe' piowis wambota Ananinai numafipa. Ea' enis epes owa'. God ina nihi'ambas basef amama ofagema, owa'. Ama esis 'ina some' basef amama alihim, owa'. Some' basef womun etin nambimb sotologon, ea' ina siti anom amamaga, owa'. Esis some' basef, ea' ina sogawa ofagema, owa'.”

Basef ofagema ma olelemb gwa'aimi

(Mt 13:18-23; Mk 4:13-20)

¹¹Basef womun etini ofagema na'ama. Olelemb amama si'i basef Godi.

¹²Anom mowa eafi amama si'i epes isima same' basef, ea' Satan nafi'i nofa' basef amama God nase'esam mape opalef اساسimi ma esis ina sembale'efa God nofa'as seatanimani, owa'. ¹³Anom mowa mafe' anagon

otambaiguma, amama si'i enis epes same' basef Godi ea' sofa'am mehip sandanifelamam. Ea' isima si'i masilimb ina mondala mowala etap owini. Esis sembale'am nogota bandana etin ea', Satan nagwambas sanda' waf aonai ea' satanima sakwaha sombale'efa God. ¹⁴ Anom mowala mandelef wandafumi la'afen, amama si'i epes isima same' basef sailif safe' ea', anom nimanimi mamumami maloma moni main naloma anom danifel maim etapami, amamaga amama mase'ala esis. Ea' ina sombale'efa God sanda' waf bu'unai la'ifis, owa'. ¹⁵ Ea' anom mowa etap bu'unai, si'i enis same' basef bu'wami sembale'am la'ifis. Opalef asasimi bo'om same' basef Godi sailam. Esis sape la'ifis sanda' waf bu'unai la'ela'ef, isima sape si'i oleleb mataga malo mail mola gwa'aimi andeande'i.

Nogwahis mafili sasapa'am sambahe'am nomon ifagw
(*Mk 4:21-25*)

¹⁶ Epes ina sakata lamifah sopalo'am ma'oh owina baket o balata owina, owa'. Esis sawamonam balatagw ilifa epes isima suwisi siti howalagon. ¹⁷ Amamaga hiami hi'alam mape mandambahi'i anona nemaf motaga alihiguma hiesi sotolom sogawam. Ea' amamaga hiami ata' sambaho'am ma'ihhi, anona nemaf motaga mondawalap, hiesi sogawam. ¹⁸ Ea' ipe' pindumafuma peme' basef andeande'. Emi egafis sembale'efa basef Godi, nambimb God nowatanimasam wapoti'. Ea' isima owa' sembale'ami, anona nemaf basef kwawie'im amama esis sombale'am, God nondalombasam esis sopen etin.”

Jisas mama'wana kwaloma owapana ananimi
(*Mt 12:46-50; Mk 3:31-35*)

¹⁹ Nemaf anama mama'wana Jisasi kwao'wa owapana safi'mai anan. Amam nematawa hiesi sandakolasi sili'akwana ea' esis ina safe' felefele'ma anan, owa'. ²⁰ Ea' enis epes sape salomanai sa'ipana sa'i, “Ine' neme', mama'wena ine'ikwi kwaloma owapena ine'imi safi'i saitu ande', sa'i solomena si'i.”

²¹ Ea' nagwamasa basef isima hiesi na'ipas na'i, “Esis amam nematawa isima some' basef Godi sailam, isima mama'we sahin owan ae'asi.”

Jisas na'ipa uf lu'unai faso'mana
(*Mt 8:23-27; Mk 4:35-41*)

²² Anona nemaf Jisas nao'wa alupumi ananimi malata anona bot. Ea' anan na'ipam na'i, “Afa' ofe' anama walemb batupa'manai gani fisana.” Ea' amam malata bot mafe'. ²³ Bot anama nafe' etin, Jisas ambeh mahana na'oh nolola.

Ea' anona uf lu'unai naluwi walemb batupa'manai anama, embel kolo'walam mawis bot nomon na'i si'inama embel felefele'ma mowala.

²⁴Ea' mafe' minimbalana ma'ipana ma'i, "Dembina, afa' wa'i ahegililafa."

Ea' anan nohafel ninifala ufi embel. Ea' uf faso'mana, embel ina ata' manda' fepo, owa'. Tol motah.

²⁵Ea' Jisas na'ipam na'i, "Bale'ef ipe'inai nape eti?"

Amam umbamaham ukup matamea. Ea' manda'ipama ma'i, "Anan emi egafuna? Na'ipa uf naloma embel mame'ana mowala."

Jisas nanda' anona aman ambagof awami mapeinai bo'ona

(Mt 8:28-34; Mk 5:1-20)

²⁶Ea' Jisas naloma alupumi mafe' mataga anagon esis Gerasa sapoma, anama nape wa'ol walemb batupa'manai fisana etap hiagoma Galili. ²⁷Ea' Jisas nakwaha bot nisila' nafe' akata, anona aman nape taun anamai nafi'mai anan. Anom ambagof awami mapeinai. Anan ina nowaho' anona lowaf nape andeande' anona ipat, owa'etin. Fowa' anan aona nape la'ela'ef nafi'i nafi'i nataga dei'. Nape nafe' hi'agilif atom. ²⁸⁻²⁹Anona ambal aonai nahapilana tatala'ina. Esis sombalo'ana sumafiana nimeguf hiami sanda' seni hankap sowa'ana lagof bo'wagah, owa'. Nahape'am etin. Ea' ambal anama aonai nofa'ana nafe' anama epes a'agoma.

Aman anama nafi'i nati Jisas, nindiwa nembawa notawa felefele'ma bo'wagah ananiami. Ea' Jisas na'ipana mehipe na'i, "Ine' ambal aonai, nekwaha aman anama ine' fo'o."

Ea' nofalana mehipe endilisi na'i, "Jisas, ine' Nogalomana dembinai God nape ilif endilisi, ine' na'i nenda' maina ae'? Ae' a'ipina mehipe, ine' owa' nese'e nimaniami ae'."

³⁰Ea', Jisas nahali'ana na'i, "Agel ine'inai emi?" Ea' anan na'i, "Agel ae'inai ambagof hiami."

Dei' main, ambagof awami hiami mafe' mawisana.

³¹Ea' ambagof amama mofala Jisas mehipe timbitambel ma'i, "Ina netofafa ofe' owala hul launai owa' nowala neatambili, owa'."

³²Ea' anom bogof hiami maitu ma' gwa'aimi anona domota felefele'. Ea' ambagof awami ma'ipa Jisas mehipe ma'i, "Ine' ni'i a'e ma afa' ofe' uwis bogof mamuma."

Ea' na'i aho'mam. ³³Ambagof awami amama makwaha aman anama mawisi mafe' mawisa bogof. Ea' bogof mamuma hiami masagih mafe' mehipe mowala awagoma tata, mowala embel walemb batupa'manai afum hi'alam.

³⁴Ea' amam mumafi bogofi mati amamaga matagama bogof, masagih mafe' ma'ipasa amamaga amama amam matulumu amam nematawa sape tauni saloma sail aof felefele'i wapoti'. ³⁵Ea' esis safe'ma sieti amamaga amama. Safi'mai Jisas sati aman anama fowa' ambagof awami mapeinai dei' makwahona ea' ambo'ona okom bu'unai napaina andeande' nowaho'

lowaf tol nape felefele!ma bo'wagah Jisasi. Amam nematawa hiesi satolona ea' esis umbamahas. ³⁶Ea' epes isima sati amamaga amama, sa'ipas sa'i waf Jisas nanda'ana aman anama fowa' ambagof awami mapeinai dei' ambo'ona wapoti'. ³⁷Ea' epes hiesi sape anama Gerasai hiesi umbamahas endilisi. Ea' sa'ipa Jisas sa'i, "Ine' nekwaha ape' fo'o."

Ea' Jisas nalata bot anama notanima nafe'.

³⁸Aman anama fowa' ambagof awami mapeinai nahali'ana mehip na'i, "Ae' a'i efe' elomena."

Ea' Jisas nasapa'ana na'i, ³⁹"Ine' tanima fo'o wambel ine'inai, ni'ipasa amamaga hiami God nanda' maina ine'ami."

Ea' aman anama nafe' nawalapa basefa amamaga amama ma amam nematawa hiesi sape taun anamai amamaga Jisas nanda'manam anani.

Jisas nanda' Jairus nogamana kwaga'i kohafel wapoti' ea' nanda' ano'w nemata' awes lu'unai nanda'akwi ambo'okw
(Mt 9:18-26; Mk 5:21-43)

⁴⁰Jisas notanima nafi'i, enis amam nematawa hiesi sape sohafana. Ea' sanda'mana nemaf bu'unai sandanifela ma nafi'i. ⁴¹⁻⁴²Ea' anona aman nataga agilinama Jairus. Anan numafi ipat esis Juda sa'i basef sapeinai. Nogamana nemata'w atoto'w afagof akwa'umi 12-peleim felefele' kwa'i koga'. Ea' nindiwa nembawa notawa felefele'ma bo'wagah Jisasi, nahali'ana mehip na'i, "Ine' nifi'i ipat ae'anai."

Ea' Jisas nafe' esis amam nematawa hiesi safe' sanda' gwagwasi'ma etin saitu sindiwapana. ⁴³Anan ata' nafe' etin, ano'w nemata'w kwafi'mai anan. Awes lu'unai nanda'akwi kwape gamba afagof 12-peleim. Otamba akwa'uimi hi'alama kwatal dokta hiami. Owa' anom la'ifima monda'akw kotaga bo'okwe, owa'etin. ⁴⁴Ea' kwafe' felefele'ma alafuga ananinai, kwasa lagela saket Jisasi da'malifinama. Kwanda'am na'ama, mehip etin esimbel pele'atam, ea' ina ata' maluwi wapoti', owa'etin.

⁴⁵Ea' Jisas nahali'as na'i, "Emi nasa lagela ae'?"

Ea' esis hiesi sa'i etin etin sa'i, "Ae' owa'."

Ea' Pita na'i, "Dembina, amam nematawa isima hiesi saitua sanda' gwagwasi'ma etin salomafa." ⁴⁶Ea' Jisas na'ipas na'i, "Ae' ame' pepel ae'anai nakwahowe nafe'ma nonda' enin epen bo'wen. Ae' egawa enin epen nasa lagel alop ae'anai."

⁴⁷Ea' nemata'w akwama kogawa akwa'w ina atuwasi kondambaho'w ma anan, owa'. Na'ama akwa'w umbamaha'w kwafi'i kwindiwa nembawa kotawa etap felefele'ma naep amam nematawa hiesi. Ea' kwawalapa basef ofagema akwa'umi ma dei' kwasa lagela anan ea' ambo'okw. Ea' kwa'i, "Awes ae'anai ahi'alana owa'etin."

⁴⁸Ea' Jisas na'ipakw na'i, "Nogame, dei' ine' nembale'efa ae' la'ifiwei. Amama atom dei' anda'ena bo'wena. Ine' fo'o opaf ine'inai nope awanena."

⁴⁹Anan ata' na'i etin, anona aman nakwaha ipat Jairusi nafli' na'ipa Jairus na'ama na'i, "Nogamena ine'ikwi kwaga' ea'. Amama atom dei' ina nenda' Dembinai Tisa nofo'o ekep pehana, owa', hapainai." ⁵⁰Ea' Jisas name'as na'ipa Jairus na'i, "Ina umbamohena, owa'. Nembale'efa ae' la'ifiwei, ama atuwasi nogamena ine'ikwi kohafel wapoti'."

⁵¹⁻⁵²Ea' Jisas nafe' nataga ipat Jairusi ea' ina na'i a'e ma amam nematawa hiesi suwis ipat anama, owa'. Nao'wa Pita naloma Jon Jems atom maloma mama'wakw ahaloma'w etis safe' sawis salomana. Esis amam nematawa hiesi sape ande' salef mehup sa'i sapoma'w.

Ea' Jisas na'ipas na'i, "Ipe' ina pelef, owa'. Tol pepe. Akwa'w ina kwaga' endilisi, owa'. Kwa'oh etin."

⁵³Ea' esis sanda'iafana kwapete'. Esis sogawa akwa'w kwaga' endilisi.

⁵⁴Ea' Jisas nahapila lagel akwa'unai nofala'w na'i, "Sa'ukwi, ine' hafel."

⁵⁵Ea' ambal akwa'unai notanima nafli' nawisa'w wapoti' kohafel mehup. Ea' Jisas na'ipa esis mamasa'w na'i, "Ipe' so'akwa anom gwa'aimi."

⁵⁶Ea' sati amama, gegelalasis endilisi nomonas matamea.

Ea' Jisas na'ipas mehupa siela basef ananiami na'i, "Ipe' ina pi'ipa enin epena amamaga amama, owa'."

Jisas nase'ama maol alupumi ananiami 12-peleim nasapa'am mafe'

(Mt 10:5-15; Mk 6:7-13)

9 ¹Nemaf anama Jisas nofalai alupumi 12-peleim ananiami mandakolas mafi' nase'am agof lu'wami nanda'am la'ifima meatofa ambagof hiami awami ea' monda' hiesi awes hianai naninani nanda'asi sataga bo'wes. ²Ea' nasapa'am mafe' ma'ipasa basefa epes siowis wambota Godi numafias ea' manda' epes awes nanda'asi sataga bo'wes.

³Ea' anan na'ipam na'i, "Ipe' ina pefa' anom amamaga bandefah isalef gwa'aimi moni, owa', hapaimi. Ipe' ina pefa' siogw biagw atogw, owa'. Pefa' atona etin mondandaepa. ⁴I'i pefe' piowis anona ipat, ipe' pepe ipat anama atona. Ea' pekwaha wambel anama pefe'. ⁵I'i esis owa' sofa'epa pefe' ifagw اساسimi, ipe' pekwaha wambel anama pindila'ma usas etap mail bo'wagah ipe'imi ma esis sitilipa sogawa waf aonai esis sanda'anai ofagena اساسinai atona."

⁶Ea' alupumi Jisasi makwaha anama mapoma mafe' wambel anama hiagoma ma'ipasa basef bu'wami Godi. Ea' magiambama epes awes nanda'asi sape wambel hiagomai manda'as bo'wes wapoti'.

Herot name' basefa Jisas

(Mt 14:1-2; Mk 6:14-16)

⁷Gavman dembinai king Herot numafi etap hiagoma Galili name' basefa amamaga amama hiami mataga, ea' ina nogawam andeande' ea' nomonas matamea mafe'. Dei' main, enis epes sa'i, "Jon notanima nohafel hi'lagif wapoti!'"

⁸Ea' enis sa'i anom basefa Elaija profet fowa'inai sa'i, "Anan nohafel wapoti!"

Ea' enis sa'i, "Anona aman profet fowa'inai notanima nohafel wapoti!"

⁹Ea' Herot na'i, "Jon ae' atopa'mana. Ea' aman anama ame' basefanai, anan emi egafuna?"

Ea' nape la'ela'ef na'i niti Jisas.

Jisas nase'asa gwa'aimi epes hiesi 5,000-peleis

(Mt 14:13-21; Mk 6:30-44; Jo 6:1-13)

¹⁰Aposel alupumi Jisasi motanima mafi'i ma'ipa Jisasa amamaga maol amam manda'ana. Ea' anan nao'wam makwaha enis epes, amam atom mafe' anona taun Betsaida. ¹¹Ea', esis amam nematawa hiesi sogawa anama napoma sagi'mana safe'. Safi'mai anan, nanda'mas nemaf bu'unai nandanifel ma esis safi'i. Ea' nawalipasa basefa epes siowis wambota Godi numafias. Ea' nanda' epes awes nanda'asi sataga bo'wes.

¹²Wambomota felefele'ma owamb alupumi ananiami 12-peleim mafi'i ma'ipana ma'i, "Ine' nesapa'as sofo'o wambel aof sape felefele'i ma sogolopa gwa'aimi sogolopa sea'oma. Dei' main, anae' afa' wapoma wafiguma epes a'agoma."

¹³Ea' Jisas nagwamam na'ipam na'i, "Ipe' etipa pese'as gwa'aimi."

Ea' amam ma'i, "Afa' gwa'aimi owa' hiame. Bret lagel wa'ana atona maloma agof biam ea' amama atom ma'oh. Ea' ine' na'i afa' ofe' utalai gwa'aimi ma amam nematawa isima hiesi?"

¹⁴Amam atom hiami 5,000-peleim mape.

Ea' Jisas na'ipa alupumi ananiami na'i, "Ipe' pi'ipa esis amam nematawa sope sefe' oto otowa sotagama wambotagw 50-peleis etis."

¹⁵Ea' manda' amam nematawa hiesi sape. ¹⁶Ea' Jisas nafela bret anama lagel wa'ana atona naloma agof biam, naniga nati heven ilif nanifela God. Ea' nawalana nasol alupumi ananiami maso' esis amam nematawa hiesi hi'alas. ¹⁷Sa'am elihis dondo', alupumi ananiami matatama tukwakwaniami ma'ihhi maolo'wam holalef lu'wami 12-peleim si'im endilisi.

Pita nawalapa basefa Jisas na'i anan Dembinai Krai,

God nandandepana nasapa'ana nafi'i

(Mt 16:13-19; Mk 8:27-29)

¹⁸Anona nemaf Jisas atotona nanda' beten, alupumi ananiami mape malomana nahali'am na'i, "Esis amam nematawa sa'i ae' aman emi egafuwi?"

¹⁹Ea' amam magwa basef na'ama ma'i, "Enis sa'i ine' Jon aman napsi'as embeli. Ea' enis sa'i ine' anona profet fowa'inai netanima nehafel wapoti', ea' enis sa'i ine' Elaija."

²⁰Ea' nahali'am na'i, "Dei' ipe' pa'i Ae' emi egafuwi?"

Ea' Pita nagwa basef na'i, "Ine' Kraiss, God nandandepena nasapa'ena nafi'i."

Jisas na'i anan nambimb noga' notanima nohafel wapoti'

(Mt 16:20-28; Mk 8:30-9:1)

²¹Ea' Jisas na'ipam mehip na'i amam ina mi'ipasa basef amama enis epes mi'i anan Kraiss, owa'. ²²Ea' na'i, "Ae' ataga epen endilisiwei nambimb efa' nimanimi lu'wami ma anom agufumi dambami moloma anom dambami pris maloma anom mawalipasa mi'uli Godi nambimb mowa' alafugaha ae', mohe ega'. Ama nimeguf biam hi'ilama anona neafe'ma wanomi, God nefele etanima ehafel wapoti'."

²³Ea' na'ipa alupumi ananiami na'i, "Ae' efa' nimanimi anda' maol Godi sehe ega' lawag usi'inai tu'wanainai. Emi egafis si'i sila Ae', esis senda'am na'ama etin si'i Ae' la'ela'ef nimeguf danda ma sieili. Ea' sesambala ukup asasimi ma maina maol esis sa'i seanda'anai. ²⁴Dei' main, emi egafis ukup mopoma ambagof asasimi atom, si'i sihapilam tatala'im, anona nemaf ambagof asasimi higililam. Ea' emi egafis ukup mopoma Ae' ma sesambala ambagof asasimi etap anae', anona nemaf ambagof asasimi God nofa'ami sotanimani sope andeande' la'ela'ef hihif. ²⁵I'i emi egefis senda' maol naninani ma sefa' gwa'aimi hiahaom amamaga hiami etapami atom higilialami, esis wapoti' awes higililas selomam. Dei' amamaga amama nambimb mihiambamas mi'imama? Owa'etin. ²⁶Ae' ataga epen endilisiwei. I'i emi egafis ambagof aoma Ae' sondafa'me eloma basef Ae'ami, Ae' wapoti' ambal aona epes isima endafa'mas nemaf anama Ae' ifi'i eloma amamaga bu'wami mafifili Ae'ami, elomai mafifili howalagon Godi maloma amam ensel Godi wapoti'. ²⁷Ae' a'ipipa endilisi, enipa paitu na'ae nambimb ina pega' ulal, ata' owa'. Enipa nambimb piti epes siowis wambota Godi numafias."

Alop Jisasi nataga naloma howalagon lu'unai nandati na'ana

(Mt 17:1-13; Mk 9:2-13)

²⁸Jisas na'ipasa basef amama ma ea', nimeguf amama 8-peleim mafe'ma ea', anan nao'wa Pita naloma Jems naloma Jon, nao'wam mondowasa' anona halaf launai ma nonda' beten. ²⁹Anan nape nanda' beten etin, amaga ananinai nataga nandati na'ana, ea' luwaguf nalami mataga afitim endilisi howalagon. ³⁰⁻³¹Ea' amam biam fowa'imi Moses naloma Elaija mataga maloma nafifili pepel ilifanai ea' maitu ma'i malomana. Amam ma'i ma nambimb Jisas nila okom Godi ma nokwaha etap anae' noga' gani Jerusalem. ³²Pita naloma alupumi biam ananiami amam naep nimanim endilisi ma'i mo'oh etin. Ea' mohafel mati nafifili Jisasi maloma amam amama biam maitu malomana.

³³Amam biam ma'i mokwaha Jisas mefe', ea' Pita na'ipana na'i, "Dembinai, afa' wape na'ae fafas. Afa' ola' anom aolah wanom mondandaepa. Ine' anona, Moses anona, Elaija anona."

Pita ina nogawa andeande'ma na'i basef amama, owa'. ³⁴Anan ata' na'i basef etin, anom ilagw maofenia amam ea' umbamaham.

³⁵Ea' anona malogel na'i natagai ilagw nomon na'i, "Anama anan Nogalome ae'anai. Ae' andandepana ea'. Ipe' peme' basef ananimi."

³⁶Malogel anama na'i ea', amam mati Jisas atona naitu nalomam. Ea' amam malogof maso', ina ma'ipa enis epesa amamaga amama matulumi, owa'.

Jisas natofa ambal aonai nape anona aman sa'unai ambo'ona

(Mt 17:14-21; Mk 9:14-29)

³⁷Naman wefilu amam makwaha halaf anama makini', ea' enis amam nematawa hiesi safi'mai Jisas eaf. ³⁸Anona aman naitu la'afena esis na'i, "Dembina, ae' ahali'ina mehipe a'i, ine' niti nogalome ae'anai uwahipina. Ea' anan atotona. ³⁹Anona ambal aonai nahapilana la'ifina ea' na'i mehipe endilisi. Ea' naolana kwapete' endilisi, ifat nataga sisih malogel ananinai. Ambal anama nahambombaga alop ananinai endilisi, ea' ina nakwahona, owa'. Napaina la'ela'ef. ⁴⁰Ea' ae' dei' ahali' alupumi ine'imi ma motofa ambal anama aonai nefe'. Ea' amam ina la'ifim."

⁴¹Ea' Jisas nagwamama basef na'ama na'i, "Ipe' amam nematawa owa' pembale'efa Ae'. Ea' opalef ipe'imi owa' mope andeande'. Nimeguf ma'um ae' ata' epe elomepa wapoti' ma efa' nimanimi ipe'imi? Ipe' fa'an pifi'mai Ae'."

⁴²Nogalomana ata' nafi' etin, ambal anama aonai naolana nafe' nowa etap nakoto'ana kwapete' endilisi. Ea' Jisas ninifala ambal aonai nanda' aman anama so'uso'win bo'ona ea' nase'anan notanima nafe'ma ahalomana ananinai. ⁴³Amama atom dei' amam nematawa hiesi sati pepel lu'unai Godi gegelalasis kwapete' endilisi.

Jisas na'iam bifa nambimb sahana noga'

(Mt 17:22-23; Mk 9:30-32)

Esis ata' nomonas matamea mafe'ma etina amamaga amama Jisas nanda'ami. Ea' na'ipa alupumi ananimi na'ama na'i, ⁴⁴"Ipe' pembe' aligah andeande'ma basef dei' ae' a'ipipami. Ae' ataga epen endilisiwei nambimb felefele' anona aman nose'asa ae' efe'ma lagof amam naumbih ae'ami."

⁴⁵Alupumi Ananimi mame' basef amama ea' ina mogawa ofagema, owa'. Dei' main, mandambaho'ma amam. Ea' amam umbamahama meahali'ana ma basef amama ofagema.

Emi nape dembinai?

(Mt 18:1-5; Mk 9:33-37)

⁴⁶Ea' alupumi Jisasi mandahihianamam ma'i emi nepe dembinai amamunai. ⁴⁷Ea' Jisas nogawa nomonas amama mape opalef amamumi,

ea' nasa'mai enin sa'usaw'in nafi'i naitu nalomana. ⁴⁸Ea' na'ipam na'i, "Emi egafis sese' opalefa sigiambama enin sa'usa'win si'i ini'i ma ukup asasimi mopoma Ae', esis sase'e opalef Ae' wapoti' sagiambame. Ea' emi egafis sagiambama Ae'i, esis saso' opalef Anan nasapa'e afi'i wapoti'. Dei' main? Emi egafis sepe agof a'asi la'afena ipe' hipei, esis sape dembesi sali'ma ipe!'."

Epen owa' nofala ipe' naumbih, enin alupunai ipe'inai

(Mk 9:38-40)

⁴⁹Ea' Jon nagwamana basef na'ama na'i, "Dembinai, afa' wati anona aman natofa ambagof awami ma agel ine'inai. Anan ina nagi'mafa. Ea' dei' wati watalagamana."

⁵⁰Ea' Jisas na'ipana na'i, "Ipe' ina petalagamana, owa'. Dei' main? Emi egafin ina naumbih ipe'ini, inima alupunai ipe'inai."

Enis Samaria sili'akwa wambel sandaiwa'ma Jisas

⁵¹Nogota God na'i nofa' Jisas nolata heven nafi'i felefele', ea' Jisas okom la'ifim na'i nefe' Jerusalem. ⁵²Ea' nasapa' anom amam mali' mofa' basef ananiami mafe'. Mafe' mawis anona wambel esis Samaria ma meandondomba amamaga ananiami. ⁵³Ea', esis wambel anama sowa' alafugaha Jisas sandaiwa'ma^p sofa'ana sofe' ipat asasinai. Dei' main? Esis sogawa anan na'i nefe' Jerusalem. ⁵⁴Ea' alupumi amama biam ananiami Jems naloma Jon mati waf anama ma'ipana ma'i, "Dembinai, ine' na'i afa' ofalai nif fandumi misila'i hevena fendo epes isima?"

⁵⁵Ea' Jisas nandamboma ninifala amam biam. ⁵⁶Ea' mafe' anona wambel.

Epen na'i nila Jisas

(Mt 8:19-22)

⁵⁷Amam ata' mafe' eaf etin, anona aman na'ipana na'i, "Ae' a'i efe' elomena. Ea' ofe' etin anama hiagoma ine' na'i neafe'ma."

⁵⁸Ea' Jisas nagwamana na'ipana na'i, "Nombagw aolopumi ma'oh mala etap wambel amamunai. Amiguf wapoti' mufia' mafe' ilifi mala' alegah mapeih gani ilif, ea' ae' owa'etin. Ae' ataga epen endilisiwei wambel a'e ma a'oh alo balaga ae'anai."

⁵⁹Ea' na'ipa anona aman na'i, "Ine' nifi'i nila ae'."

n 9:51 Mk 10:32 **o 9:53** Jo 4:9 **p** Esis Sameria sandakolas la'ela'ef gani halafuta Gerisima sanda' lotuma God. Ea' esis Juda sanda' lotu ma God Jerusalem atogon. Ea' esis isima Sameria sandaiwa'ma siegiambama Jisas nefe' Jerusalem, owa'. **q 9:54** 2 Kin 1:9,16

Ea' anan na'i, "Ae' a'i ata' epe imafi ahalome, ata' igiambamana ma noga' ewana ma nope ea' ifi'i ilina."

⁶⁰Ea' Jisas na'ipana na'i, "Hapainai, sowago esis etis isima saga'i. Ea' ine' fo'o newalapa basefa epes siowis wambota Godi numafias."

⁶¹Ea' anona aman na'ipana na'i, "Dembina'i, ae' a'i ilina. Ea' ine' ata' ni'i a'e ma ae' efe'ma esis wambota ae'anai inifelis i'i nemaf bu'unai ma esis sili'?"

⁶²Ea' Jisas na'ipana na'i, "Emi egafin nehafel nili' nenda' maol aofi ma nendamboma niti alafuga ma neakwaha maol ananinai, enin ina la'ifina nenda' maola ni'ipas siowisa wambota Godi numafias, owa'."

Jisas nasapa' alupumi ananiami 72-peleim mafe'

10 ¹Dembina'i nandandepa anom alupumi ananiami 72-peleim nasapa'am mafe' biam atom mali'ana mafe'. Anan nasapa'am mafe' taun wambel hiagoma anan na'i neafe'agoma. ²Ea' na'ipam na'i, "Ipe' piti aof hianai gwa'aimi hiami maof ea'. Ea' epes sanda' maoli owa' hiase, kwawie'is. Ea' ipe' penda' beten pihali' Dembina'i ofagonama aofi. Pihali'ana ma nosapa' epes hiesi sefe' sonda' maola sola gwa'aimi ananiami sembe'am etifigin. ³Ipe' fo'o. Peme', ae' esapa'epa pefe' si'i sipsip nogami la'afena nombagw wandafumi aolopumi. ⁴Ipe' ina pefa' paos manisi soloma brasbeli su, owa'. Ipe' ina penda'masa nemaf bu'unai enis amam nematawa eaf, owa'. Pefe' mehip. ⁵I'i ipe' pefe' piwis anona ipat, ata' pili' pi'i na'ama pi'i, afa' wa'i God nonda' opalef ipe' hipei pape ipat anae' mope awanem. ⁶I'i enin epen opaf awanena nepe ipat anama, ea' basef bu'wami ipe'imi mopoma epen inima. I'i owa', hapaimi, basef amama bu'wami motanimani mopomepa la'ela'ef. ⁷Ipe' peape ipat anama atona. Ina pepe pefe' ifagw mamumami, owa'. Pepe ipat anama atona pea' gwa'aimi embel esis sasi'ipami. Dei' main, epes sanda' maoli andeande'ma mofa' otamba ma maol amam manda'anai.

⁸I'i ipe' pefe' piwis anona taun ama esis sofa'epa pefe' ifagw asasimi, ipe' pefa' gwa'aimi esis sase' ipe'ami. ⁹Ea' penda' isima awes nanda'asi bo'wes wambel anama. Ea' pi'ipa esis pi'i, 'Nemaf anama felefele'ma neataga ma ipe' piowis wambota Godi numafipa.' ¹⁰Ea' ipe' i'i pefe' piwis anona taun ama esis owa' seafa'epa pefe' ifagw asasimi, ipe' pefe' pitu eaf taun anama pi'i, ¹¹'Etap ma taun anama ipe'inai maila bo'wagah afa'imi, ea' afa' upati'am motanima mefe'mago ipe'. Ama ipe' ukup mondanda' pegawa basef amama andeande'. Nemaf nataga felefele'ma epes siowis wambota Godi. Ea' ipe' pandaiwa.' ¹²Dei' ae' a'ipipa, nemaf anama lu'unai God nowaloga epesanai anan anona nemaf niti esis fowa' gani sape Sodomi uwahipis andeande'. Ea' epes isima wambel anama

anan ina niti uwahipis, owa'. Nimanimi lu'wami endilisi anona nemaf motagamas.”

Wambel biefina uwahipis esis owa' somboma opalef sombale'efanae
(Mt 11:20-24)

¹³“Ae' ati ipe' Korasinipei paloma Betsaidaipi uwahipipa endilisi! Nimanimi lu'wami anona nemaf meatagamepa. Epes isima fowa' gani sanda' waf aonai sape wambel biefina Tair naloma Saidoni, esis ina sati ikwaf la'ifinai naninani si'i dei' anda'ana wambel ipe'inai, owa'. I'i esis siti pepel anama, esis sowaho'am begah pepe'atami si'i luwaguf tol sope nif agambeh. Ama sihi'amba enis epes esis samboma opalef endilisi safe'ma God. Owa'etin. ¹⁴Anona nemaf God nowaloga esis amam nematawa hiesi, niti esis fowa' gani sape Tair naloma Saidoni uwahipis andeande'. Ea' ipe' owa'. Anona nemaf pefa' nimanimi awami endilisi. ¹⁵Ea' ipe' Kaperneam, anona nemaf esis sefela agof ipe'imi molata ilif? Owa'etin. Anona nemaf God nokwahipa pefe' pewala wambel aonai hel.”

¹⁶“Emi egafis seme' malogof ipe'imi, esis same' malogel Ae'anai wapoti'. Ea' emi egafis sese'epa alafugah ipe', esis saso' alafugah ma Ae' ea' sase'ana alafugah Anan nasapa'e afi'i wapoti'.”

Alupumi Jisasi mafe' manda' maoli 72-peleim motanima mafi'i

¹⁷Ea' amam amama mafe' manda' maoli 72-peleim motanima mafi'i mandanifel endilisi ma'i, “Dembinai, afa' wahapila agel ine'inai, ambagof awami mame' basef afa'imi.”

¹⁸⁻¹⁹Ea' anan na'ipam na'i, “Ae' ati Satan nowai heven si'i otaga holala ma dililimbugwalag. Peme', ae' ase'epa pepel ipe' ma nambimb la'ifipa pefa'asa iguf awami wandafumi moloma awisiguf. Ama la'ifipa pili'amona epen aonai Satan naloma pepel hianai ananinai. Ea' ina nambimb anom amamaga mohambombagepa, owa'. ²⁰Ea' ipe' ina pendanifel ma ambagof awami mame' basef ipe'imi, owa'. Ipe' pendanifel ma God nanda' agof ipe'imi mail buk ananinai gani heven ilif.”

Jisas nanifela Ahalomana God

(Mt 11:25-27; 13:16-17)

²¹Nogota anama atona Ambal Bu'unai Godi nawalapa danifela opaf Jisasi ea' Jisasi na'i, “Ahalome, ine' Dembinai ma ilif etapi. Ae' afela agel ine'inai anifelina. Dei' main? Ine' nambaho' amamaga amama ma esis epes gawaisi sofa' gawa lu'unai, ea' nambomam nihi' ambasam epes isima gawa a'asi falafisi isima sape si'i awasi. Ahalome, okom ine'inai na'i, ea' amama atom.

²²Ahalome ae'anai nanda' amamaga hiami hi'alam mape lagel ae'anai. Ina enin epen negawa ae' Nogalomana Godi, owa'etin. Anan atona

nogawe. Ea' owa' enin epen negawa Ahalome, owa'. Ae' Nogalomana ananiwei atowe egawana. Ea' emi egafis ihi'ambasa Ahalomei, isima wapoti' esis etis sogawana.”

²³ Ea' anan nandamboma nati alupumi ananiami atom mape malomana na'ipam na'i, “Epes sati amamaga ipe' patulumi esis sandanifel. ²⁴ Dei' main? Fowa' gani amam king dambami hiami maloma amam profet hiami ma'i miti amamaga amama dei' ipe' patulumi. Owa'. Ukup amamumi maimailam endilisi ma mame' basef amama ipe' pame'ami, owa'. Amam ina mame'am.”

Aman Samariainai nati naumbihinai uwahipina

²⁵ Anona aman gawainai nawalipasa mi'uli Godi nohafel na'i nogwamba Jisas nememe'mana. Ea' na'ipana na'i, “Dembina, ae' enda' maina nambimb efa' ambal namunai eape andeande' la'ela'ef?”

²⁶ Ea' Jisas na'ipana na'i, “Maim basef mapoma mi'uli Godi? Ine' natalifam na'imama?”

²⁷ Ea' anan nagwamana basef na'i, “Ukup ipe'imi mohafela Dembinai God ipe'inai mimilana na'ama. Ukup ipe'imi mimilana hi'ilam, pese'ana ambagof opalef moloma pepel ipe'inai pese'anam hi'ilama Dembinai God atona. Ea' ukup mimila enis epes sape felefele'ma ipe'i si'i ukup maimaila ipe' etipa.”

²⁸ Ea' Jisas na'ipana na'i, “Amama ine' nagwa basef andeande'. Ine' nenda'am na'ama ma nambimb neape ambal namunai la'ela'ef.”

²⁹ Aman anama na'i nondanda' agel ananinai atona nope bo'ona. Ea' na'ipa Jisas na'i, “Epes sape felefele'ma ae'i, esis emi egafis?”

³⁰ Ea' Jisas nagwamana anom basef na'i, “Anona aman nakwaha Jerusalem nafe' nakini' Jeriko. Ea' anom manda' wali matolona eaf, mahana kwapete'ana mola'ipana amamaga hiami luwaguf maim ananiami. Amam manda'am na'ama makwahona mafe'. Anan nataga si'i naga'i.” ³¹ Nema' anama anona aman pris naila eaf anama nafe'. Ea' nati aman anama, nisila'ana naila eaf wa'ol atogon nafe'. ³² Ea' anona aman wambota Livai naila eaf anama nafi'i wapoti'. Nafi'i nati aman anama nisila'ana naila eaf wa'ol atogon nafe'. ³³ Ea' anona aman Samariainai naila eaf anama nafi'i natagama aman anama. Anan natolona nati owahipina endilisi. ³⁴ Ea' nafe' felefele'ma anan nakolo'wa wel marasin naloma embel waina melegw ananiami, ea' nowa'manam. Ea' nafelana nawamonana natoma donki ananinai nofa'ana nafe' nahaponana nape ipat esis fi'life' sapeinai ea' na'ipa aman numafi ipati ma numafiana andeande'. ³⁵ Ama wafilu anan nase'ana otamba siliwa biam aman numafi

s Esis Sameria naumbih esis Judai. Basef amama Jisas nihi'ambapa ma ape' ina ukup mila esis alupisi etis, owa'. Ukup mila naumbih wapoti'.

ipat anamai na'ipana na'i, 'Ine' nimafi aman anama andeande'. Ama i'i enin moni ine'inai nese'anana, nambimb itanimai egwamenana.' ”

³⁶Jisas na'ipana basef amama ea' nahali'ana na'i, “Dei' ine' okom nape na'imama? Amam wanom maila eaf mafi'i, emi nanda'am si'i aman nape felefele'ma aman anama amam awami mahanai?”

³⁷Ea' nagwamana na'ipana na'i, “Aman anama Samariainai nati anan uwahipina nagiamamana.”

Ea' Jisas na'ipana na'i, “Ine' fo'o nenda'am na'ama etin.”

Marta kwaloma Maria

³⁸Jisas naloma alupumi ananiami mafe' eaf, ea' nataga anona wambel nafe' nawis. Ano'w nemata'w agili'wa Marta kofa'ana kwafe' ipat akwa'unai. ³⁹Owama'w akwa'ukwi agili'wa Maria. Maria kwafi'i kwape felefele'ma bo'wagah Dembinai, kwame' basef ananiami. ⁴⁰Ea' Marta kwanda' maol hianai ma kwandondomba gwa'aimi. Okom natanea ma amamaga mamumami. Ea' kwafe'ma Jisas kwa'ipana kwa'i, “Dembinai, ine' niti uwahipiwi. Owame ae'akwi kwa'waha ae' atowe anda' maola andondomba gwa'aimi. Ine' kipa'w kufi'i kwigiambame.”

⁴¹Ea' Dembinai nagwama'wa basef na'i, “Marta, Marta, okom ine'inai napoma amamaga mamumami ma opaf ine'inai nafe' aona ma amamaga hiami. ⁴²Ea' waf bu'unai atotona ine' a'ena. Maria kwa'i kofa' amamaga amama bu'wami mikila' anom. Ina enin epen la'ifinama nili'amona amamaga amama bu'wami ma akwa'w, owa'.”

Jisas nawalipapa ma waf meanda' betenanai

(Mt 6:9-15; 7:7-11)

11 ¹Anona nemaf Jisas nanda' beten nape anagon. Nanda' betena hi'alan, anona alupunai ananinai na'ipana na'i, “Dembinai, ine' nihi'ambafa onda' beten si'i fowa' Jon nihi'amba alupumi ananiami.”

²Ea' na'ipam na'i, “Nemaf anama ipe' pi'i penda' beten, ipe' pi'iam na'ama pi'i,

‘Ahalomapa, ape' ma'i agel ine'inai nope bo'ona ma hiesi sefela agel ine'inai lu'una. Ape' ma'i nemaf anama bu'unai nifi'i ma epes hiesi siowis wambota ine'inai numafias.

³Dei' ine' nese'apa gwa'aimi mondahama nemaf anae'.

⁴Ine' nekwahomapa waf aonai ape' manda'anai. Dei' main? Ape' wapoti' makwahomasa waf aonai enis sanda'mapanai. Ine' owa' nili'apa mefe'ma amamaga ahifimi meagwamba ape'i.’ ”

⁵Ea' na'ipam anom basef womun etin na'i, “I'i anona aman alupunai ipe'inai nefe' nie'ipa alupunai ananinai owamb amaneta ni'i, ‘Alupinai,

ine' se'e bret wanifina ⁶ma imafi alupunai ae'anai nafi'i natagama ae', ea' ae' gwa'aimi a'e ma imafiana.'

⁷Ea', aman anama napani ipat nomon nagwa basef na'ipana na'i, 'Ae' andaiwa'ma nese'e noma'w ae', owa'. Ae' awasi sa'oh ea' ao'was ma'oh lehis. Ae' ina la'ifiwi ma esafel ease'ena gwa'aimi, owa'.' ⁸Ae' a'ipipa, aman ahalomai ipat ina okom napomana na'i aman anama alupunai ananinai ma nohafel nease'ana gwa'aimi, owa'. Anan okom aona ma name' aman anama falafala la'ela'ef napomana. Amama atom dei' nohafel nase'ana amamaga hiami anan nahali'anami.

⁹Dei' ae' a'ipipa, ipe' pihali' God, nese'epa amamaga. Amama ipe' peagolopami, nambimb pitolom. Ipe' peha uta, nambimb God nusi'amepana. ¹⁰Dei' main, emi egafis sohali' Godi, sofa' amamaga. Emi egafis sogolopa amamaga, nambimb sotolom. Ea' emi egafis seha utai, nambimb God nuwisi'amasana esis.

¹¹I'i enin so'uso'win nehali' ahalomana ma anona aol, anan ina nambimb nose'an anona yul aonai, owa'. ¹²I'i so'uso'win nihali' ahalomana ma anona kofemb, nambimb nose'ana anona aunil aonai? Amama wapoti', owa'. ¹³Ea' ipe' amam nematawa aopei pase'asa amamaga bu'wami atoma awasi ipe'isi, ahalomepa ipe'inai nape heven ilifi anan wapoti' nambimb nose'asa Ambal Bu'unai Ananinai esis sahali'anai."

**Esis sa'i Jisas nanda' maol naloma ambagof hiami awami dembinai
amamunai agilinama Belsebul**

(Mt 12:22-30; Mk 3:20-27)

¹⁴Ea' Jisas nogalo'mana ambal aonai nape nasopama malogel anona amani. Nafa' nafe', ea' aman anama ambo'ona noga na'i. Ea' esis amam nematawa hiesi ukup matamea ma aman anama nataga bo'ona. ¹⁵Ea' enis epes sa'i, "Anan natofa ambagof awami ma pepel anan dembinai ma ambagof awami agilinama Belsebul."

¹⁶Ea' enis epes sa'i sogwambana sofalana sa'i anan ata' nonda' anona ikwaf la'ifinai nafi'i heveni ma sotolona sogawa endilisi God nagiamamana. ¹⁷Ea' anan nogawa ukup asasimi na'ipas na'i, "I'i enis epes hiesi sape etap hiagoma sondawaloga biefis sopa', ina nambimb la'ifis, owa'. I'i enis epes wambota atona sondawaloga biefis sopa, esis ina nambimb la'ifis sopa', owa'. ¹⁸I'i wambota Satani sondawal biefis sopa', nambimb wambota anama la'ifis sopa' si'imama? Owa'etin. Ipe' pa'i ae' atofa ambagof awami ma pepel ambal aonai Belsebul. Na'ama ae' dei' a'ipipa basef amama. ¹⁹I'i endilisi ae' atofa ambagof awami ma pepel Belsebuli, dei' emi nigiambama epes ipe'isi satofam? Owa'. Dei' epes isima sihi'ambepa basef amama ipe'imi owa' endilisimi. ²⁰Pepel Godi atona nagiambama ae' atofa ambagof awami. Na'ama dei' ipe' pegawa nemaf anama epes siowis wambota Godi numafias nataga ma ipe' ea'."

²¹“I'i anona aman la'ifinai nohapila wambawa maim nopoma ipat ananinai andeande', amamaga ananiami hiami mopen andeande'. ²²Ea' i'i anona aman la'ifinai endilisi nikila' aman anama ma anan notaga la'ifina nifi'i nonda' wandaf nolomana nikila'ana wambawa maim aman anama nawamona okomami, nofa' amamaga ananiami nowalogam mefe'ma anom amam.

²³Emi egafis owa' alupisi ae'asi owa' sepe la'ela'ef neloma ae'i, esis naumbih ae'asi. Ea' emi egafis owa' sekolasa sipsip moloma ae'asi, esis satofa sipsip mafa' mefe' atona etin.

Ambal aonai anotanima nafi'i nawis epen inima

(Mt 12:43-45)

²⁴Nemaf anama anona ambal aonai nakwaha enin epen nawisi nafi'i, anan nafe' anama fatauguma nogolopa anagon na'i neapoma noma'w. Nagolopagon owa' niti anagone ea' ni'i, 'Ae' etanima efe' ipat fowa' apeinai.' ²⁵Ea' nafi'i nati ipat anama sambefana andeande' sofalo'mana nape. ²⁶Ea' notanima nafe' nao'wai anom ambagof awami 7-peleim wapoti' mafi'i mawis mape ipat anama. Ambagof amama awami endilisi manda' waf aonai nikila' waf aonai fowa' nali' nanda'anai. Fowa' epen inima nape awen, ea' dei' nape awen endilisi nikila' pe fowa' nali' napeinai.”

Waf esis sofa' danifel endilisinai

²⁷Jisas ata' na'i basef amama etin, enis epes hiesi safi'i salipana. Ea' ano'w nemata'w kwape la'afena esis kwa'i na'ama kwa'i, “Nemata'w akwama fowa' kolaena ma kwase'ena nomambeh ine'i, akwa'w kwandanifel.”

²⁸Ea' Jisas na'i, “Owa'etin. Ipe' amam nematawa pame' basef Godi ma pagi'mami, ipe' pandanifel ea'.”

Enis sa'i siti ikwaf la'ifinai si'i God nanda'anai

(Mt 12:38-42; Mk 8:12)

²⁹Amam nematawa hiesi safi'i sandakolas sape, Jisas na'ipas na'i, “Ipe' amam nematawa dei' pape etap anae', ipe' epes aopei. Dei' pa'i piti anona ikwaf la'ifinai. Ae' owa' enda'ana. Ikwaf anama fowa' gani God nihi'amba profet Jonai atona anona nemaf ihi'ambepana ipe'. ³⁰Anona profet Jona nataga si'i anona ikwaf nihi'amba esis amam nematawa Ninivaisi. Ea' na'ama etina ae' ataga epen endilisiwei ataga ape si'i anona ikwaf Godi ma ipe' amam nematawa pape nogota anae'. ³¹Anona nemaf God nowaloga epes, nemaf anama ano'w nemata'w kwin dembe'wi kwapani gani wa'ol aon nowalama lambihilifinama kohafel koloma ipe' pape na'ae kogwamepa basef motanima milipa kwi'i ipe' epes aopei. Dei' main, kwin

akwama kwapani gani etap nafe' netambela, ea' kwafi'i kwame' basefa gawa lu'unai dembinai king Solomon nawalipasanai. Ea' dei' anona nikila' Solomon nape na'ae. ³²Nemaf anama God nowaloga esis amam nematawa esis epes Ninivaisi sohafel sola' basef motanima milipa ma waf aonai ipe' panda'anai. Dei' main? Esis Ninive same' basef Godi Jona na'ipasami, ea' samboma opalef sakwaha waf aonai safe'ma God. Ea' dei' anona aman nikila' Jona nape na'ae.

Lam nanda' alop si'ina howalana

(Mt 5:15; 6:22-23)

³³Epes ina sokata lamifah nomon ifagw sosapa'am sombaho'am mafe' owina maloh, owa'etin. Esis sawamonam matoma balatagw ilifa sawis sati howalagon. ³⁴Naep nomon ukup ipe'imi si'i lama alop si'ina ipe'inai. I'i ukup ipe'imi bo'om mupe, alop si'ina ipe'inai nififil hi'ilana. Ea' i'i ukup ipe'imi aom, nambimb alop ipe'inai hi'ilana akutina. ³⁵Dei' ipe' pindumafuma andeande'. Na'ama nafifili nape nomona ipe'i akotina. ³⁶I'i alop ipe'inai nififil hi'ilana, ina anagon kwaie'ugun akotigin, owa'. Ea' nambimb alop ipe'inai howalana hi'ilana endilisi si'i lamifah matoma mafifil mafifimipa.”

Jisas na'i basef maila amam Farisi maloma amam mawalipasa mi'uli Godi ma waf aonai amam manda'anai

(Mt 23:1-36; Mk 12:38-40; Lu 20:45-47)

³⁷Jisas nanda' basef amama hi'alam, anona aman Farisi nofalana na'i nifi' nea' gwa'aimi nolomana. Ea' Jisas nafe' nawis nomon ipat natoma tebol. ³⁸Ea' Farisi anama nati anan nafe' nape na' gwa'aimi owa' nesa'opa lagof muli' si'i waf amam Farisi mailanai. Ea' anan okom natanea ma waf anama.

³⁹Ea' Dembinai na'ipana na'i, “Ipe' Farisi, ipe' pandombasa kapi plet ande'am atom andeande'. Ea' nomon owa'. Ipe' opalef nomon si'ipama waf walanai naloma anona waf aonai wapoti'. ⁴⁰Ipe' epes ukup mahipei. Ae' a'ipipa endilisi, God nanda' amamaga ande'am, nomonam wapoti'. ⁴¹Ea' amamaga mala nomon kahi plegw ipe'imi, amama ipe' penda'am pese' epes kwahusi pigiambamas. I'i ipe' penda'am na'ama, nambimb amamaga hiami ambo'om andeande'.

⁴²Ipe' Farisi uwahipipa ma nimanimi lu'wami nambimb meatagamipei. Ipe' pawaloga nambawa lombo maloma akwal mamumami hiami pase'ana tu'wanim God. Ea' ipe' pindih'i'ama waf bu'unai ukup maimaila Godanai ukup mase'epana nape. Waf anama naloma waf pindalali pese'ana amamaga maim Godanai, anama pekolasana pihapilana etin pilana.

⁴³Ipe' Farisi, ae' a'i uwahipipama nimanimi awami anona nemaf meatagamipei! Ukup ipe'imi mase'epa pa'i pepe siaifah bu'wami

naep epesi nomon ifagw pa'i basef papeimi. Ea' esis amam nematawa seanifelipa sonda'mepa nemaf bu'unai ipe' anama epes hiesi sandatama sapoma.

⁴⁴ Ae' a'i uwahipipa endilisi ma nimanimi awami anona nemaf meatagamipei! Ipe' si'i hiegilif mape mandambaho' etap owin, epes ina sogawam, owa'. Esis satoma safe' ilif ande' atogon."

⁴⁵ Anona aman gawainai nawalipasa mi'uli Godi nagwamana basef na'i, "Dembina, ine' na'iam na'ama, na'i basef la'ifimi na'i afa' epes aofai."

⁴⁶ Ea' Jisas nagwamana basef na'i, "Ipe' amam dembipei gawaipei pawalipasa mi'uli Godi, ae' a'i uwahipipa ipe' wapoti' ma nimanimi awami anona nemaf meatagamipei. Ipe' panda' amamaga nimanimi mapei'as esis amam nematawai, noma'w nahas. Ea' ipe' owa' pigiambamas pefa' nimanimi amama lagof ipe'imi, owa'etin.

⁴⁷ Ae' a'i uwahipipama nimanimi awami anona nemaf meatagamipei! Esis akusipa ipe'isi saha amam profet maga', ea' ipe' pala' hi'agilif amamumi. ⁴⁸ Waf anama nawalapa basef alihim na'i ipe' pa'i a'e ma esis saha amam profet fowa'imi maga'. Ea' dei' pala' hi'agilif amamumi, ⁴⁹ panda'am na'ama si'i God anan gawa bu'unai napeinai na'i, 'Anona nemaf ae' esapa' anom profet moloma Aposef mefe'mago esis, ea' soha anom moga' ea' anom sonda'am kwapete'am.'

⁵⁰ Ea' dei' amam nematawa nogota anae'isi, anona nemaf God nose'asa nimanimi ma ofagema amama saha profet hiami afum hi'alam fowa' gani dambadamba God nanda' ilif etap ea' nafi'i nataga nogota anae'. ⁵¹ Nali'i esimbel mali'i Abeli nafi'i natagama profet esimbel Sakaraiai sahana afuna la'afena ipat lu'unai Godi sanda' lotuwanai naloma balata saofa mafis sase' Godami. Amama ofagema nambimb mila ipe' etipa dei' pape etap anae'.

⁵² Ipe' amam gawaipei pegawa mi'uli Godi, ae' a'i uwahipipa ma nimanimi lu'wami anona nemaf meatagamipei. Dei' main, ipe' pakwaha ki anama pefa' gawanai. Ipe' etipa ina pawisi' uta pawis nomon, owa'. Ipe' pahopa eafa enis sa'i siowis nomoni."

⁵³ Ea' Jisas nakwaha ipat anama nawis ande', amam mawalipasa mi'uli Godi maloma amam Farisi wandafum kwapete'am endilisi ma magolopa anona eafa meanda'mana basef. Amam ma'i mogwamba malogel ananinai ma basef mamumami mahali'anami. ⁵⁴ Amam mape mati anan la'ela'ef ma'i mome' anan ni'i anom basef motaga malogel ananinai ma monda'mana kot.

Umbamehepama waf baso'mainai ma pie'i basefa malogof biam

(Mt 10:26-27)

12 ¹ Nemaf anama do'ok enis amam nematawa hiesi endilisi safi'i sonduwa'anima endilisi sandafofo'asanama etin bo'wagah

asasimi. Ea' Jisas nali' na'ipa alupumi ananiami na'i, "Ipe' pindumafuma andeande'ma yis amama amam Farisi. Basef ofagema ma yis amama ma'i waf baso'mainai ma'i malogof biam. ²Amamaga mape mandambahi'i, anona nemaf motaga alihim. Amamaga mandambaho' mape, anona nemaf hiesi sotolom alihim. ³Ea' basef hiami ipe' panda'am owambi anona nemaf sotolom alip. Ea' basef ipe' pa'iam so'uso'umbili ifagw nomoni, nambimb sotoma ifagw ilif sowalepam alihim.

Ipe' umbamohepama Dembinai atona

(Mt 10:28-31)

⁴Ipe' alupipei ae'ipei, ae' a'ipipa na'ama. Ipe' owa' umbamohepama esis soha alop atona neaga'i ea' anona nemaf esis ina la'ifisa sonda' anom amamaga wapoti', owa'. ⁵Ea' ae' ata' i'ipipa aman ipe' umbamiehipamanai. Anama nohepa peaga'i, ea' anona nemaf wapoti' la'ifinai ma neakwahipa pefe' wambel aonai hel. Ae' a'ipipa, ipe' umbamiehipamanai, aman anama atona.

⁶Ipe' pegawa, epes satala amiguf sa'umi wanom biam otamba 2 toea. Ea' God ina okom mase'ana anona amil sa'unai na'amainai, owa'. ⁷Endilisi, Anan neambam auf malo balagah ipe'imi God neambam dondo' hi'alam. Ipe' owa' umbamehepa. Anan okom napoma ipe' pikila' amiguf hiami amama sa'umi.

Waf mowalapa agel Jisasi

(Mt 10:32-33; 12:32; 10:19-20)

⁸Ae' a'ipipa, ae' ataga open endilisiwei. Emi egafis sewalapa agel Ae'anai ma amam nematawa hiesi, anona nemaf ae' ewalapa agof epes isima ma naep amam ensel Godi. ⁹Ea' emi egafis sowa' alafugaha Ae'i naep amam nematawai, anona nemaf ae' ewa' alafuga esis ma naep amam ensel Godi. ¹⁰Emi egafis seanda' anom basef awami findiwama ae' ataga open endilisiwei, nambimb God nokwahomasa awami esis sanda'ami. Ea' emi egafis sanda' basef findiwama Ambal Bu'unai Godi, anona nemaf God owa'etin endilisi ma neakwaha findiwa anama aonai ma epes isima. ¹¹Nambimb esis sofa' ipe' pefe' piowis ifagw amama esis Juda sa'i basef sapeimi o sofa'epa pefe'ma naep amam dembemi gavman moloma agufumi monda'mepa kot, ipe' ina umbamohepa, owa'. Ipe' ina pi'i, 'Nambimb ape' mi'i basef mi'imama? Nambimb mi'i maim basef?' Owa'. ¹²Dei' main, nogota anama atona Ambal Bu'unai Godi nihi'ambepa maim basef atuwasi peagwami."

Basef womun etina anona aman otamba hiamunai okom nahaga nagaoli

¹³Anona aman atotona ma amam nematawa hiesi anan na'ipa Jisas na'ama na'i, "Dembinai, ae' a'i ine' ni'ipa sahalome ae'anai nowaloga amamaga amama ahalomafai nese'e amamaga wa'am."

¹⁴Ea' Jisas na'ipana na'i, "Ae' andaiwa!! Emi nandandepa ae' ma epe eawaloga amamaga ma ipe'!? Owa'etin."

¹⁵Ea' anan na'ipas na'i, "Ipe' pindumafuma andeande'ma ipe' ina kowalepama anom amamaga. Epen amamaga hiamini endilisi, ina nefa' ambal namunai ma amamaga amama ananiami, owa'."

¹⁶Ea' nase'asa anom basef womun etin na'i, "Aof anona aman otamba hiamunai nola gwa'aimi hiami. ¹⁷Aman anama okom napoma anan atona na'i, 'Dei' ae' ata' enda'am i'imama? Ae' ifagw a'e ma etama gwa'aimi ae'ami hiami imbe'am mea'ome.'

¹⁸Ea' na'i, 'Ae' enda'am na'ama. Etala ifagw ae'ami ea' ila' dambaimi lu'wami mikila' fowa'imi. Ama nambimb ikolasom ewa'aniam gwa'aimi wit hiami moloma amamaga hiami bu'wami ae'ami mo'oh ifagw amama. ¹⁹Ea' i'ipa ae' i'i, "Ine' nape andeande'. Amamaga hiami bu'wami mape mondahama afagof hiami. Ea' dei' nepoma noma'w nea' gwa'aimi embel nendanifel nepe.'"

²⁰Ea' God na'ipana na'i, 'Ine' aman nahaga nagouli! Dei' owamb anae' igi ambal ine'inai nega'. Ea' amamaga amama hiami ine' nanda'am nandondombam ma'ih, amama nambimb emi nefa'am?'

²¹Amama na'ama etin si'i epep satama amamaga hiami asasimi atom sambe'am ma'oh. Esis amamaga a'asa naep Godi."

Ukup matamea ma hiahaom

(Mt 6:25-34)

²²Ea' Jisas na'ipa alupumi ananiami na'i, "Ae' a'ipipa, ipe' ina ukup motamea mefe' ma ambagof ipe'imi ea' pi'i, 'Ape' ata' mea' main?' Owa'. Ipe' ina ukup motamea ma alop ipe'inai pi'i, 'Nambimb ape' monda' main mombahe' alop ape'inai?' Owa'. ²³Dei' main, ambagof afa'imi ina gwa'aimi atom. Ea' alop ina luwaguf atom, owa'. ²⁴Ipe' ukup mopoma amiguf. Amiguf owa' mowa gwa'aimi, mola' gwa'aimi. Ea' owa' mefa' gwa'aimi membe'am ifagw amamumi. God atona nase'am gwa'aimi. Ea' ipe' epep pikila' amiguf amama endilisi. ²⁵Ipe' emi atuwasi la'ifina okom natanea nawis niwatania anona nemaf wapoti' ma ambal ananai nope nogota laona wapoti'? Owa'etin. ²⁶I'i ipe' owa' la'ifipama penda' anom amamaga sa'usa'umi na'ama, dei' maina ipe' ukup ipe'imi motamea ma anom amamaga mamumami wapoti'?

²⁷Ipe' ata' ukup mopoma afis. Amam ina manda' maol ina manda' luwaguf maim, owa'etin. Ea' ae' a'ipipa, fowa' gani anona aman amamaga hiamunai Solomon nanda' sosaf hianai ma luwaguf ananiami, sosaf ananinai ina bo'ona si'i afis amama, owa'etin. ²⁸Otalef amama dei' ata' motawa aof ama naman atef sotopa'am sokwahom mefe' nif. Otalef amama awami God nofalo'mam. Ea' ipe' amam nematawa pikila' otalef amama. Ea' dei' ipe' pembale'efa basef Godi, bale'ef ipe'inai ina la'ifina,

ipe' pegawa endilisi anan numafipa andeande' wapoti'. ²⁹Ea' ipe' ina ukup motamea pi'i, 'Nambimb mea' gwa'aimi embel eti?' Owa'. Ipe' ina ukup aom motamea ma amamaga amama, owa'. ³⁰Epes sololama Godi ukup matamea mafe' endilisi ma sogolopa amamaga amama hiami. Ea' ahalomewa ipe'lainai nape heveni anan nogawa ea' amamaga amama a'ipei. ³¹Ipe' ata' ukup mili' pegolopa waf bu'unai noloma piwis wambota Godi numafipa pili', ea' nese'epa amamaga amama ipe' wapoti'.

Pekolasa amamaga bu'wami atom gani heven ilif
(Mt 6:19-21)

³²Ipe' epes si'i sipsip kwaie'umi ina umbamohepa, owa'. Ahalomewa ipe'lainai okom bo'ona ma ipe' piwis wambota ananinai numafipa. ³³Ipe' pese'asa amamaga hiami ipe'imi ma enis epes sotalomepam, ea' pefa' otamba pewalogam pese' isima kwahusi pigiambamas. Ipe' penda' maol pegolopa paos otambaimi anona nemaf owa' motaga aom. Ipe' pekolasa otamba wiga maim amamaga bu'wami atom heven ilif nemaf owa' hegilialami. Anama sakowalefi ina suwis sokowalopam, owa'. Sopafowa maim owa' meatotopa'am hiahaom, owa'. ³⁴Dei' main, maina wambel amamaga bu'wami ipe'imi ma'oma, wambel anama atona anona nemaf ukup ipe'imi wapoti' meapoma.

Amam manda' maoli mundumafuma mope

³⁵Ipe' penda' luwaguf ipe'imi bandam, pewaho' legw, ea' pekata lamifah pendondombol pindumafuma pepe. ³⁶Ipe' pepe si'i epes sape sahafa aman dembinai asasinai na'i nokwaha gwa'aimi lu'wami sandase'amai notanima nifi'i. I'i nifi'i noha uta ipat ananinai, esis suwisi'manana mehipe. ³⁷Andeande'ma amam manda' maoli mundumafuma mope miti dembinai amamunai nifi'i notoloma mondanifel. Ae' a'ipipa endilisi, nambimb dembinai nili' nowaho' lowaf bandana nowaho' let, ama nonda'mam gwa'aimi. Ea' ni'lipam motoma tebol ea' anan nifi'i nease'am gwa'aimi. ³⁸Anan nifi'i amaneta la'afina o noloma awatagw muli' meanda'am, o maina nogota, ma nieti amam mundumafuma mope, amam mondanifel.

³⁹Ipe' ukup mopoma anom basef womun etin. I'i ofagenama ipati nili' nogawa nogota nanda' wali neafi'ianai ma nundumafuma nope, nanda' wali ina nambimb nifi'i nupusila ipat ananinai nuwis nomon, owa'etin. ⁴⁰Ipe' wapoti' pundumafuma pepen. Dei' main? Ae' ataga epen endilisiwei, ifi'i anona nemaf ipe' ina pegawa pi'i ifi'i ulal nemaf anama, owa'."

Basef womun etina amam manda' maoli anom
bu'wami maloma anom awami
(Mt 24:45-51)

⁴¹Ea' Pita na'i, "Dembinai, basef amama womun etini ine' nase'afam afa' atofa, o esis amam nematawa hiesi wapoti'?"

⁴²Ea' Dembinai na'i, "Emi egafis gawaisi sape sanda' maol andeande' panda' waf bu'unai? Epes isima dembinai asasinai nambimb nondandepas ma sumafi ananiami manda' maoli ma sease'ama gwa'aimi amam nogota dembinai na'ianai. ⁴³Anona nemaf dembinai asasinai notanima nifi'i ma nieta isis isima sanda' maol andeande', esis isima sendanifel. ⁴⁴Ae' a'lipipa endilisi, dembinai ananinai anona nemaf nondandepasa sope dambesi sumafi amamaga ananiami hiami. ⁴⁵Ea' i'i epes isima ukup mapoma opalef asasimi atom ea' si'i, 'Dembinai ape'inai ina nambimb nifi'i ulal, owa'etin.' Ama esis sohafel soha enis amam nematawa sanda' maoli, sa' gwa'aimi embel da gwa' sonda' spak sape. ⁴⁶Esis i'i sonda'am na'ama, dembinai asasinai nambimb notanima nifi'i anona nemaf esis isima ina nambimb si'i dembinai nifi'i ulal, ata' owa'. Dembinai nifi'i nogota anama esis ukup mease'asanama. Nifi'i nohambombaga esis isima endilisi, ea' nonda'asa sope soloma epes owa' seambale'efa Godi seapoma.

⁴⁷Emi egafis sanda' maola anani, esis segawa ea' ma okom dembinai asasinai, ea' esis owa' seandondomba amamaga siela nomonas dembinai, anona nemaf dembinai nohas mehip endilisi. ⁴⁸Ea' emi egafis sanda' maoli owa' seagawa okom dembinai asasinai ma seanda' waf nendahama esis sefa' nimanimi, nambimb dembinai nohas sa'ombel. Ea' emi egafis enis sease'asa amamaga hiami, anona nemaf epes isima si'ipas sogwamasam amamaga wapoti'. Ea' emi egafis enis sease'asa amamaga hiami sase'as sumafiami, anona nemaf epes isima si'ipas sogwamasam wapoti' mikila' fowa' sali' sase'asami.

Maol Jisasi nawaloga esis amam nematawa sataga bieffis

(Mt 10:34-36)

⁴⁹Ae' afi'i ma ekata nif etap anae' ea' a'i nif amama dei' fendom lu'um. Owa', ata' owa'. ⁵⁰Ea' ae' okom na'i efa' anom baptais. Dei' ae' owa' ata' efa'am, okom ae'anai aona endilisi ma ehafa efa' baptais amama. ⁵¹Ipe' pa'i ae' afi'i ma indiwa wandaf hianai netaga etap anae' ma hiesi sope opalef awanem? Owa'. Ae' a'lipipa, ae' afi'i ma ewala epes esis amam nematawa hiesi. ⁵²Ama dei', anona nemaf wapoti' epes wanis bias sope ipat atotona wambota atotona sondawaloga bieffis. Wenis soloma bias sifitap ea' bias soloma wenis sifitap ea' na'ama etin. ⁵³Nambimb esis sondawaloga, anona aman noloma ahalomana ananinai mondawaloga bieffim, ea' ano'w nemata'w koloma mama'wakw ondawaloga bieffiwa, ea' mefi'makw ako'ukwi koloma ma'makw kwandagi'mokwi ondawaloga bieffiwa."

Waf ape' mogawa nogota anama amamaga amama meataganai

(Mt 16:2-3; Mk 8:11-13)

⁵⁴Ea' Jisas na'ipa esis amam nematawa wapoti' na'i, "Ipe' pati otaga natefi gani aon newalama, mehip ipe' pa'i, 'Atuwasi asaf a' nelai' ea' asaf

a' nalai. ⁵⁵Ea' ipe' pati uf la'ifinai naluwi aon natopa'ima wa'ol nataga, ipe' pa'i, 'Atuwasi owaf a' nuluwi la'ifina.' Endilisi, naluwi la'ifina na'ama etin. ⁵⁶Ipe' epes pa'i malogof biamipei! Ipe' pati ikwaf hianai ilifanai etapanai andeande', ea' dei' ipe' owa' peagawa ikwaf nogota anae' andeande'."

Enis epes ukup mi'i sonda' kotima ape'

(Mt 5:25-26)

⁵⁷"Dei' maina ipe' owa' powaloga waf bu'unai? ⁵⁸Nemaf anama ipe' pefe' peloma epen inima na'i nenda' kotimipei, ipe' ata' pefe' eaf, nogota anama pese'ana okom pewalapa amama pi'iam peloman. Na'ama epen inima nenda'epa penda' basefa amama ma jas nonda'epa pefe'ma polisman ea' monda'epa penda' kalabus. ⁵⁹Ae' a'ipipa, ipe' ina nambimb pekwha ipat anama sanda' kalabusanai ulal, owa'. Ama peagwa amagama lu'wami sa'umi ma wiaf ipe'inai hi'ilana, pefe'."

Ipe' pemboma opalef pekwha waf aonai. I'i owa', a pega'.

13 ¹Nemaf anama atona enis epes sape sa'ipa Jisasa enis epes Galilisi. Nemaf anama fowa' esis sape sondolalima God sanda' ofa etin, gavman dembinai Pailat nahas saga'. ²Ea' Jisas nagwamasa basef na'i, "Ipe' ukup mandanda'mas ma'i epes isima sa'i sikila' enis epes Galilisi sanda' waf aonai, ama ofagema amama atom dei' sofa' nimanimi amama saga'?" ³Ae' a'ipipa owa'etin endilisi! I'i ipe' owa' pemboma opalefa waf aonai ipe'inai, anona nemaf ipe' hipei pega' na'ama etin si'i esis. ⁴Dei' si'i main enis epes isima 18-peleis wambel anama Siloam ipat launai nato nahas saga' hi'alas? Amama ipe' pa'i waf aonai asasinai nikila' waf aonai enis epes sape Jerusalem? ⁵Owa'etin. I'i ipe' owa' pemboma opalefa waf aonai ipe' panda'anai, anona nemaf ipe' hipei pega' na'ama etin si'i esis."

Basef womun etina lawag owa' nola su'utipi

⁶Ea' Jisas nawalapa anom basef wamon etin na'i, "Anona aman nawa anona lawag fik aof ananinai nawa wain. Anom nimeguf mafe' ea', su'utipa lawag anama owa' nili. ⁷Ea' na'ipa anan nanda' maol aof anamai na'i, 'Neme'. Afagof wanom ae' afi'i agolopa su'utip lawag anama fik, owa' nili. Na'ama dei' ine' lena. Dei' main netawa nefa' ifat atona etap etin?"

⁸Ea' anan nanda' maol aofi nagwamana basef na'ipana na'i, 'Dembinai, ine' ata' kwahona notawa afagel anae' atona. Ama ata' ela' etap noloma umba bulmakaum esembe'ana. ⁹Ama iti nambimb niema su'utip afagel anae' o owa'. I'i owa', wila ine' nelena.' "

Jisas nanda' ano'w nemata'w kwataga bo'okw nemaf sapoma noma'wanai

¹⁰Nemaf anama esis Juda sapoma noma'wanai Jisas na'ipasa basef esis amam nematawa anona ipat esis Juda sa'i basef sapeinai nomon.

¹¹ Ea' ano'w nemata'w ambal aonai napei'wi kwape, ambal anama aonai nanda'akw awasi'w kwape afagof 18-peleim ea' alafuga akwa'unai nondala'akw, ina kohafel kwaitu andeande', owa'etin. ¹² Ea' Jisas natolo'w nofala'w kwafi'i na'ipakw na'i, "Nemata'w, ae' atofa awes ine'inai dei' nataga bo'wena."

¹³ Anan nasa lagel ananinai nemata'w akwama ea' mehip kwaitu usi'ikw. Ea' kwafela agel Godi lu'una. ¹⁴ Ea' aman anama numafi ipat esis Juda sa'i basef sapeinai okom wandafuna ma Jisas nanda'akw kwataga bo'okw nemaf anama sapoma noma'wanai. Ea' anan na'ipa esis amam nematawa na'i, "Nimeguf amama wanom wanom sanda' maolanami. Ea' dei' ipe' pi'i aman anama notofamepa awes ipe'inai, andeande'ma pifi'i nemaf anama sanda' maolananai. Ea' ipe' ina pifi'mai maol anama ma nemaf anama mapoma noma'wanai."

¹⁵ Ea' Dembinai nagwamana basef na'i "Ipe' amam pa'i malogof biamipei! Peme! Nemaf mapoma noma'wanai ipe' hipei pafe' ifagw bulmakauwi ma patagaha bulmakau maloma donki ipe'imi pao'wam mafe' ma' embel. ¹⁶ Ea' nemata'w akwama kwataga wambota Abrahami, Satan nowa'akw la'ifikw kwape afagof 18-peleim. Ea' dei' nemaf anama mapoma noma'wanai ae' a'i etagaha mandof nowa'akwi ma kweape wafifi'w."

¹⁷ Jisas na'iam na'ama, nanda' esis naumbih ananisi ambagof aom kwapete'. Ea' amam nematawa hiesi sandanifel endilisi ma amamaga bu'wami la'ifimi hiami anan nanda'ami.

**Basef womun etina su'utip mastetim so'uso'um
maloma yis sanda' bret natifi
(Mt 13:31-33; Mk 4:30-32)**

¹⁸ Ea' Jisas na'iam wapoti na'i, "Epes siowis wambota Godi numafias si'i main? Ae' indila'wifam i'imama? ¹⁹ Amama si'i anom nalelef so'uso'umi ape' mofalam ma'i mastet. Anona aman nofa' nalelef amama nawam aof ananinai. Anom nimeguf mafe' ea' mataga malo si'i lawah lu'wami ea' amiguf mafi'i mala' alegah mailam."

²⁰ Ea' Jisas na'iam wapoti' na'i, "Ae' a'i indila'wifa epes siowis wambota Godi numafias i'imama? ²¹ Ae' indila'wifama anom yis ano'w nemata'w kofa'am kwambomam maloma plaua hiami. Ea' mafe' mawis plawa hiami manda'am matef lu'um."

**Uta sa'unai
(Mt 7:13-14,21-23)**

²² Jisas nafe' wambel hiagoma lu'wagoma sa'ogoma nape felefele'ma eaf nafe' Jerusalemi nawalipasa basef esis amam nematawa, ea' nafe' okom na'i nefe' Jerusalem ea' nafe'. ²³ Ea' anona aman na'ipana na'i, "Dembinai,

ae' a'i ihali'ina ma epes isima anona nemaf God nofa'as seatanimani. Isima hiesi o kwaie'wis?"

Ea' Jisas na'ipas na'i, ²⁴“Ipe' pepe la'ifipa penda' maol lu'unai endilisi, pefe' piwis uta sa'unai. Dei' main, epes hiesi anona nemaf si'i suwis nomon, ea' owa' la'ifisi. ²⁵Anona nemaf ofagena ma ipati nohafel nowalowa uta ipat anama. Ea' ipe' pifi'i pitu peha uta ande' pefalana na'ama pi'i, 'Dembina, usi'amapa uta.'

Ea' nogwamepa basef ni'i, 'Ipe' enimaipei? Ae' owa' egaopei, ipe' enimaipei?"

²⁶Ea' pi'ipana pi'i, 'Ape' mape ma' gwa'aimi embel malomena, nape nawalapa basef na'ipapa wambel ape'inai.'

²⁷Ea' anan anona nemaf nogwa basef ni'i, 'Ipe' enimaipei? Ae' owa' egaopei. Ipe' epes panda' waf aonai, ipe' si'amae!'

²⁸Anona nemaf ipe' piti Abraham noloma Aisak noloma Jekop moloma profet amama hiami mope wambel Godi ea' ipe' owa'. Ipe' nogalo'mepa pepe ande'. Anama pelef mehup pena' nalelef tilili talala' kwapete' pepe. ²⁹Ea' esis amam nematawa hiesi sifi'i gani aon natefima nowalama naso'ma noloma anama wa'owa'ol esis sope sea' gwa'aimi lu'wami wambel Godi. ³⁰A'e endilisi, enis epes dei' sataga sagi'i agof a'asi, anona nemaf sefa' agof lu'wami sope sili'. Ea' enis dei' sataga sali'i sofa' agof lu'wami anona nemaf agof a'as setaga sigi!'"

Jisas nalopa wambel Jerusalem

(Mt 23:37-39)

³¹Nogota anama atona anom amam Farisi mafi'mai Jisas ma'ipana ma'i, "Ine' nekwaha wambel anae' fo'o anagon. Dei' main, Herot na'i nehena nega!'"

³²Ea' Jisas nagwamama basef na'ipam na'i, "Ipe' fo'o pi'ipa aman anama nanda' do'ufi douf si'i nombat aolopunai pi'ipana pi'i, 'Dei' naman wapoti' ae' etofa ambagof awami mape epesi, ea' enda' awes nanda'asi setaga bo'wes. Anom nimeguf mefe' ea', nemaf nefe'ma wenifi hi'ilana, embefa maol ae'anai hi'ilana.' ³³Ea' dei' naman bimb ae' efe' enda' maol anama. Ina andeande'ma esis soha anona profet noga' anona wambel, owa'. Sehana noga' Jerusalem atagon.

³⁴Jerusalem, Jerusalem, ipe' paha amam profet afumi, pakwaha otamba paha amam God nasapa'am mafe'mai ipe'i, la'ela'ef ae' a'i ekolasa ipe' epes hipei si'i awata numal'ina nowa'ani nogami nakolasom mawis behenagof ananimi. Owa'etin, ipe' pandaiwa'. ³⁵Ipe' peme!! Dei' ipat bu'unai naloma wambel ipe'inai atuwasi wafina notawa etin. Ae' a'ipipa, ipe' ina petolowe wapoti' ma nambimb pie'i,

'Ape' ma'i God nofalo'ma aman anama nafi'i agel Dembinai.'"

Jisas nanda' anona aman alop nalatawanai bo'ona

14 ¹Anona nemaf esis Juda sapoma noma'wanai sa'i Sabat Jisas nafe' naloma anona aman Farisi na' gwa'aimi ipat ananinai. Ea'

esis sanda'ana naep di'indi'ana endilisi. ²Anona aman lagufi bo'wagah malatawana kwapete'i nape Jisas opafunama. ³Ea' Jisas nati aman anama, nahali' amam gawaimi mawalipasa mi'uli Godi maloma amam Farisi na'i, "A'i afa' onda' aman awes nanda'anai bo'ona nemaf anama Sabat mapoma noma'wanai, o owa'?"

⁴Ea' amam masopama malogof. Ea' nahapila aman anama nanda'ana bo'ona nasapa'ana nafe'.

⁵Ea' Jisas nahali'am na'i, "I'i anona aman ipe'inai awani ananini o anona bulmakau ananinai sowala hul lounai nemaf anama Sabat sapoma noma'wanai, a'i aman anama ahalomas asasinai nefe' nigiasi mehup nemaf anama o owa'? Endilisi, nefe' nigiasi."

⁶Ea' amam basef a'am.

Basef womun etina lawag owa' nil nola su'utipi

⁷Ea' Jisas nati esis safi'mai gwa'aimi amama sa'i sope siaifah bu'wami matawa sali'i bo'wagoma atogon. Ea' na'ipasa basef womun etin na'i, ⁸"I'i anona aman nofalepama anom gwa'aimi lu'wami sonda'ama aman naso' nemata'wi ma pefe', ipe' owa' pefe' petoma pili' siaifah bu'wami amam dambami atom matomami, owa'. Na'ama aman anama nofo'o nofalai anona aman agel lu'unai nikila' agel ine'inai. ⁹Ama aman anama nofalena nifi'i ni'ipina ni'i, 'Ine' kwahomana sia inima bu'wani aman anae.' Nonda'am na'ama, ine' ambal aona endilisi. Ea' nonda'ena nefe' nepe nigili' ipat basagaf. ¹⁰Ea' i'i anona aman nofalena nefe' nea' gwa'aimi nelomana, ine' nefe' nepe nigili' ipat basagaf. Nenda'am na'ama ma atuwasi nofalena nie'i, 'Alupinai, ine' nifi'i nepe nili' bo'ogoma!' Anan nonda'am na'ama, atuwasi nefa' agel lu'unai ma naep epes isima hiesi sa' gwa'aimi salominai. ¹¹Dei' main, epes emi egafis sefela agof asasimi atom, God nonda'as sisila'. Ea' epes emi egafis senda' agof asasimi misila'i, anona nemaf God nefela agofa esis."

Basef womun etina anona aman nofala enis epes sifi'mai gwa'aimi

¹²Ea' Jisas na'ipa aman anama nahali'ana nafe'ma gwa'aimi amama na'i, "I'i ine' nenda' anom gwa'aimi lu'wami o sa'umi, ine' owa' nefala alupisi soloma sahin owan wambota ine'isi wambel atona amamaga hiamisi, owa'. I'i nenda'am na'ama, nambimb esis sofalena ma nefe' nea' gwa'aimi ifagw asasimi, ea' sogwamena gwa'aimi ine'imi. ¹³Ine' nenda' gwa'aimi lu'wami, nefala isima kwahusa amamagai, bo'wagah awomisi, naep mase'asi. ¹⁴Epes isima ina la'ifisa sogwamena gwa'aimi ine', owa'. I'i ine' nenda'am na'ama, nendanifel nepe andeande'. Ea' anona nemaf God nogwamena amamaga amama bu'wami nemaf anama epes isima sanda' waf bu'unai saga'i sohafel wapoti'."

Basef womun etina gwa'aimi lu'wami
(Mt 22:1-10)

¹⁵Anona aman asasinai na' gwa'aimi nalomas name' basef amama, na'ipa Jisas na'i, "Emi egafis sepe sea' gwa'aimi lu'wami wambel Godi, esis sendanifel."

¹⁶Ea' Jisas na'ipana basef womun etin wapoti' na'i, "Anona aman na'i nondanda' anom gwa'aimi lu'wami. Ea' nofalai epes hiesi safi'mai gwa'aimi amama. ¹⁷Nemaf danda' endilisi ma gwa'aimi amama mataga, ea' nasapa' anona nanda' maola anani nafe' na'ipa epes isima fowa' nofalasi. Ea' na'ipas na'i, 'Ipe' fi'i. Amamaga hiami mandandombam mape ea'."

¹⁸Ea' epes isima hiesi atona etin sohafel sa'i basef sa'i esis ina safe', owa'. Anona aman na'ipana na'i, 'Ae' andaiwa'ma efo'o. Ata' efe' etopa'ma aof ae'anai.'

¹⁹Ea' anona na'ipana na'i, 'Ae' atala bulmakau 10-peleim monda' maol mowala etap, ea' dei' efe' endondomam. Ea' ae' ina efo'o.'

²⁰Ea' anona na'i, 'Dei' etef ae' aso' nemata'w. Na'ama ae' ina efo'o, owa'.'

²¹Ea' aman anama nanda'mana maoli notanima nafe' na'ipa dembinai ananinai ma amama. Ea' ofagenama ipati opaf wandafuna ea' na'ipa nanda'mana maoli na'i, 'Ine' mehip fo'o eaf hianai lu'unama sa'onama ma taun anama ea' nefa'ai isima falafisi, naep mase'asi, lagof bo'wagah awomisi ine' ne'wasi sifi'i suwisi nomon ipat ae'anai.'

²²Ea' aman anama nanda' maolanana na'i, 'Dembina, ae' aila basef ine'imi ea', ati ipat ina dei' si'ina, ata' owa'.'

²³Ea' dembinai na'ipana na'i, 'Ine' fo'o eaf hianai lu'unama sa'onama nila indalelemb nefe' aof ea' ni'ipasa basef la'ifimi sifi'i suwisi nomon ipat ae'anai ma si'ina. ²⁴Ae' a'ipina endilisi, epes isima hiesi fowa' ali' efalasi, dei' andaiwa' ma sea' gwa'aimi ae'ami.' "

Esis ukup la'ifim sogawa andeande'i amama atom sila Jisas
(Mt 10:37-38)

²⁵Amam nematawa hiesi safi'i saloma Jisas, ea' nandamboma na'ipas na'i, ²⁶"Emi egafis sifi'mai Ae', ma esis owa' sesambala mamasas wauhiamas wauhupawa batawisas asasisi soloma sahin owan wambota asasinai, ea' ambagof asasimi wapoti', esis ina nambimb sepe la'ifis sepe alupisi ae'asi, owa'. ²⁷Ae' efa' nimanim awami anda' maol Godi sehe ega' lawag usi'inai tu'wanainai. Emi egafis owa' senda'am na'ama etin si'i ae' ma sieili, epes isima ina la'ifis setaga alupisi ae'asi, owa'.

²⁸Enin epen ipe'ini i'i nenda' anona ipat lu'unai nolata ilif, enin nenda'am ni'imama? Enin ata' nope nomonas motamea andeande' nili' ma nogawa andeande' otamba amama nanda' ipatami. Nambimb otamba

ananimi mondahama ipat anama hi'ilana o owa'? ²⁹I'i owa'etina nenda' amama meali', ma nili' nonda' simen etina owa' nonda' ipat anama hi'ilana. Nambimb epes hiesi satolonai si'i basef aman anama sonda' findiwana ³⁰si'iam si'i, 'Epen inima nasefela ipat anama, ea' enin owa' la'ifin nembefanae.'

³¹Anom basef wapoti' amama. I'i anona aman dembinai king ni'i nofe' nopa' noloma anona king, anan ata' nope okom notanea andeande'. Soldia ananimi 10-tausen etin, ea' king anama nagi'i anan nifi'i noloma soldia ananimi hiami 20-tausen. Ea' king anama nali'i na'i ata' nili' nogawa na'ama. Anan nambimb nopa' noloma king anama nagi'i la'ifinama notofam o owa'? ³²Anan nonda'am na'ama ma i'i nogawa anan ina la'ifina, naumbih ananimi ata' mopani laogon, nili' nosapa' anom amam mofe'ma anan mofalana mi'ipana basef mi'i wandaf hapainai. ³³Ea' ipe' na'ama etin. Ipe' emi egafipa owa'etina pewa' alafugah ma amamaga ipe'imi ma pesambalom, ipe' ina nambimb la'ifipa pepe alupipei ae'ipei, owa'.

Jisas na'i basef womun etina sol owa' usihimi

(Mt 5:13; Mk 9:50)

³⁴Ipe' pegawa sol amama bu'wami. Ea' i'i sol amama mumbul owa' usihim, owa'etin. Nambimb ipe' penda'am pi'imama usihim wapoti'? Owa'. ³⁵Sol amama ina bo'oma ape' monda'am aof, o mokwahom moloma umba bulmakaum, owa'etin. Ape' mokwahom etin. Emi egafipa aligah magalipei pame' basefi, pilam."

Basef womun etina sipsip higilalanai

(Mt 18:12-14)

15 ¹Epes hiesi saloma anom mofa' takisi maloma enis epes sanda' waf aonai safi'i felefele'ma Jisas same' basef ananimi. ²Ea' amam Farisi maloma amam mawalipasa mi'uli Godi manda' megah mahama anan ma'i, "Aman anama naloma epes isima sanda' waf aonai nofalas alupisi nalomas na gwa'aimi."

³Ea' Jisas nase'ama basef amama womun etin na'ipam na'i, ⁴"I'i anona aman ipe'ina'i numafi anom sipsip 100-peleim ama anona atotona hegililana, aman anama ata' nokwaha sipsip amama 99-peleim mitu mea' otalef anagon, anan ata' nefe' nogolopa anona hegilalanai. Nogolopana nafe' nafe' natolona nafelana ⁵nowandefana ekaf ananinai, nandanifel nefa'ana nafi'i. ⁶Nafi'i nataga ipat ananinai, nofalai esis alupisi ananisi saloma esis wambel atona sandakolas etifigin. Ea' na'ipas na'i, 'Ipe' pendanifel peloma ae'! Anona sipsip ae'anai hegilalana, ea' ae' afe' agolopana atolona efa'anai ea'."

⁷Dei' Jisas na'ipas na'i, "Ae' a'ipipa na'ama etina esis amam nematawa sape heven ilifi sandanifel ma epes isima 99-peleis ambo'wes, ina sanda'

waf aonai ma sotanima somboma opalef, owa'. Ea' i'i enin epen nenda' waf aonai ni'i nemboma opaf, esis sape heven ilifi sondanifel endilisi ma enin. Danifel asasinai nikila' sandanifela epes isima sape bu'wasi.

Basef womun etina anona moni higilalanai

⁸I'i ano'w nemata'w anona moni 10-peleina siliwa anona atotona higililana, atuwasi konda' maina kogolopana kwutolona? Akwa'w kwakata lam kombefagon ipat nomon kogolopana andeande' hi'along kofe' kofe' ma kwatolona. ⁹Akwa'w kwatolona ea', kofala esis alupisi wambel akwa'unai sondakolasi ea' kwi'ipas kwi'i, 'Ipe' pendanifel peloma ae'! Anona moni ae'anai higilalana, ea' dei' agolopana afa' atolona etanima efa'anai ea'.¹⁰Dei' ae' a'ipipa na'ama etin si'i amam ensel Godi mandanifela enin epen nanda' waf aonai nemboma opaf nafe'ma God."

Basef womun etina nogalomana higilalanai nakwaha ahalomana

¹¹Ea' Jisas na'ipam wapoti' na'i, "Anona aman batausan biam. ¹²Aonama awagufunai nafe' na'ipa ahalomana ananinai na'i, 'Ahalome, ae' okom napoma otamba maim amamaga afa' ofa'ami ma nemaf ine' nega'. Dei' ae' a'i efa' tu'wanim ae'ami. Ine' niwalom biefim newalogamafam afa' biafa. Ae' a'i ine' nese'eam dei'."

Ea' ahalomam nawaloga amamaga hiami ananiami mafe'ma amam batausana biam.

¹³Ea' ina ata' nogota laona aonama awagufunai nefa' amamaga hiami ananiami nafe' napani anona wambel laogoma ea' nase'asam amamaga hiami ananiami ma waf naninani aonai anan naila okom ananinai na'i neanda'anai. Ea' otamba ananiami hi'alama ma waf aonai. ¹⁴Anan nakwaha otamba ananiami hi'alam, nogota nolomahasana nataga lu'una etap anama hiagoma hi'along. Ea' anan amamaga a'ana nape wafina. ¹⁵Ea' anan nafe' nanda' maola anona aman etap anamainai. Aman anama nasapa'ana nafe' etap ananinai ma numafi bogof ananiami. ¹⁶Bogof amama ma' su'utip lawahim, ea' anan wapoti' na'i nea' su'utip amama ma opaf ananinai. Anan ina enis sase'ana gwa'aimi, owa'. ¹⁷Anan nape na'ama anom nimeguf, okom ananinai nogawa andeande' ea' na'iam na'i, 'Amam hiami manda' maola ahalome ae'anai amam gwa'aimi hiami endilisi. Ea' ae' ape na'ae nolomahe endilisi. ¹⁸Hapaimi, ae' atuwasi ehafel efe'ma ahalome ae'anai. Ea' i'ipana i'i, "Ahalome, ae' anda' waf aonai ma God ine' wapoti'. ¹⁹Dei' ae' ina aman bu'uwei ma ine' nefala ae' nogalomana ine'iwei, owa'. Ine' nenda'e epe si'i anona nanda'mena maoli." "

²⁰Ea' nohafel nafe'ma ahalomana.

Ea' anan ata' nafi'i laogon ahalomana natolona, okom nainailana endilini nasagih nafe' nahapilana nombalo'ana nasisi' dalogw. ²¹Ea'

nogalomana na'ipana na'i, 'Ahalome, ae' anda' waf aonai ma God ine' wapoti'. Ae' ina ata' aman bu'uwei ma ine' nefala ae' ni'i nogalomana ine'iwei, owa'etin.'

²²Ea' ahalomana na'ipa amam manda' maola anani na'i, 'Ipe' fa'ai lowaf bu'unai launai namunai ae'anai pefa'ana pifi'i ulal pewaho'manana anan. Ea' pelamana anona ring faf ananinai, pelamana su bo'wagah ananimi. ²³Fa'ai bulmakau noganai anama lu'unai gigititi'i pehana ma ape' mea'ana mondanifel molomana. ²⁴Dei' main, nogalome anama ae'anai andowelamana si'i naga'i, ea' dei' ambal napaina wapoti'. Anan higilalana ea', dei' matolona wapoti.'

Ea' esis sandanifel salomana.

²⁵Ea' nogalomana dembenama napani aof nafi'i. Ea' anan nafi'i nataga felefele'ma ipat, name' maguf sanda' musik salemb.

²⁶Ea' nofala anona nanda' maoli nahali'ana na'i, 'Esis sanda' main?'

²⁷Ea' anan nanda' maoli na'ipana na'i, 'Owalomena ine'inai notanima nafi'i, ea' ahalomena ine'inai nandanifel nalomana, na'ama dei' naha anona bulmakau lu'unai. Dei' main, anan notanimai ina ata' nape aona, owa'. Nape andeande!'

²⁸Ea' nogalomana dembenama okom wandafuna ea' nandaiwa'ma nuwis nomon ipat. Ea' ahalomana nawisi ande' na'ipana mehpa nuwis nomon, owa'etin. ²⁹Anan nagwamana basef ahalomana na'i, 'Afagof hiami ae' ahapila maol ine'inai si'i agel a'e anda' maol atona. Ae' ina esambala basef mi'uli ine'imi anona nemaf, owa'. Ea' ine' owa' nese'e anom amamaga so'umi atom si'i meme noganai ma eandanifel eloma alupisi ae'asi, owa'etin. ³⁰Ea' sa'usa'uni anama ine'inai anan nase'awa amamaga hiami ine'imi ma awau nematawa gembaiwai. Ea' dei' notanimai, ine' okom napomana dei' nahamana bulmakau anama anan.'

³¹Ea' ahalomana na'ipana na'i, 'Nogalome, la'ela'ef afa' biafa wape etifigin. Ea' amamaga ae'ami amama ine'imi atom. ³²Ea' dei' afa' ondanifel, opalef afa'imi mope bo'om. Dei' main, owalomena anama ine'inai fowa' nafe' laogon si'i naga'i, ea' dei' nafi'i nataga ambal napaina wapoti'. Anan higilalana, ea' dei' afa' watolona wapoti!'

Basef womun etina anona aman gawainai numafi maoli

16 ¹Ea' Jisas na'ipa alupumi ananimi na'i, "Anona aman amamaga hiamunai nao'wa anona ananinai numafi opeh ananimi nape. Ea' enis safi'mai anan sambaso'mana anan nanda'mana opehi ma basef sa'i, 'Numafi maol ine'imi anan nakwaha otamba hiami ine'imi mafe' etin.'

²Ea' nofala aman anama numafi maoli nafi'i na'ipana na'i, 'Dei' maina basef anama ae' ame'ama ine'? Ine' nefe' niamba amamaga ae'ami mape lagel ine'inai newalapam. Ina ata' nepe nimafi maol ae'anai wapoti', owa!'

³Ea' numafi maoli okom natanea na'i, 'Ae' nambimb ata' enda'am i'imama? Dembinai na'i nigalo'me ma epe imafi maol dei'. Ae' ina la'ifiwi ma ewala etap. Ea' ambal aona indaila enis epesa gwa'aimi maim. ⁴Ea' ae' okom natanea ma anom amamaga eanda'ama nambimb epes sofa'e efe' ifagw اساسimi ma nemaf anama dembinai nigalo'me ma maol anama dei' anda'anai.'

⁵Ea' nofala amam hiami atona etin wialef mataomami mafi'mai anan. Anona aman nali' nafi'manai nahali'ana na'i, 'Ine' wialef ma'um mapoma dembinai ae'anai?'

⁶Ea' anan na'i, 'Darep wel lu'wami 100-peleim.'

Ea' na'ipana na'i, 'Ine' mehipe nepe niti tiketa wiaf nenda' amefa darep 50-peleim atom mil.'

⁷Ea' anona nataga nahali'ana na'i, 'Wialef ine'imi ma'um?'

Ea' anan na'i, 'Begah witim 100-peleim.'

Ea' na'ipana na'i, 'Ine' nefa' tiket anama wiaf ine'inai nailanai ea' nenda' 80-peleim.'

⁸Ea' aman dembinai nafela agela aman anama aonai numafi maoli. Dei' main, anan nanda' waf gawainai si'i aman nomonas mapeinai. Epes ukup اساسimi maimaila amamaga maim mape etap anae' esis sanda' maola waf gawainai si'i epes nomonas mapeisi sikila' epes sape howalagon owa' segawa andeande'i."

⁹Ea' Jisas na'i, "Ae' a'ipipa ma moni wiga maim ma'oh etap anae', ipe' penda' enis amam nematawa sotaga alupisi ipe'isi. Ea' i'i nemaf esis sohapila wiga monianai hi'ilana, anona nemaf God nofa'epa pefe' ifagw mape ilif heveni pepe andeande' la'ela'ef hihif.

¹⁰Emi egafis sumafi amamaga sa'umi andeande', anona nemaf sumafi amamaga lu'wami andeande' wapoti'. Ea' emi egafis sembaso'am, owa' seanda' maol andeande'ma amamaga sa'usa'umi, anona nemaf esis ina senda' amamaga lu'wami andeande' wapoti', owa'etin. ¹¹I'i ipe' owa' pimafi moni wiga maim mape etap anae', anona nemaf emi nese'epa amamaga bu'wami endilisi pimafiam? Owa'etin endilisi. ¹²I'i ipe' owa' pimafi amamaga enis epesi, emi nese'epa amamaga ipe'imi atom pimafiam? Owa'etin.

¹³Ina enin epen nanda' maoli la'ifin nihapila maol biefina amam dambami biam, owa'etin. Na'ama okom nila anona, anona nesambalona. Ea' na'ama etin ipe' ina la'ifipa pepe owina God noloma wigai moni wapoti', owa'."

**Anom basef ma'i mi'uli Godi fowa'inai maloma
epes siowis wambota Godi numafias**

¹⁴u Amam Farisi mame' basef amama hiami Jisas na'iami, amam manda'mana salamal etin. Dei' main, amam ukup maimaila moni atona.

¹⁵ vEa' anan na'lipam na'i, "Ipe' panda' maol ma epes hiesi sitilipa si'i ipe' epes bu'upe'i. Ea' God nogawa ukup ipe'imi nomon. Amamaga epes safela agofami satalom otamba lu'wami, amama falafumi atoma naep Godi.
¹⁶ wBasef amam profet mawalipasami maloma basef mail mi'uli God nase' Mosesanai amama amam mawalipasam la'ela'ef mape mafi'i metambel nogota Jon nataganai. Ea' nogota anama Joni nafi'i nataga dei' basef bu'wami ma epes siowis wambota Godi numafias, amama mape mafe' mataga wambel hiagoma. Ea' epes hiesi la'ifis sanda' maol mehhip ma sefe' siowis wambota Godi numafias. ¹⁷ xAnom basef tu'wanima' amef sa'usa'umi moloma anom basef bandami mail nomona buk mi'uli Godi ina anona nemaf mefe' higililam hi'ilam, owa'etin. Mope la'ela'ef hihif na'ama etin. Ea' etap naloma otaga anona nemaf hegililam.

Jisas na'i basefa sawala waf dase'amainai
(Mt 5:31-35, 19:9; Mk 10:11-12)

¹⁸ Emi egalin nakwaha waulu'mana anani'wi ma nease' ano'w nemata'w wapoti', anan nanda' waf aonai so'a waola nemata'w akwama nali' nase'akwi. Ea' emi egalin naso' ano'w nemata'w fowa' anona aman nagalo'makwi aman anama nagi' nase'akwi wapoti' nanda' waf aonai so'a waola nemata'w akwama.

Anona aman amamaga hiamunai naloma Lasarus

¹⁹ Anona aman amamaga hiamunai nape. La'ela'ef anan nala siaogw bu'wami atom luwaguf bu'wami satalom otamba lu'wami. Ea' nimeguf hiami nefa' gwa'aimi bu'wami atom nape andeande' endilisi. ²⁰ Ea' felefele'ma ipat ananinai anona aman kwahunai nandailasa gwa'aimi moni maim nape, agilinama Lasarus. Alop ananinai si'ina ma maselis. ²¹ zEnis epes sofa'ana safi'i na'oh felefele'ma ipat aman anamai. Anan na'i notatama gwa'aimi tukwakwanimi mowa ma'oh tebol owinam aman anama amamaga hiamunai ma ata' nea'am nease' opaf. Ea' nombagw mafi'i mapalo'mana maselis ananinimi afegah amamumi.

²² Anom afagof mafe'ma ea', aman anama falafunai naga', ea' anom ensel mofa'ana mafe' mahaponana nape wambel bu'unai felefele'ma Abraham. Ea' aman anama amamaga hiamunai anan wapoti' naga, sawana. ²³ Ea' nafe' wambel aonai hel nofa' nimanimi lu'wami. Ea' natologon nalata ilif, nati Abraham napani laogon endilisi, Lasarus nape nalomana. ²⁴ Ea' nofalana na'i, 'Ahalome Abraham, ine' niti uwahipiwi nesapa' Lasarus nufi'i nola faf ananinai tu'wanina atona embel nupihime afega ae'anai. Ae' ame' nimanimi lu'wami endilisi ma nif amae!'

²⁵Ea' Abraham na'ipana na'i, 'Nogalome, ine' okom nondanda'ma fowa' ata' nape naminai etap anae' nefa' amamaga bu'wami atom. Ea' Lasarus nofa' amamaga hiami awami. Ea' dei' wambel ana'e opaf ananinai nape bo'ona, ea' ine' nefa' nimanimi lu'wami. ²⁶Ea' anom amamaga wapoti' mape. La'afena ape' maloma ipe' God nanda' anona kwambiwag lu'unai. Na'ama epes sape na'ae ma sa'i sotopa' kwambiwag anama seafo'o ma ipe', esis ina la'ifis. Ea' epes sapani na'amai, esis ina la'ifisa sotopa'i kwambiwag siefi'mai ape', owa'etin.'

²⁷Ea' aman anama na'i, 'Ahalome, ae' a'i ine' nesapa'o Lasarus notanima nofo'o ipat ahalome ae'anai. ²⁸Ae' anom owape wanom biam mape. Ama Lasarus ni'ipama basef la'ifimi ma momboma opalef. Na'ama amam wapoti' mufi'i wambel anae' mofa' nimanimi lu'wami.'

²⁹Ea' Abraham na'ipana na'i, 'Owa'. Owapena ine'imi mome'ago basefa Moses noloma amam profet miigambamam. Amam mome'ago basef amama.'

³⁰Ea' na'ipana na'i, 'Ahalome Abraham, owa'etin. Ina nambimb mome'am, owa'. Ea' i'i enin epen naga'i nehafel hi'agif nefe'ma amam, nambimb meme'ana momboma opalef.'

³¹Ea' Abraham na'ipana na'i, 'Owa'etina meame' basefa Moses noloma amam profeti, ea' nambimb enin epen naga'i nitanima nehafel hi'agif, amam ina mombale'efana wapoti', owa': "

Waf aonai nahambombaga bale'ef epesi

(Mt 18:6-7,21-22; Mk 9:42)

17 ¹Ea' Jisas na'ipa alupumi ananinai na'i, "Endilisi amamaga amama meagwambipei motagamepa ma penda' waf aonai. Endilisi amamaga anona nemaf miatagai, ea' emi egefis sonda' amamaga amama awami motaga, ae' ati esis uwahipis endilisi. Dei' main, esis anona nemaf sefa' nimanimi lu'wami. ²I'i enis epes sofa' epes isima sepa' owap lu'unai nil bagafowa asasimi, sofa'as sefe' sokwahis sowala naoh mami lu'wami ma afis, esis ata' sepe awes. I'i epes isima senda' enin so'uso'win nekwaha nembale'efa Ae', epes isima anona nemaf sepe awes endilisi sikila' sewala naoh afis. ³Ipe' pindumafuma andeande'. I'i owalomepa ipe'inai nonda' waf aonai, pi'ipana basef mehipa nokwahana. Ama i'i anan nemboma opaf, ipe' pekwhomana waf aonai ananinai. ⁴I'i anan nonda'mepa waf aonai ma ipe' la'ela'ef 7-peleif nemaf atotona, ama anan netanima nifi'mai ipe' 7-peileif ni'i, 'Ae' amboma opaf.', ipe' pekwhomana waf aonai anan nanda'anai."

Waf ape' mombale'efanai

⁵Ea' amam Aposel Jisasi ma'ipa Dembinai amamunai ma'i, "Ine' nenda' afa' ombale'efena la'ififa wikila' wali' ombale'efena."

⁶Ea' Dembinai na'ipam na'i, "I'i bale'ef ipe'inai so'ona nendahama si'i nalelef sa'umi mastetimi lawag, nambimb ipe' pi'ipa lawag nanima su'utip mailanai pi'i, 'Ine' degia neloma ofagena nefe' newala naoh embel nomon,' ea' nila basef ipe'imi."

Waf epes sanda' maoli sanda'anai

⁷"I'i anona aman ipe'inai nofa' anona aman nanda' maola anan nowala etap aof o numafi sipsip, ea' wambomota notanimai nifi'i ipat, atuwasi dembinai numafi anani ni'ipana ni'i, 'Ine' fi'i mehip nepe nea' gwa'aimi'?" Owa'etin. ⁸Atuwasi ni'ipana ni'i, 'Ine' nendondomba gwa'aimi ae'ami, newaho' let, nenda'me gwa'aimi ae' nili' nefa'am nifi'i. Ma ili' ea'am, ine' nigi' nea' ine'imi.'

⁹Ea' atuwasi anan ninifela aman anama nanda'mana maoli ma nila basef ananimi? Owa'etin. ¹⁰Ea' ipe' wapoti' na'ama etin. I'i ipe' penda' amamaga hiami hi'ilam si'i God na'ipipa, ipe' pi'i basef pi'i, 'Afa' wanda' maoli aofai. Amamaga afa' wanda'ami, amama maol afa'imi atom.' "

**Amam 10-peleim awes aonai nanda' alop amamunai
nambo', Jisas nanda'am bo'om**

¹¹Ea' Jisas nafe' eaf na'i nefe' Jerusalem, nafe' la'afena etap hiagoma biefigin Samaria naloma Galili. ¹²Anan nataga anona wambel, ea' amam 10-peleim awes aonai nanda' alop amamunai nambo' mafi'i eaf ata' maituwi laogon, ¹³mofalana mehip ma'i, "Jisas, Dembinai, ine' niti uwahipifa!"

¹⁴Ea' Jisas natolom na'ipam na'i, "Ipe' fo'o pihi'amba alop ipe'inai ma amam pris."

Amam ata' mafe' etin, alop amamunai nataga bo'ona.

¹⁵Anona aman amamunai nati alop ananinai bo'ona, notanima nafe' noga na'i mehip nafela agel Godi. ¹⁶Ea' natambe nowafa notawa etap felefele'ma bo'wagah Jisasi nanifelona. Anan ina Judainai, owa'. Anan Samariainai.

¹⁷Ea' Jisas natolona na'i, "Ae' a'i ipe' 10-peleipa ambo'wepa etin. Dei' 9-peleim emuma? ¹⁸Amam motanima mifi'i mefela agel Godi? Aman anama anona wambelinai, anan atotona."

¹⁹Ea' Jisas na'ipana na'i, "Ine' hafel fo'o. Ine' nembale'efa ae', amama atom dei' nataga bo'wena wapoti'."

**Nemaf anama epes hiesi siowis wambota Godi
Dembinai numafias nambimb neataga
(Mt 24:23-28,37-41)**

²⁰Anom Farisi mahali' Jisas ma'i, "Maina nogota nemaf anama bu'unai notaga ma ape' miowis wambota Godi numafiapa?"

Ea' anan nagwamama basef amam na'i, "Amama esis ina satolom naep, owa'.²¹ Esis ina anona nemaf si'i, 'Piti, amama mape na'ae, o mape gani, owa'etin.' Peme!! Amama mape opalef ipe'imi nomon ea!."

²²Ea' Jisas na'ipa alupumi ananiami na'i, "Anona nemaf notaga, opalef ipe'imi pelef endilisi pi'i, 'Ape' ma'i aman anama notaga epen nofa' alop epesi ata' nifi'i notaga ulala ata' mutolona.' Owa'etin. Ipe' ina petolowe, owa'.²³ Ea' nambimb enis epes si'ipipa si'i, 'Piti nani nape gani,' enis si'i 'Piti anan nape na'ae.' Ea' ipe' ina peme'as pigi'mas, owa'. Hapaisi.²⁴⁻²⁶ Ipe' pegawa pelele'ala ma otaga dilulum bogwalag pele' pele' nafe'agon hi'alagon. Ea' ae' ataga epen endilisiwei, anona nemaf enda'am na'ama etina nemaf ae' iefi'ianai. Ea' ae' ata' ili' efa' nemaniami hiami ma epes anai'isi dei' sowa' alafugahe. Waf fowa' gani sanda'ana nogota anama Noa napeinai, ea' na'ama etin si'i anona nemaf esis sonda'ana nemaf anama felefele'ma ifi'i etaga etap anae'.²⁷ Sa' gwa'aimi, sa' embel, amam nematawa sindikikila'ma sandase'ama etin safe' safe' sataga nemaf anama Noa nafe' nawis sip. Ea' embel lu'wami mataga maha esis amam nematawa hiesi afis hi'alas.

²⁸ Esis sanda' waf na'ama etin si'i nogota anama Lot napeinai wapoti'. Sa' gwa'aimi, sa' embel, satala amamaga sase'asam safe'ma enis satalom, sawa amamaga aof, sala' ifagw.²⁹ Ea' Lot nakwaha Sodom nafe', ma nemaf anama atona nif maloma otamba salfa fandumi mowai heven si'i asaf nalai ea' mahambombaga amam nematawa hiesi saga' hi'alas.

³⁰ Ea' na'ama etina nemaf anama ae' ataga epen endilisiwei iefi'ianai.³¹ Nemaf anama emi epen neape ipat andi'i felefele'i, ina ata' netanima nuwis nefa'ai amamaga ananiami ipat nomon, owa'. Ea' na'ama etin epen napani aofi, ina ata' netanima nefe' ipat, owa'.

³² Ipe' nomonas mondanda'ma Lot waulu'mana.³³ Emi egafis si'i sili'akwa ambagof asasimi, ambagof asasimi anona nemaf higililam. Emi egafis sesambala ambagof asasimi, anona nemaf ambagof asasimi mope andeande' la'ela'ef hihif.³⁴ Endilisi ae' a'ipipa, nemaf anama owamb amam biam mo'oh ipat lehis atifim, God nofa' anona, anona nokwahona nope.³⁵ Anowa nematawa biawa onda' maola plaua onda' bret, atuwasi God nofa' ano'w, nokwaha ano'w kope."³⁶ [Amam biam meape aofi, atuwasi God nofa' anona, nokwaha anona nope.]

³⁷ Alupumi ananiami mame' basef amama mahali'ana ma'i, "Dembinai, amama anona nemaf motaga eti?"

Ea' Jisas na'ipam na'i, "Anama alop saga'i sa'oma, ea' anama atogon anona nemaf komemb mufi'i mondowa'anima."

Basef womun etina nemata'w alifi'wi kofala dembinai jas

18 ¹Ea' Jisas nase'am basef wamon etin alupumi ananiami ma nihi'ambam monda' beten nimeguf hiami ma amam ina ala'uta

neam, owa'. ²Ea' anan na'iam na'i, "Anona dembinai jas nape anona taun. Anan ina umbamahana ma God, ina okom napoma enis epes wapoti', owa'.

³Ano'w nemata'w alifi'wi kwape taun anama. La'ela'ef akwa'w kwafi'mai jas anama kwa'ipana kwa'i, 'Naumbih ae'asi sa'i sohambombaga ae'. Ine' ata' nigiangbame ma kot.'

⁴Jas anama nali' nandaiwa'ma niegiambama'w. Nogota launai nafe' ea', okom ananinai ma'i, 'Ae' ina umbamahema God, ea' ina ila basef epesi, owa'. ⁵Ea' nemata'w akwama alifi'wi kwase'e nimanimi ae'. Ea' hapaimi, ata' igiangbama akwa'w mehpa kot. Na'ama kwafi'i la'ela'ef konda' okom nalowe.' "

⁶Ea' Dembinai na'ipam na'i, "Ipe' peme' basefa jas anama aonai. ⁷Epes isima God nandandepas ea' ananisi, esis salef sakokowe la'ela'ef owamb alip. Dei' God nigiangbamas kot o owa'? Anan nigiangbamas. Anan ina ni'ipas mamumami, owa'. ⁸Ae' a'ipipa endilisi, nambimb nigiangbamas mehpa. Ae' ataga epen endilisiwei. Ea' anona nemaf ae' iefi'i, nemaf anama iti amam nematawa etapesi sembale'efa ae', o owa'?"

Basef womun etina amam biam anona Farisi naloma anona nofa' takisi

⁹Enis epes ukup mapoma esis etis sa'i esis epes bu'wasi sanda' waf bu'unai, ea' sa'i enis sanda' waf aonai. Epes isima Jisas nase'asa basef womun etin na'i, ¹⁰"Anom amam biam ma'i mofe' monda' beten ipat lu'unai Godi. Anona Farisi, anona aman nofa' takisi. ¹¹Farisi anama naitu okom napoma anan atona nanda' beten na'ama na'i, 'Ae' anifelina God, ama ae' ina si'i enis epes sanda' waf aonai. Esis sambaso'mas sofa' wiga hiahaom enis epesi, sanda' waf aonai, sanda' waf aonai so'a waulanai. Ae' anifelina ma ae' ina si'i aman nanima aonai nofa' takisi. ¹²Wikifah hiami ae' akwaha gwa'aimi nimeguf bifa anda' beten. Ea' amamaga hiami ae' efa'ami, awala tu'wanim amamaga ase'enam ine.' "

¹³⁻¹⁴"Ea' aman anama nefa' takisi naituwi laogon nandaiwa'ma niniga niti heven ilif, owa'. Naha mafata ananinai la'ela'ef na'i, 'God, ae' aman anda' waf aonai, ine' niti ae' owahipiwi nigiangbame.'

Ae' a'ipipa endilisi, aman anama nofa' takisi na'iam na'ama, anan bo'ona ma naep Godi. Ea' aman anama nali' nanda' beteni, owa'. Dei' main, emi egafis sefela agof asisimi atom, nambimb God nonda' agof asasimi mowala. Ea' emi egafis senda' agof mowala, nambimb God nefela agof asasimi lu'um."

Jisas na'ipasa basef bu'wami mafe'ma awasi isima ata' sa'wisi

(Mt 19:13-15; Mk 10:13-16)

¹⁵Esis sao'wamanai enis awasi sofa'as safi'mai Jisas, sa'i anan nowamona lagofa ni'ipasa basef bu'wami ma God nofalo'mas. Ea'

alupumi ananiami mati isima ea' minifalis esis sofa'as sifi'mai anan. ¹⁶Ea' Jisas nofala awasi isima safi'i felefele'ma anan ea' na'lipam na'i, "Ipe' kwahowas awasi isima sifi'mai ae'. Ipe' ina pindaiwa'mas. Fa'asi sifi'mai Ae'. Dei' main, esis amam nematawa siowis wambota Godi numafias esis same' basef ananiami sailam si'i awasi isima. ¹⁷Ae' a'lipipa endilisi. Emi egafis si'i a'e ma siowis wambota Godi numafias ama sese'ana ukup asasimi ma Anan si'i awasi isima sa'i a'e mana, isima sanda'am na'ama nambimb siowis wambota Godi numafias. I'i owa', owa'etin."

Aman amamaga hiamunai
(Mt 19:16-30; Mk 10:17-31)

¹⁸Anona agilina'i Judaina'i nahali' Jisas na'i, "Tisa bu'winai, ae' nambimb enda' maina efa' ambal namunai epe andeande' la'ela'ef?"

¹⁹Ea' Jisas na'ipana na'i, "Dei' maina ine' na'i Ae' bu'uwei? God atona bu'unai. ²⁰Ine' negawa mi'uli God naso' Mosesana'i na'i, 'Ina nenda' waf aonai so'a waulanai, ina neha enis epes sog'a nenda' wal, owa', ina nembaso'ma enis epes, ine' neme' basef mamasina'i nembale'am nilam ea' nimafias andeande'."

²¹Ea' na'ipana na'i, "Mi'uli anama hianai ahapilana ailana fowa' ata' sa'owe afi'i afi'i ataga dei'."

²²Ea' Jisas name' basef amama na'ipana na'i, "Ine' anona waf bu'unai atotona ata' owa' neanda'ana. Ine' fo'o nese'asa amamaga ine'imi hiami enis epes sotaluma ine' nefa' moni anama nenda'ana neso' isima kwahusi. Nenda'am na'ama ma anona nemaf nefa' amamaga bu'wami gani heven ilif. Ea' nifi'i nembale'efe ae' nila ae'."

²³Anan name' basef amama, opaf ananina'i nimanina endilisi. Anan amamaga hiamunai. Na'ama dei' anan okom nimanina'i.

²⁴Ea' Jisas natolona na'i, "Epes isima hiahaom moni hianaisi, sanda'am ahifim endilisi ma siowis wambota Godi numafias. Atona etin sefe' siowis. ²⁵Anona mafin lu'unai kamel nuwis nil nagala sagundisa luwagufanai, anama wila ma niowis. Ea' amam nematawa amamaga hiamisi i'i suwis wambota Godi, sonda'am ahifim endilisi ma siowis. Maol anama ahifina endilisi nikila' maol kamel niowis nil nagala."

²⁶Ea' epes isima same' na'ama sa'i, "I'i na'ama, anona nemaf God nofa' emi egafis setanimani sopen andeande' la'ela'ef? Owa'etin."

²⁷Ea' Jisas na'ipas na'i, "Amamaga epes owa' la'ifisa seanda'ami, amama God atona la'ifinama nonda'am."

²⁸Ea' Pita na'ipana na'i, "Neme', afa' wakwaha amamaga afa'imi hiami ea' dei' wafi'i wambale'efa basef ine'imi wailina."

²⁹Ea' Jisas na'ipas na'i, "Ae' a'lipipa endilisi, ipe' emi egafipa pekwaha ifagw ipe'imi ma penda' maola epes siowis wambota Godi numafias, ³⁰anona nemaf God nogwamepa amamaga hiami mikila' amama pali'

pefa'ami. Anona nemaf nogota bu'unai neataga, ipe' pefa' ambagof namumi ma peape andeande' la'ela'ef.”

Jisas na'iam wenifa noga' notanima nohafel wapoti'

(Mt 20:17-19; Mk 10:32-34)

³¹Ea' Jisas nao'wa alupumi ananiami 12-peleim na'ipam na'i, “Peme', dei' afa' ondowasa' Jerusalem. Ama basef amama hiami amam profet fowa' gani manda'am mail buki ma'i ae' ataga epen endilisiwei motaga alihim mondawalap hi'ilam. ³²Nambimb amam monda'e efe'ma enis epes sololama Godi. Ea' sonda'e findiwae sehe sonda'me waf aonai sisisi'wafe sopagahowe sehe ega'. ³³Ama nimeguf biam mefe' hi'ilam ama anona nefe'ma wenifi ae' etanima ehafel wapoti'.”

³⁴Ea' amam alupumi ananiami ina mogawa basef amama, owa'. Basef ofagema ma'iam ata' mandambaho'ma amam, ea' ina ukup mandanda'mam andeande'ma amamaga Jisas na'i neanda'ami, owa'.

Jisas nagiangbama anona aman naep mase'anai ambo'ona

(Mt 20:29-34; Mk 10:46-52)

³⁵Jisas nafe' nataga felefele'ma anona wambel Jeriko, ea' anona aman naep mase'anai nape eaf wa'ana dawalegef nandailasa gwa'aimi moni maim. ³⁶Ea' name' esis hiesi safi'i sikila'ana safe', nahali'as na'i, “Esis sanda' main notaga?”

³⁷Ea' sa'ipana sa'i, “Jisas Nasaretinai anama dei' nafi'i nikila'ena nafe'.”

³⁸Ea' nofalana na'i, “Jisas, ine' akunamana Deviti, niti ae' uwahipiwi!”

³⁹Epes isima sali' safi'i sinifalana na'ama sa'i, “Ine' feso'mena!”

Ea' anan fala etin nape na'i, “Ine' Devit akunamana, niti ae' uwahipiwi.”

⁴⁰Ea' Jisas nafi'i naitu na'ipas na'i, “Kipana nifi'mai ae'.”

Anan nafe' felefele', Jisas nahali'ana na'i, ⁴¹“Ine' na'i ae' enda'mena main?”

Ea' na'ipana na'i, “Dembina, ae' a'i iti andeande' wapoti'.”

⁴²Ea' Jisas na'ipana na'i, “Naep ine'imi miti. Ine' nembale'efa ae' la'ifina. Amama atom dei' nataga bo'wena wapoti'.”

⁴³Ea' mehip naep matiana andeande', naila Jisas nafe' eaf nafela agel Godi. Ea' esis amam nematawa sati amama safela agel Godi wapoti'.

Basef Sakiusi

19 ¹Ea' Jisas nafe' nawis Jeriko, na'i nefe'. ²Ea' anona aman amamaga hiamunai nape, agel ananinai Sakius anan agilinai ma amam amama mofa' takisi. ³Anan na'i niti Jisasa nogawana anan emi egafuna. Ea' amam nematawa wambelisi hiesi saitau sili'akw. Sakius anan bandabandanai, ea' ina nati Jisas, owa'. ⁴Ea' nasagih nali' nafe' nalata natoma anona lawag fik ama niti Jisas niefi'i.

⁵Ea' Jisas nataga anama naniga nati ilif na'ipana na'i, "Sakius, dei' ae' efe' epe ipat ine'inai. Ine' sila'i mehip."

⁶Ea' nisila'i mehip okom ananinai nandanifel, nao'wa Jisas nafe' ipat ananinai.

⁷Ea' esis amam nematawa sati amama, ukup aom endilisi sa'i basef mamumami sa'i, "Anan nafe' nape ipat anona aman nanda' waf aonai."

⁸Ea' Sakius nehafel naitu na'ipa Dembinai na'i, "Dembinai, ine' neme'. Dei' ae' a'i ewala amamaga hiami ae'ami la'afen na'ama etin, ea' ese'as tu'wanim isima kwahusi. I'i ae' embaso'ma enin epena ekwalopa amamaga ananimi, nambimb ae' egwamana hiami bifibif."

⁹Ea' Jisas na'ipana na'i, "Dei' God nefa' amam nematawa sape ipat anae'i sotanmani ea'. Dei' main, aman anama wapoti' akunamana Abrahami. ¹⁰Ae' ataga epen endilisiwei, ae' afi'i ma egolopa epes higilalasi efa'as setanimani."

Basef womun etina amam manda' maoli 10-peleim mofa' moni

¹¹Esis same' basef amama, ea' Jisas nafe' nataga felefele'ma Jerusalem, ea' epes hiesi ukup ma'i dei' atef God nifi'i numafi epes Ananisi nupe dembinai ma esis ea' epes hiesi sotolona. Na'ama Jisas na'i basef amama womun etin ¹²na'i, "Anona aman dembinai na'i nefe' anona wambel laogoma ma esis sonda'ana nope king. Anona nemaf anan notanima nifi'i. ¹³Ea' nofalai anom amam 10-peleim manda' maol ananinai, ea' natambe' moni 20 kina nandahama amam. Ea' na'ipam na'i, 'Ipe' penda' maolana moni anama pefe' petagama ae' etanima iefi'i.'

¹⁴Ea' esis wambel atona aman anamai ukup aoma anan endilisi. Ea' nafe' sasapa' anom amam magi'mana mafe' ma'i, 'Ape' mandaiwa'ma ine' nepe king ma ape'.'

¹⁵Owa'etin. Esis sanda'ana nataga nape king dembinai nape anom nimeguf, notanima nafi'i. Ea' na'i, 'Falai amam amama manda' maoli fowa' ae' ase'ama moni. Ae' a'i ata' egawa moni wamanai ma'ufina amam hiami atona etin mofa'anai.'

¹⁶Ea' nali'i nafi'i na'ipana na'i, 'Dembinai, ae' anda' maol 20 kina anama ine'inai anda' maolanana dei' efa'ai 200 kina wamanai.'

¹⁷Ea' dembinai na'ipana na'i, 'Ine' nanda' maol andeande'. Ine' nimafi moni anama kwawie'una andeande'. Dei' ese'ena agel lu'unai ine' ma nimafi taun lu'wagoma 10-peleina.'

¹⁸Ea' anona nafe'ma biami nafi'i na'ipana na'i, 'Dembinai, ae' anda' maola 20 kina ine'inai dei' etanima efa'ai 100 kina wamanai wapoti'.'

¹⁹Ea' dembinai na'ipana na'i, 'Ae' enda'ena nimafi taun lu'wagoma 5-peleina.'

²⁰Ea' anona nagi'i nafi'i wapoti' na'ipana na'i, 'Dembinai, 20 kina ine'inai anae'. Ae' ewa'ana hankisip ambe'ana na'oh. ²¹Ae' egawa ine'

aman la'ifinai. Anom amamaga enis epes sambe'am ma'ih, amama ine' nefa'am. Gwa'aimi enin epen nawami, amama ine' nala'ami. Na'ama ae' ombamahe ma ine'. Ea' dei' ewa'ana moni anama na'omena.'

²²Ea' dembinai na'ipana na'i, 'Ine' nanda' maoli, ine' epen awinai natotopa' basefi. Basef ine'imi atom ewalogen. Dei' ine' negawa ae' aman la'ifiwei ala' gwa'aimi anona aman nawami. ²³I'i ine' negawa na'amai, dei' nefa'ana nembe'ana beng a ae' etanima ifi'i efa'ana neloma anona wamanai wapoti.'

²⁴Ea' na'ipa esis saitu na'ama felefele'i na'i, 'Ipe' dalombana 20 kina aman anama pese'anana aman anama nafa' moni 200 kinai.'

²⁵Ea' esis sa'ipana sa'i, 'Dembinai, anan nafa' 200 kina ea.'

²⁶Ea' anan na'i, "Ae' a'ipipa, emi egafis sohapila amamaga amama nambimb ese'asa anom amamaga wapoti' esis. Ea' emi egafis owa' sehapila anom amamaga, amamaga kwawie'um esis sahapilami, amama nambimb ae' endalombasam. ²⁷Ea' esis isima satago naumbih ae'asi, sandaiwa'ma ae' epe dembiwei king asasiwei imafias, ipe' fa'as fi'i na'ae pehas ma naep ae'ami.' "

Jisas nafe' nawis Jerusalem si'i anona dembinai king

(Mt 21:1-11; Mk 11:1-11; Jo 12:12-19)

²⁸Jisas na'i basef amama ea' nali' nafe' naila eaf nafe' Jerusalemi nondowasa'. ²⁹Ea' nataga Betfagei Betani wambel anama felefele'ma halaf anama oliv motawama ea' nasapa' alupumi ananiami biom mali' mafe'. ³⁰Na'ipam na'i, "Ipe' bipa pefe' wambel nanima nape gani wa'ili felefele'ma na'ae. Pefe' piwis piti anona mafin donki sa'unai esis saundana nail. Ina dei' enin epen natomana, ata' owa'. Petagahona pefa'ana pifi'mai ae'. ³¹I'i enin epen nihali'ipa ni'i, 'Patagahona ma main?' ea' pegwaman pi'ipan pi'i, 'Dembinai afa'inai na'ipafa na'i nonda' maolanana.' "

³²Ea' amam biom mafe' mati amamaga amama na'ama etin si'i do'ok na'ipam. ³³Ea' matagaha mandofa donki anama sa'unai. Matagahona etin, amam mumafi donki anamai ma'ipam ma'i, "Dei' maina ipe' patagaha donki anama?"

³⁴Ea' amam ma'ipam ma'i, "Dembinai na'i nonda' anona maolanana."

³⁵Ea' amam mofa' donki anama mafi'mai Jisas mawamona sagegw amamumi matoma ilifa donki anama. ³⁶Ea' magiambama Jisas nalata natoma donki anama nafe', ea' esis amam nematawa sa'i sefela agel ananinai lu'una. Ea' dei' sambe'amanam sagegw sase'wiam eaf sofalo'mana.

³⁷Anan nafi'i felefele'ma eaf nakini'i halaf lawah oliv motawama, alupusi ananisi hiesi sandanifel, ukup mapoma amamaga amama pepel fowa' nanda'anai. Ea' sanda' la kolo' sa'oh mehip, safela agel Godi lu'una.

³⁸ Sa'iam na'ama sa'i,

“Ape' mefela agel God nape ilifi lu'una, howalagon anan atona. Ma'i anan nofalo'ma ine' dembinai king nafi'i agel Ananinai nese'ena pepel ma nenda' maol Ananinai. Esis sape heveni opalef awanem.”

³⁹ Ea' anom dambami Farisi mape maloma epes hiesi ma'ipa Jisas ma'i, “Dembinai Tisa, ine' ninifala alupusi ine'isi ma ata' sosopama malogof.”

⁴⁰ Ea' Jisas nagwamasa basef na'i, “Ae' a'ipipa endilisi, i'i esis seasopama malogof, atuwasi otamba atom ma'oh etapi mope mi'i mehup.”

Jisas nalopa Jerusalem

⁴¹ Ea' Jisas nataga felefele'ma Jerusalem natologon nalopagon. Nalopa esis amam nematawa sape sape taun anamaisi. ⁴² Ea' na'i, “I'i dei' nemaf anae' atona ipe' pegawa basef ofagema ma pepe opalef awanem, amama andeande'. Owa'etin. Basef amama ata' mandambahe', dei' ipe' owa' ata' pegawam. ⁴³ Anona nemaf netaga, naumbih ipe'isi sifi'i sola' indalelemb sonda' wandaf sili'akwepa. Ea' sili'akwepa endilisi ma anama hiagoma. ⁴⁴ Ea' sehempa sohambombagepa endilisi, peloma awasi ipe'isi sape nomona wambel ipe'inai. Esis sohambombaga wambel awagon hi'ilagon endilisi, ea' ina nambimb otamba sala' ifagwami mondapapei'ma etin mope, owa'. Mo'oh deindei'. Dei' main? Ipe' owa' pegawa nemaf dei' God niefi'anai ma nefa'epa pitanimani pepe andeande', owa'.”

Jisas nagalo'mas amam manda' bisnisi ipat lu'unai

Godi sanda' lotuwanai nomon

(Mt 21:12-17; Mk 11:15-19; Jo 2:13-22)

⁴⁵ Ea' Jisas nehafel nawis ipat lu'unai Godi sanda' lotuwanai ea' nagalo'mas amam amama manda' bisnisi matala amamaga ipat anama nomon. ⁴⁶ Anan na'ipam na'i, “Basef mape Baibeli, God na'i, ‘Ipat ae'anai nondapoma esis sifi'i sopama sonda' beten sohali' Ae'.' Ea' ipe' panda'ana nataga si'i sanda' walanai.”

⁴⁷ Nimeguf hiami Jisas nawalipasa basef ipat anama nomon. Ea' amam pris dambami maloma amam agufumi Judai maloma amam mawalipasa mi'uli Godi magolopa eafa mohana neaga'. ⁴⁸ Ea' esis amam nematawa hiesi ukup bo'om endilisi ma seame' basef ananimi. Na'ama amam ina mati anona eafa meahana, owa'.

Esis sahali' Jisas sa'i, emi nase'ana agel lu'unai

(Mt 21:23-27; Mk 11:27-33)

20 ¹ Anona nemaf Jisas nape nase'asa basef amam nematawa ipat lu'unai Godi nomon, nawalapa basef bu'wami Godi. Ea' amam pris dambami maloma amam mawalipasa mi'uli Godi maloma agufumi amam Judai mafi'mai anan. ² Ea' mahali'ana ma'i, “Ine' ni'ipafa. Ine'

nanda' maol anama ma pepel emina? Emi na'ipina dei' nape dembinai nanda' maol anama?"

³Ea' Jisas nagwamama basef na'i, "Ae' wapoti' a'i ihali'ipama anom basef pi'ipiam. ⁴Aman anama Jon napisi'as embeli, God nape heveni na'ipana napisi'as o enin epen etapani na'ipana?"

⁵Ea' amam mame' basef amama manda'ipama ma'i, "Afa' wi'i, 'God nape heveni na'ipa Jon napisi'asi', atuwasi anan ni'ipafa ni'i, 'Dei' maina ipe' owa' pembale'efana?' ⁶Ea' afa' wi'i, 'Enin epen nape etapanai na'ipana', na'ama esis amam nematawa sohafa. Dei' main, hiesi sa'i Jon anona profet dembinai."

⁷Ea' magwamana basef Jisas ma'i, "Afa' ina ogawana."

⁸Ea' Jisas na'ipam na'i, "Na'ama etin ae' ina i'ipipa ma emi nase'e agel lu'unai anda' maol anama Ae'anai, owa'."

Basef womun etina epes awami mumafi aof sawa mandalef wainim
(Mt 21:33-46; Mk 12:1-12)

⁹Ea' Jisas na'ipasa basef amama womun etin esis amam nematawa na'i, "Anona aman nanda' anona aof nawa wain. Ea' nakwahomana aof anama anom amam monda' maolana aof anama mofa' monianai. Ea' nafe' napani nogota launai anona wambel laogoma. ¹⁰Ama nogota su'utitip mailanai, anan nafamona aofi nasapa' anona nanda' maoli nafe'ma amam manda' maol aof ananinai. Anan na'i amam mose'ana anom su'utitip gwa'aimi ma aof anama. Ea' amam mahana matofana notanima nafe'.

¹¹Ea' nafamona aofi nasapa' anona nanda' maoli nafe' wapoti' ma amam, ea' mahana wapoti' manda'ana aona matofana nafa' nafe'. ¹²Ea' nasapa' anona nafe'ma wenifi. Ea' amam mahana makwahona nawis ande'.

¹³Ea' anan nafamona aofi na'i, 'Ae' ata' enda' main? Nogalome ae'anai ae' okom nainailana, esapa'ana nofo'o. Nambimb mome' malogel ananinai o owa'?"

¹⁴Ea' amam mati nogalomana ananinai nafi'i, manda'ipama etin ma'i, 'Aman anama anona nemaf nofa' amamaga hiami ahalomanai. Afa' ohana ma afa' atofa ofa' aof anae'.

¹⁵Ea' mahana makwahona nawis aof ande'ana, mahana afuna. Ea' nambimb anan nafamona aofi nonda' maina amam? ¹⁶Nambimb nifi'i noham afum hi'ilam, nose'asa aof anama nofe'ma enis epes."

Esis same' basef amama sa'i, "Waf anama aonai endilisi. Afa' wandaiwa'mana."

¹⁷Ea' Jisas natilisi andeande' na'ipas na'i, "Ea' na'ama etin si'i basef amama mape Baibeli ma'i,

'Owap anama amam mala' ipati magalo'mana, dei' nataga owap nape nali'i ma nembalo' ipat.'

Basef amama ofagema ma'i main? ¹⁸Emi egafis hilili'ilamas sowa owap anama, pepe'etas. Ea' i'i owap anama nowa nesali'as, loloweas si'i sopof atona."

¹⁹Ea' amam agufumi esis Judai mogawa Anan na'i basef amama womun etini mondela'wifa amam. Ea' ma'i mombalo'ana. Ea' amam umbamahama esis amam nematawa hiesi.

**Amam mahali' Jisasa esis sease'ana takis Sisar
gavman dembinai Romunai o owa'?**

(Mt 22:15-22; Mk 12:13-17)

²⁰Ea' amam mawalipasa mi'uli Godi maloma amam pris dambami manda'ana naep di'indi'ana ma mombalo'ana mofa'ana. Ea' masapa' anom amam mafi'i matolona. Amam amama manda' doufindouf mambaso'am ma'i amam manda' waf endilisinai. Owa'etin. Amam ma'i mombalo'a Jisasa anom basef na'iami ma moso' anan neafe'ma gavman dembinai ma nonda' kotimana.

²¹Ea' mahali' Jisas ma'i, “Dembinai tisa, ape' mogawena basef ine'imi bu'wami atom na'ipasam esis amam nematawa. Ine' na'i basef atifima epes isima hiesi agufisi saloma isima agof a'asi na'ama etin hi'alas. Ine' na'ipasa basef maloma waf bu'unai Godi endilisi ma epes hiesi. ²²Mi'uli ape'inai na'iam na'imama? Ape' mose'ana takis Sisar gavman dembinai esis Romi o owa'?”

²³Jisas negawa ea' ma baso'am amamunai. Ea' na'ipam na'i, ²⁴“Ipe' pih'ambe anona moni ma ata' itolona. Ambal naloma agel anama mailanai emina?”

Ea' ma'i, “Amama gavman dembinai Sisar esis Romi.”

²⁵Ea' nagwamam na'ipam na'i, “Ea' amamaga Sisari, amama pese'anam Sisar. Ea' amamaga Godi, pese'anam God.”

²⁶Ea' amam ina la'ifima mombalo'ana ma anom basefa naep esis amam nematawa hiesi, owa'. Amam ukup matamea ma basef amama na'ipamami, ea' masopama malogof tol mape.

Amam manda' doufindouf mahali' Jisasa epes saga'i sohafel wapoti'

(Mt 22:23-33; Mk 12:18-27)

²⁷Anom Sadyusi mafi'mai Jisas. Amam hiami mombale'ef saga'i ina anona nemaf sotanima sohafel wapoti', owa'. ²⁸Ea' mahali'ana ma'i, “Dembinai tisa, fowa' gani Moses nanda' anom basef mail buki ma ape' ma'i, 'I'i anona aman noga' ma anan awasi a'ana, waulu'mana ata' kope, owalomana ananinai nose'akwa nola enis awasi ma soho'ofana.’ ²⁹Ea' fowa' amam wambota atotona 7-peleim mape. Nali'i sahalomam nase'akw so'uso'win a'akw naga' nakwaho'w kwape. ³⁰Ea' owalomana nafela'w nase'akw. ³¹Ea' anona owalomana la'efinai wapoti' nanda'am na'ama etin, ea' anona natu'ulanai nase'akw manda'am na'ama etin mafe' matagama owagufunai akutainai. Amam amama wambutaim 7-peleim ina mola enis awasi, owa'. Maga' etin hi'alam. ³²Anona nemaf

nemata'w waulu'mam kwagi'mam kwagi' kwaga!. ³³Ea' anona nemaf esis saga'i sohafel wapoti', nemata'w akwama kope nemata'w emi'wi? Amam 7-peleim mase'akw hi'alam.”

³⁴Ea' Jisas na'ipam na'i, “Amam nematawa nogota anae'isi dei' sandase'ama. ³⁵Ea' emi egafis God na'i bo'wes andeande'ma sotanima sohafel wapoti' sope namusi nemaf anama etap dambainai neataga ina sendase'ama, owa!. ³⁶Esis ina sogal' wapoti', owa!. Sopen si'i ensel Godi. Sotanima sohafel hi'agilif wapoti'. Na'ama sope awasi Godi. ³⁷Basef amama ma saga'i sotanima sohafel wapoti', amama fowa' gani Moses nihi'ambepam nif ilalowa mataga lawag sa'unai fandonai, ma'i anan nofala Dembinai na'i

‘Ae' God Abrahama, Aisaki, naloma Jekopi.’

³⁸Basef amama ma'i God ina Dembinai ma epes isima saga'i, owa!. Anan Dembinai ma epes isima sape namusi. Dei' main, epes hiesi sape namisa naep Godi hi'alas.”

³⁹⁻⁴⁰Jisas na'iam na'ama, amam mawalipasa mi'uli Godi umbamahama mohali'ana ma anom basef wapoti'. Ea' anom magwamana basef ma'i, “Dembinai Tisa, ine' na'iam andeande'.”

Jisas nahali' amam Farisi ma Kraisi anan nogalomana emina'i

(Mt 22:41-46; Mk 12:35-37)

⁴¹Ea' Jisas na'ipam na'i, “Amam ma'i Kraisi, God nasapa'ana nafi'i anan akunamana Deviti. Ma'i Kraisi aman atona falafunai si'i epes sape etapi. Dei' maina amam ma'iam na'ama ma Kraisi? ⁴²Buk anama Songi Devit na'i na'ama na'i,

'Dembinai God na'ipa Dembinai ae'anai na'i, “Ine' nepe lagel da'isinai ae'anai,

⁴³la'ela'ef nefe' netagama anona nemaf ae' enda' naumbih ine'isi sefe' owina ine' si'i sia bo'wagah ine'imi maituma.” ’

⁴⁴Devit fowa' gani nofala Kraisi na'i anan Dembinai. Amama atom Kraisi ina aman atona falafunai, owa!. Anan Dembinai. Dei' maina Devit nofala Kraisi akunamana ananinai?”

Jisas na'i waf aonai amam tisa mawalipasa mi'uli Godi manda'anai

(Mt 23:1-36; Mk 12:38-40; Lu 11:37-54)

⁴⁵Amam nematawa hiesi ata' sape same' basef amama, Jisas na'ipa alupumi ananini na'i, ⁴⁶“Ipe' pindumafuma amam amama mawalipasa mi'uli Godi. Amam ma'i mundawisam luwaguf bu'wami atom mefe', si'i dambami atom mandawisami. Ma'i enis epes sotolom sondalalimam sonda'mam nemaf bu'unai sinifelom anama lu'wagoma ma naep hiesi sandatama sapoma ma sefela agof amamumi lu'um. Ea' amam ukup ma'i siaifah amama motawa mali'i atom, dambami atom mapoma, nomon

ifagw esis Juda hiesi sa'i basef sapeimi o anama hiesi sandakolasam nimeguf amama sanda' gwa'aimi lu'wami. ⁴⁷Amam amama mawis ifagw amama nematawa alifiwai, manda' wala amamaga awoumi. Ea' manda' beten launai etina esis sotolom si'i amam bu'wami. Anona nemaf God nowaloga epes hiesi, enis epes owa' seanda' waf aonai na'amainai sofa' nimanimi kwawie'um ea' amam mofa' nimanimi lu'wami endilisi."

Nemata'w alifi'wi kwanda' ofa kwase' God

21 ¹Ea' Jisas nape ipat lu'unai Godi natologon tulif nati enis epes moni hianaisi sakwaha moni nowala bokis moni nalami soaso' God. ²Ea' nati ano'w nemata'w alifi'wi kwala moni sa'unai biefina newala bokis amama. ³Ea' na'i, "Ae' a'ipipa endilisi, nemata'w akwama alifi'wi kwa'waha moni lu'unai nikila' otamba hiami esis amam nematawa hiesi sakwahomi. ⁴Epes isima hiesi moni hianai na'omas sakwaha tu'wanina atona newala bokis. Ea' nemata'w akwama moni a'akw endilisi kwa'waha moni akwa'inai hi'alana. Ea' owa' anona no'oh kweatala gwa'aimi, owa'. Ea' moni akwa'inai biefina sa'unai nikila' moni hianai esis sakwahonai."

Jisas na'i anona nemaf ipat Godi lu'unai sanda' lotuwanai aona hi'ilana

⁵Anom alupumi Jisasi ma'i basefa ipat lu'unai Godi sanda' lotuwanai ma'i, "Esis sofalo'ma ipat anama otamba bu'wami amamaga bu'wami esis amam nematawa sase'anam Godi."

Ea' Jisas na'i, ⁶"Amamaga amama dei' patulumi, anona nemaf dahandahama neataga, ina anom otamba mandapapei'ma etin la'ifima mopan, owa'. Sugulatam sowalom hi'ilam mofe' mo'oh atona etin hi'ilam."

Jisas na'i amamaga nimanimi hiami anona nemaf motaga

⁷Ea' mahali'ana ma'i, "Dembina'i Tisa, maina nemaf amama motaga? Maina ikwaf nili' netaga ma afa' weagawa amama felefele' motaga?"

⁸Ea' Jisas na'i, "Ipe' pindumafuma pepe. Na'ama enis epes sombaso'mepa. Epes hiesi anona nemaf sifi'i si'i agel ae'anai si'i, 'Ae' ea' ma'uwu.' Ea' enis si'i, 'Dei' nemaf nafi'i felefele' ea'.' Ipe' ina pefe' pila esis, owa'. Hapeimi. ⁹Anona nemaf peme'asa basefa wandaf lu'unai hianai ea' enis si'i sondaiwa'ma amam gavman dambami mumafias sonda' wandaf. Nemaf anama ipe' ina umbamohepa, owa'. Amamaga amama ata' mili' motaga, ea' nemaf akutainai ina notaga mehipe, ata' owa'."

¹⁰Ea' na'ipam na'i, "Enis epes sape etap hiagoma sefela wandaf sopa' soloma esis sape anona etap hiagoma. Anona aman dembinai king no'wa enis wambel hiagoma ananisi sopa' soloma anona dembinai king no'wa ananisi anona wambel hiagoma. ¹¹Anona nemaf sowambon lu'unai

nokoto' etap hiagoma. Anagon nolomeahas lu'unai neatagamas, wambel hiagoma ea' awes lu'unai notaga wambel hiagoma. Esis anona nemaf siti gani ilif ikwaf lu'unai neatagama amamaga mamumami monda' epes umbameahas endilisi.

¹²Amamaga amama hiami ina motaga mehip, ata' owa'. Esis sili' sombalo' ipe' paila basef ae'ami. Ea' sonda'epa kwapete'epa. Sonda'mepa kot nomon ifagw esis Juda sa'i basef sapeimi ea' sonda'epa penda' kalabus. Ea' sofa'epa pefe' sohaponepa pitu naep amam king moloma gavman dambami. Ipe' pefela agel ae'anai paila basef ae'ami. Amama atom sonda'epa na'ama. ¹³Sonda'mepa waf anamanai si'i anona eafa pewalapa basef bu'wami pi'ipiasam. ¹⁴Ea' ipe' pihapila nomonas ipe'imi mope la'ifim, ama ipe' ina ukup mopoma anom basef pi'i pegwamasam mehip, owa'. ¹⁵Dei' main, nemaf anama ae' atowe enda' basef mope malogof ipe'imi ese'epa gawa bu'unai ma epes isima ina la'ifisa seagwa basef amama ae' iesi'ipami, owa'. ¹⁶Ehasepa mamasepa sahin owan esimbel atom ipe'isi soloma alupisi, esis wapoti' anona nemaf sowalapepa ma naumbih ipe'isi. Ea' soha enipa pega'. ¹⁷Anona nemaf epes hiesi wambel hiagoma opalef aoma ipe' endilisi. Esis sati ipe' paila basef ae'ami, na'ama dei' sahepa. ¹⁸Ea' ipe' ina nambimb pega', owa'etin. Ina anona auf atotona nape balagah ipe'imi higililana, owa'. ¹⁹Ipe' pepe la'ifipa ma anona nemaf pefa' ambal namunai.

Jisas na'i basefa Jerusalem anona nemaf notaga awagon

²⁰Nemaf anama ipe' piti soldia hiami esis naumbih sifi'i sonauli' Jerusalem, ipe' pegawa nambimb felefele'ma taun anama lu'unai neataga aona. ²¹Nemaf anama amam nematawa sape etap hiagoma Judiai sofa' sefe' sondowasa' halafutagw. Ea' esis amam nematawa sape nomon Jerusalemi sokwaha wambel anama sofa' sefe' laogon. Ea' isima sape aof wambel anama, ina ata' sefe' suwis, owa'. ²²Dei' main, nemaf anama God nogwamasa awami isima sanda' waf aonai si'i basef hiami mail buk Baibeli mondawalap alihim endilisi. ²³Nematawa opafuwai waloma awama awasi ata' sa' nomagof atomi, ae' a'i awau uwahipiwa endilisi ma nogota anama ofa' nimanimi lu'wami. Nimanimi amama aom endilisi motaga etap anae' ma okom wandafunai Godi nambimb neafe'ma epes isima. ²⁴Enis, bainat nohas soga'. Enis, naumbih sonda' kalabusimas sofa'as sefe' sope etap anae' hiagoma hi'ilagon. Ea' epes isima sololama Godi sotaga sofa'asa wambel anama Jerusalem bo'wagah asasimi sumafiagon. Ea' sope la'ela'ef sefe' na'ama etina nemaf God nandandepanai ma nogota asasinai hi'ilana.”

Jisas na'i, “Anona nemaf ae' ataga epen endilisiwei ifi'i.”

²⁵“Nemaf anama ikwaf hianai notagama aon alipunai owambunai neloma ondowa. Etap anae' amam nematawa hiesi sape anona etap lu'unai

hiagoma gegela'asis kwapete'as. Esis umba mohas kwapete'as ma naoh lu'wami mohafel lu'um mowa bililig etin ea' sowa selef. ²⁶Ea' ondowa maim mape gani ilifi mondakoto' bolatin mofe' mifi'i mope. Na'ama esis amam nematawa hiesi umbamohas kwapete'as sowa so'oh etap si'i saga'i. Esis ukup mopoma amamaga amama ma'i meataga etap anae'.

²⁷Ae' ataga epen endilisiwei. Nemaf anama siti ae' eloma elagw otaga ilif ifi'i eloma amamaga mafifili bu'wami Godi moloma pepel ananinai. ²⁸Nemaf anama amamaga amama mohafel, ipe' pitu piniga. Dei' main, nemaf anama felefele'ma neataga God notagahipa ma waf aonai ipe' panda'anai nofa'epa petanimani.”

Lawag fik nanda'am nihi'ambapa mogawa nogota anama amamaga meatagai

²⁹Ea' Jisas na'ipasa basef womun etin na'i, “Ipe' piti lawag anama fik noloma lawah hiami wapoti'. ³⁰Ipe' piti elif monafa ma masowa, pegawa nogota anama nelemb ea' felefele'ma meaof. ³¹Ea' na'ama etin, i'i ipe' piti amamaga amama ae' ali' a'ipipami motaga, ipe' pegawa nemaf anama Kraisa a' nifi'i nupe dembinai numafi epes hiesi Ananisi felefele'ma neataga.

³²Ae' a'ipipa endilisi, amam nematawa dei' ata' papani ina nambimb pega' mehip, ata' owa', ipe' piti amamaga amama hiami motaga hi'ilam. ³³Otaga noloma etap hiagoma anona nemaf a' higililam hi'ilam, ea' basef ae'ami ina hi'ilam, owa'. Mope la'ela'ef hihif.

Amam alupumi Jisasi mundumafuma andeande'ma mihi'ama waf hianai aonai

³⁴Ae' ataga epen endilisiwei. Ipe' pindumafuma andeande' nemaf anama ae' iefi'ianai. Na'ama penda' waf aonai penda' waf alop atonai, pea' embel la'ifimi hiami ukup motamea ma nimanimi mamumami etapami atom. I'i waf anama nose'elipa hi'ilipa, nemaf anama ae' iefi'ianai notagamepa mehip si'i sakwaha wambawa saha mafis. ³⁵Nemaf anama notaga ma amam nematawa hiesi sape etap hiagomai ganigani hi'alas na'ama etin. ³⁶La'ela'ef pindumafuma pepe ma ina penda' waf aonai anama, owa'. Pepe penda' beten la'ela'ef ma God nose'epa pepel pitu la'ifipama pihi'ama amamaga amama ma'i meatagamipei. Ama pitu la'ifipa ma ae' ataga epen endilisiwei isimba'epa ewalogepa.”

³⁷Nimeguf hiami la'ela'ef Jisas nape nawalipa esis amam nematawa ipat lu'unai Godi nomon, ea' owamb nafe' na'ihhi halaf anama oliv motawama. ³⁸Ea' amam nematawa hiesi sohafel kuhumbita atona safi'mai anona seme' basef ananiami ipat lu'unai Godi la'ela'ef.

Judas na'i basef la'ifimi naloma agufumi Juda ma nihi'ambamam Jisas napoma

22 ¹Felefele'ma nemaf anama Pasova sonda' gwa'aimi lu'wami esis Juda sogwa' bret owa' neatef lu'unaia felefele'ma netaga. ²Ea'

amam pris maloma amam mawalipasa mi'uli Godi magolopa eafa moha Jisas neaga'. Dei' main, amam umbamahama esis amam nematawa.

³Ea' Satan nawis okom Judasi Kariotinai. Anan amam 12-peleim alupumi Jisasi. ⁴Ea' Judas nafe'ma amam pris dambami maloma amam plisman dambami mumafi ipat lu'unai Godi. Amam amama ma'i basef mandame'mama Judas nogolopa eafa nease'ama Jisas nofe' lagof amamumi. ⁵Ea' mandanifel ma'i basef mandame'mama mose'ana anom otamba Judas. ⁶Ea' anan na'i a'e ma basef amamumi, ea' nafe' nagolopa eafa nihi'ambama Jisas amam meambale'ana. Anan nahafa anona nemaf ma owa' enis amam nematawa sope solomana.

Alupumi biam mandondomba gwa'aimi lu'wami Pasova

⁷Nemaf anama nataga esis Juda sa'i sonda' anom gwa'aimi lu'wami sea' anona bret owa' neatifi. Anama sa'i soha anom sipsip nogami hiami ma sonda' gwa'aimi amama Pasova. ⁸Ea' Jisas nasapa' Pita naloma Jon na'ipam na'i, "Ipe' bipa pefe' pendondombamafa gwa'aimi amama Pasova ma afa' weagwa'am."

⁹Ea' amam mahali'ana ma'i, "Ine' na'i afa' ofe' ondondomba ipat enima?"

¹⁰Ea' na'ipam na'i, "Peme', ipe' pefe' piwis gani wambel lu'unai, atuwasi piti anona aman nofa' embel malep lu'unai nitilipa eaf. Ea' pigi'mana pefe' piwis ipat anama anan nefe' niowisanai. ¹¹Ea' pihali' ofagena ma ipat anamai pi'i, 'Tisa afa'inai na'ipafa na'i, ipat anama sapeinai netawa eti? Anan na'i no'wa afa' atofa alupufai ope onda' gwa'aimi amama lu'wami Pasova.' ¹²Ea' anan nihi'ambepa rum anama lu'unai nape ilifi, tebol siaifah ma'oh etifim. Ipe' pendondomba gwa'aimi rum anama."

¹³Ea' amam mafe' mati amamaga amama na'ama etin si'i Jisas nali' na'ipamam ea' mandondomba gwa'aimi amama Pasova.

Jisas nase'ama bret naloma embel wain alupumi ananiami ma'am

¹⁴Nogota a' nataga ma sogwa' gwa'aimi amama lu'wami Pasova, Jisas nao'wa alupumi ananiami mafi'i mape, anan nafe' nape felefele'ma tebol.

¹⁵Ea' na'ipam na'i, "Ae' okom na'i ata' ea' gwa'aimi amama Pasova elomepa uli', ma atuwasi efa' nimanini awami. ¹⁶Ae' a'lipipa endilisi, ae' ina ata' ea' gwa'aimi amama Pasova wapoti', owa'. Anona nemaf basefa gwa'aimi amama Pasova ofagema motaga mondawalap alihim anama wambel Godi, eagwa'am wapoti'." ¹⁷Ea' anan nafela anona kap embel wain nalami nanifela God na'i, "Ipe' fela embel amama pendandamam. ¹⁸Ae' a'lipipa, dei' anona nemaf wapoti' ae' ina ea' embel wainim elomepa, owa'. Anona nemaf epes hiesi siowis wambota Godi numafias wambel Ananinai, ae' ea' embel wain anama wapoti' elomepa."

¹⁹Ea' anan nafelai bret nanifela God nawalona nase'am na'i, "Bret anama alop ae'anai. [Ae' ase'epana ma iegiangamepa. Penda'am la'ela'efa ukup mopoma ae'."

²⁰ Amam ma'am hi'alam, nanda'am na'ama etina anona kap embel wain nalami, na'i, "Wain embel amama esimbel ae'ami manda' basef Godi dambaimi endilisimi mataga la'ifim. Esimbel amama ae' ekolo'wama iegiangamepa.] ²¹ Ea' ipe' piti aman anama na'i nowalapa ae' ma amam naumbih ae'ami, nape na' gwa'aimi nalome tebol amae'. ²² Ae' ataga epen endilisiwei, naman ega' si'i eaf fowa' gani God nandandepanai. Ea' aman anama neawalape ma amam naumbih, ae' ati uwahipina endilisi. Dei' main, nimanimi lu'wami motagamana."

²³ Anan na'iam na'ama, alupumi ananimi atom mandahahali'ma ma'i, "Epen afa'ini emi atuwasi neanda' waf anama?"

Alupumi Jisasi ma'i basef mandahihianamam ma'i emi nepe nili' ma amam

²⁴ Amam alupumi Jisasi ma'i anom basef mandahihi'anamam ma'i, "Emi nepe dembinai afa'inai?"

²⁵ Ea' Jisas na'ipam na'i, "Amom king dambami ma esis hiesi sololama Godi sape lu'wagoma, mape dambami اساسي manda'as kwapete'as. Amam mumafi esis la'ifim, ea' ma'i esis sofalam agof lu'wami si'i manda' waf bu'unai mihiangamepa. ²⁶ Ea' ipe' ina penda'am na'ama, owa'. Emi egalini ni'i nope dembeni ma ipe', anan ata' nope si'i amama agof a'ami si'i isima sanda' maoli ma segiangamepa. ²⁷ Emi epen dambeni nikila' enis epes? Epen natoma na' gwa'aimi teboli o epen nanda' gwa'aimi nefa'am nafa'manai? Ea' ae' ape alomepa si'i nanda' maoli ma iegiangamepa. ²⁸ Fowa' amamaga amama magwamba ae'i, nimeguf amama ipe' pape palome, ipe' ina pakwahowe, owa'etin. ²⁹ Ahalome ae'anai nase'e agel lu'unai na'ipi ape dembiwei, imafi enis epes. Ea' na'ama etin ae' ese'epa agof lu'wami i'ipipa pepe dembipei king pimafi enis epes. ³⁰ Nema'anama ipe' pepe dembipei king peloma ae' pea' gwa'aimi embel pelome tebol ae'ami wambel Godi. Ea' pepe siaifah bu'wami amam dambami kingi, pewaloga epes wambotagw 12-peleim ape'isi Israel."

Jisas na'ipa esis na'ama na'i, "Atuwasi Pita nembaho' agel ae'anai ni'i, 'Ae' ina egawa Jisas.' "

³¹ Ea' Jisas na'i, "Saimon, Saimon, ine' neme'. God na'i a'e ma Satan nogwamba ipe' ma penda' waf aonai si'i sandilama rais ama bu'wami mafe' anagon awami mafe' anagon. ³² Owa'etin. Ae' anda' betena egiambamena ma nembale'efa ae' la'ela'ef. Atuwasi nemboma opaf nenda' owapena ine'imi motaga la'ifim."

³³ Ea' Pita nagwamana basef na'ipana na'i, "Dembinai, ae' andandombam elomena weafe' kalabus. Ea' ae' andandombam ega' ealomena wapoti'."

³⁴ Ea' Jisas nagwamana basef na'i, "Pita, ae' a'ipina endilisi! Atuwasi owamb anae' awata ata' owa' neanda'am, ine' nembaho' agel ae'anai ni'i wenif ni'i, 'Ae' owa' egawa Jisase.' "

Jisas na'ipam basef amama ma paos maloma brasbeli su

³⁵Ea' Jisas na'ipa amam na'i, "Fowa' ae' asapa'epa pandailagof pafe', ipe' ina pefa' paos moni nalami maloma brasbeli su, owa'. Pafe' etin. Nemaf anama anom amamaga a'epa o owa'?"

Amam magwam ma'i, "Owa'etin."

³⁶Ea' Jisas na'ipam na'ama na'i, "Ea' emi dei' aman paos moni nalami ma'omanai anan nefa'am. Ea' brasbel wapoti' na'ama etin. Aman bainat a'anai anan nose'asa saket ananinai enis sotalona, notala anona bainat.

³⁷Dei' main, anom basef ma ae' felefele'ma motaga mondawalap. Anom basef mail Buk Baibeli fowa' gani ma'iam na'ama ma'i, 'Esis ukup ma'i ae' epen aowei atowe.'

Ae' a'ipipa endilisi! Basef amama felefele' motaga endilisi ma nimanimi lu'wami atuwasi motaga ma ae'."

³⁸Ea' alupumi ananiami ma'i, "Dembina, ine' niti. Afa' bainah biam amae'."

Ea' nagwamam na'ipam na'i, "Ea' amama."

Jisas nanda' beten anagon lawah oliv motawama agiliguma Getsemani

³⁹Ea' Jisas nakwaha taun nawis ande' nafe' halaf lawah oliv motawama si'i la'la'ef nanda'am. Ea' alupumi ananiami magi'mana mafe'.

⁴⁰Anan nataga na'ama na'ipam na'i, "Ipe' penda' betena amamaga meagwambaipi ina motagamepa, owa'."

⁴¹Ea' nakwaha amam nindiki'ah nafa'o felefele', nogota bandana si'i aman nakwaha anona otam nafe' nowama. Ea' nindiwa nembawa notawa nanda' beten na'i, ⁴²"Ahalome, ine' ni'i a'e, nekwahome kap anama. Ea' ine' nila okom ine'inai atona, ae' owa'." [⁴³Ea' anona ensel nafi'i heven ilif nase'ana pepel. ⁴⁴Jisas name' nimanimi ea' aom endilisi, ea' nanda' beten la'ifinai endilisi, agwah mandana si'i esimbel malo etap.]

⁴⁵Anan nanda' beten ea' nohafel nafe'ma alupumi ananiami. Ea' nati amam ukup nimanim ambeh maham ma'oh etin. ⁴⁶Ea' na'i, "Dei' maina ipe' pa'oh? Ipe' hafel penda' beten. Na'ama amamaga meagwambipei mafi'i fele' ea' motagamepa."

Judas na'ipa amam naumbih ma Jisas napoma, ea' mafi'i mofa'ana

⁴⁷Jisas ata' na'i etin, amam hiami mafi'i. Aman anama sofalana sa'i Judas, anan alupunai amam 12-peleim Jisasi, nafi'i nali'ma amam. Anan nafi'i felefele'ma Jisasa neasisi' dalogw ananiami. ⁴⁸Ea' Jisas na'ipana na'i, "Judas, ae' ataga epen endilisiwei. Ine' nasisi'i nihi'amba amam naumbih ae'ami?"

⁴⁹Alupumi ananiami mape malomana mati amam naumbih Jisasi ma'i mombalo'ana mohana ea' mahali' Jisas ma'i, "Dembina, ine' na'i afa' oham bainah?"

⁵⁰Ea' anona alupunai ananinai naha anona aman nanda'mana maola pris dembinai nape nali'ma pris hiami ea' natopa' aliga da'isinai pele'atana nowa.

⁵¹Ea' Jisas na'ipana mehip na'i, "Kwaha waf anama."

Ea' Jisas nasa lagel aliga aman anamai, nataga bo'ona wapoti'.

⁵²Ea' Jisas na'ipa agufumi Judai maloma amam pris dambami maloma amam dambami mumafi polisman hiami mumafi ipat lu'unai Godi, mafi'i ma'i mombalo'ana. Ea' na'i, "Ipe' pefa'ai bainahi belep pafi'i si'i pa'i pewa' anona aman nanda' wandaf naloma gavmani?" ⁵³Nimeguf hiami la'ela'ef ae' ape alomepa ipat lu'unai Godi awalapa basef bu'wami ma esis amam nematawa hiesi, ea' ipe' owa' peambale'e. Ea' dei' nogota anae' nemaf ipe'inai. Dei' waf anama owambunai a' nikila' ae'."

Pita nambaso'am nembaho' agel Jisasi na'i, owa' nogawa Jisase

⁵⁴Ea' amam mombale'ana mofa'ana mafe' mawis ipat pris dembinai. Ea' Pita ina nalomam nafe' etin, owa'. Nagi'mam nafe' nape laogon. ⁵⁵Amam makata nif indaleleb anama nomon ipat napoma mapomam. Ea' Pita nape nalomam.

⁵⁶Ea' ano'w nemata'w kwanda' maoli kwati anan napoma nif. Ea' kwatolona kwa'i, "Aman anama wapoti' anan nape naloma Jisas."

⁵⁷Ea' Pita na'i, "Ehae', ae' owa'." Anan na'i, "Nemata'w, ae' ina egawa anan, owa'."

⁵⁸Ea' nogota bandana hi'alana, anona aman nati Pita na'i, "Ine' wapoti' ine' aman epes hiesi ananisi."

Ea' Pita na'i, "Aman, ae' owa'."

⁵⁹Ea' nogota bandana si'i aua atitin, anona aman na'i basef la'ifimi na'i, "Endilisi etis, aman anama wapoti' nape naloma anan. Dei' main, anan wapoti' Galilina'i atona."

⁶⁰Ea' Pita nagwamana basef na'i, "Ehae', ae' owa' egawa basef amama ine' na'iami."

Anan ata' na'iam etin, awata nanda'am. ⁶¹Ea' Dembinai nandamboma nati Pita, ea' okom Pitai nandanda' ma basef amama do'ok Dembinai na'ipanam na'i, "Owamb anae' awata ata' owa' neanda'am, ine' atuwasi nembaho' agel ae'anai ni'iam wenif ni'i, 'Ae' owa' egawa Jisase.'" ⁶²Ea' Pita nawisi nafe' ande' nalef mehip.

Amam soldia ma'i basef manda' Jisas findiwana mahana

⁶³Amam mumafi Jisasi manda' anan findiwana mahana. ⁶⁴Amam mapete' anona lowaf mambaho'mana naep mahali'ana ma'i, "Ine' ni'i basef profeti newalapa emi nahena." ⁶⁵Ea' manda' basef hiami awami wapoti' ma anan.

Amam manda'mana basef Jisas ma amam dambami gavman Judai

⁶⁶Ama aon natefi amam agufumi esis Judai maloma amam pris dambami maloma amam mawalipasa mi'uli Godi, amam hiami

mondowa'anima mape. Ea' mofa' Jisas mafi'mai amam mahali'ana ma'i, ⁶⁷“Ine' ni'ipafa. Ine' Krai, God nandandepena nasapa'ena nafi'i o owa'?”

Ea' Jisas nagwamama basef na'ipam na'i, “I'i ae' ipipa, ina atuwasi pembale'efam owa'. ⁶⁸Ea' i'i ihali'ipa ma anom basef, ipe' ina pegwam, owa'. ⁶⁹Ea' dei' anona nemaf wapoti' ae' ataga epen endilisiwei epe wa'ol lagel da'isinai Godi.”

⁷⁰Ea' amam hiami ma'i, “Dei' ine' God Nogalomana a'amon?”

Ea' anan nagwamama basef na'i, “Ipe' pa'iam ea' ma'um.”

⁷¹Ea' amam ma'i, “Afa' wa'i ata' ome' maim basef wapoti'? Owa'. Malogel ananinai atona na'i basef amama afa' wame'am ea'.”

Amam dambami manda' kotima Jisas ma naep gavman dembinai Pailat

23 ¹Ea' amam dambami hiami mohafel mofa' Jisas mafe'ma dembinai gavman Pailat. ²Ea' ma'i mombaso'mana manda'mana basef ma'i, “Afa' wati aman anama nanda' waf aonai nafela ukup epes hiesi ma sonda' wandaf soloma gavman. Anan nandaiwa'ma epes sese'ana takisa gavman dembinai Sisar ea' na'ipapa na'i anan atona anona dembinai king Krai.”

³Ea' Pailat nahali'ana na'i, “Ine' king dembinai Judai o owa'?”

Ea' Jisas nagwamana basef na'i, “Basef amama ine' na'iam endilisi.”

⁴Ea' Pailat na'ipa amam pris dambami maloma esis amam nematawa hiesi na'i, “Ae' ina ati anom amamaga awami ma epen anama, owa'. Ina ati anona waf aonai ma aman anama enda'mana anom basef, owa'.”

⁵Ea' amam manda'mana basef Jisasi ma'ipana basef la'ifimi ma'i, “Anan nase'asa basef esis amam nematawa hiesi nanda'as sehafel la'ifis sa'i sonda' wandafa ganima hiagoma Judia. Anan nanda'i maol gani etap hiagoma Galili ea' nafi'i nataga na'ae.”

Amam mofa' Jisas nafe'ma gavman dembinai Herot nanda'mana basef

⁶Pailat name' basef amama sa'i anan nanda' maol etap hiagoma Galili ea' nahali' amam na'i, “Aman anama anan Galilina'i?”

⁷Amam ma'ipana ea' negawa Jisas anan Galilina'i gavman dembinai Herot numafiagoma. Ea' Pailat nasapa'ana nafe'ma Herot. Nogota anama Herot ata' napani Jerusalem.

⁸Herot nati Jisas nandanifelamana endilisi. Anan name' basefa anan nogota launai, ea' na'i notolona. Anan name' basefa maol Jisas nanda'anai ea' na'i Jisas ata' nonda' anona pepel si'i God nanda'anai ma ata' notolona. ⁹Ea' Herot nahali'anama amamaga hiami. Ea' Jisas ina nagwamana anom basef anan, owa'. ¹⁰Amam pris dambami maloma amam mawalipasa mi'uli Godi mafi'i maitu felefele' manda'mana kot baso'manai la'ifinai endilisi. ¹¹Ea' Herot nao'wa amam soldia ananiami manda' Jisas findiwana ma basef awami. Ea' mofa'ai anona lowaf bu'unai

mowahe'amonana masapa'ana notanima nafe'ma Pailat. ¹²Fowa' Herot naloma Pailat manda' naumbih, ea' dei' nemaf anama mataga alupumi.

Gavman dembinai Pailat na'i noha Jisas lawag usi'inai tu'wanainai

¹³Ea' Pailat nofalai amam pris dambami maloma agufumi esis Judai maloma esis amam nematawa hiesi safi'i sandakolas. ¹⁴Ea' na'ipas na'i, "Ipe' fa'ai aman anama pa'i nafela ukup epes hiesi nahambombagasa sanda' wandafi sifi'mai ae'. Do'ok ahali'ana ma amamaga amama ma naep ipe'imi pame'e. Ae' ina ati anona waf aonai ma aman anama ma amamaga amama ipe' panda' basefami, owa'. ¹⁵Dembinai gavman Herot wapoti' na'ama etin. Dei' main, anan nasapa'ana netanima nafi'mai ape'. Ipe' pegawa aman anama ina nanda' anona waf aonai ma ape' mohana neaga', owa'etin. ¹⁶Ea' atuwasi ehana etin ekwahona nefe' wafifina."

[¹⁷Ea' waf esis Judai nape na'ama. Afagof danda nemaf anama sanda' gwa'aimi amama lu'wami Pasova gavman dembinai Pailat natagaha anona nanda' kalabusi nafe' wafifina ma esis.]

¹⁸Ea' esis amam nematawa hiesi sa'i mehip na'ama sa'i, "Ha aman anama ma noga', ea' tagaha Barabas nifi'mai ape'."

¹⁹Aman anama Barabas anan napa' naloma amam gavmani ma taun anama lu'unai ea' naha enin epen naga'. Ea' dei' sanda'ana nanda' kalabus.

²⁰Pailat na'i nokwawa Jisas nefe' wafifina, ea' nahali'as wapoti'. ²¹Ea' sa'i mehip sa'i, "Hana noga', hana noga' lawag usi'inai tu'wanainai."

²²Ea' Pailat netambel nahali'as wenif wapoti' na'i, "Dei' nanda' maina waf aonai? Ae' ina ati anona waf aonai ofagena napoma aman anama ma ape' mohana neaga', owa'etin. Ea' ae' i'ipa amam soldia mohana mopagahona ea' ekwahona nefe' wafifina."

²³Owa'etin. Esis sa'i mehip sa'i anan nohana noga' lawag usi'inai tu'wanainai. Ea' basef asasimi mikila' basef Pailati. ²⁴Ea' Pailat nasopama malogel ananinai naila ukup asasimi. ²⁵Aman anama nanda' wandaf naloma gavmani naha enin epen naga'i, sanda'ana nape nanda' kalabus, Pailat nakwahona nafe'mas wafifina. Ea' nagima ukup asasimi nakwahona nafe'mas wafifina ea' nase'asa Jisas nafe'ma esisa amam soldia mefa'ana mafe' mohana noga'.

Amam soldia maunda Jisas lawag usi'inai tu'wanainai

²⁶Amam soldia mofa' Jisas mafe' ea' mati anona aman Saimon, anan anona etap hiagoma Sairini, napani aolop nafi'i na'i nefe' nuwis wambel taun lu'wagoma. Ea' masasapa'ana nowandefa lawag anama usi'inai tu'wanainai ekaf ananinai nofa'ana naila Jisas nafe'.

²⁷Ea' enis amam nematawa hiesi safe' sagi'mana ea' anowa nematawa wapoti' wafe' walef watawea wafe' wa'i uwahipina ma anan.

²⁸ Ea' Jisas nandamboma na'ipawa na'i, "Ipe' nematawa Jerusalempei, ipe' ina pelopa ae', owa'. Ipe' pelopa ipe' peloma awasi ipe'isi'. ²⁹aDei' main, anona nemaf netaga ma enis epes si'i, 'Awau nematawa asawai, ea' awama owa' weaso' nomambeha awasi, awama nambimb ope andeande' ondanifel.'

³⁰bNemaf anama esis si'ipa halafutagw ma mowai mopei'as mose'elis. Ea' esis si'ipa dohotagw mose'elis.

³¹cDei' esis sanda' waf aonai ma lawag namunai.^d

Ea' anona nemaf lawag anama notaga alina, esis sonda' maina waf?"

³² Ea' amam soldia mofa' amam biam manda' waf aonai ma'i moham moga' moloma Jisas. ³³ Ea' safe' sataga anagon sofalagon sa'i Pipitagel Balagaina. Anama amam soldia maunda Jisas lawag usi'inai tu'wanainai. Ea' maunda anom biam manda' waf aonai manda' wali mandolam mail wa'olwa'ol Jisas nail la'afen. ³⁴ Ea' Jisas na'ipa God na'i, "Ahalome, ine' nekwahomama waf aonai amam manda'meanai. Amam ina mogawa andeande' amamaga amama manda'meam ae'i, owa'."

Ea' amam soldia manda' satu ma luwaguf maim Jisasi ma emi nikila' nefa'am mandandamam atona etin. ³⁵ eEa' esis amam nematawa saituu sape satolona ea' amam agufumi esis Judai manda' salamalana manda'iafana ma'i, "Anan nagiambama enis epes. Ea' endilisi anan Kraiis God nandandepana, ata' nigiangbama anan atona nondatagah nisila'i."

³⁶ /Amam soldia wapoti' manda' salamalana manda'iafana. Ea' mafi'i felefele'ma anan ma'i mose'ana anom embel wainim numbutimi.

³⁷ Ea' ma'ipana ma'i, "I'i endilisi ine' king Judai, ine' ata' nigiangbama ine' etina."

³⁸ Anom basef mail lawag anama ilifa balaga ananinai ma'iam ma'i, "AMAN ANAMA DEMBINAI KING ESIS JUDAI."

³⁹ Ea' anona aman nanda' waf aonai nail wa'ol na'i basef findiwaimi ma Jisas na'i, "Ine' Kraiis endilisi, ine' ata' nigiangbama ine' nili' ea' nigiangbamafa wapoti'."

⁴⁰ Ea' anona nail wa'oli na'ipana mehip na'i, "Ine' nefa' nimanimi na'ama etin si'i aman anama. Ine' owa' umba mehenama Gode? ⁴¹ Amam soldia maha afa' oga' andeande' wandahama waf aonai afa' wanda'anai. Ea' aman anama ina nanda' waf aonai, owa'etin."

⁴² Ea' nandamboma na'ipa Jisas na'i, "Jisas, anona nemaf ine' netaga dembinai king, nemaf anama ine' okokoma ae'."

⁴³ Ea' Jisas na'ipana na'i, "Ae' a'ipina endilisi, ine' dei' nepe nelome wambel bu'unai Paradais."

a 23:29 Lu 21:23 **b 23:30** Hos 10:8; Re 6:16 **c 23:31** 1 Pi 4:17; Lu 23:34; Ais 53:12; Mt 5:44; Ap 7:60; Sam 22:18 **d** Basef amama wamon etina lawag namunai alinai ofagema ma'i na'ama. Esis Juda saha Jisas naga', ea' anona nemaf nimanimi lu'wami motagamas. **e 23:35** Sam 22:7,8 **f 23:36** Sam 69:21

Jisas naga' ea'

⁴⁴Aon na'i naho'walom, awamb lu'unai nataga naofenia etap hiagoma esis Judai nape nafe' nafe' nataga aon nandamboma nape gani 3 klok wambomota. Ea' owaf naluwi wapoti'. ⁴⁵Ea' anona lowaf lu'unai si'i uta nail ipat lu'unai God nomoni palalana hi'alana nandawal nataga biefina. ⁴⁶Ea' Jisas noga na'i mehup na'i, "Ahalome ae'anai, ae' ese'enago ambal ae'anai nofo'o lagel ine'inai."

Anan na'iam na'ama ma ea', a' naga'.

⁴⁷Ea' kepten numafi amam soldiai naitu nati amamaga amama mataga, ea' nafela agel Godi na'i, "Endilisi, aman anama bu'unai."

⁴⁸Ea' amam nematawa isima hiesi safi'i sandakolasa sati amamaga amama mataga, satolom ea' saha mefetagw اساسيمي sihi'ambasa ukup اساسيمي aom endilisi ea' setanima safe'. ⁴⁹Esis alupusi hiesi Jisasi saloma anowa nematawa wafi'i etap hiagoma Galili waila Jisas wafi'i, esis saitu laogon felefele' sati amamaga amama.

Esis sasapa' alop Jisasi nawis anona hi'agif owap lu'unai nagali

⁵⁰Anona aman agilinama Josep anan Arimateainai etap hiagoma Judia. Anan aman bu'unai, dembinai ma amam mumafi esis Juda hiesi. ⁵¹Anan ina na'i a'e ma amam dambami Juda moha Jisas noga', owa'. Anan nape nohafa nemaf bu'unai neataga ma epes hiesi siowis wambota Godi numafias. ⁵²Aman anama nafe'ma Pailat nahali'ana ma nefa'ai alop Jisasi neawana. ⁵³Ea' nafe' natagaha alop Jisasi nisila'i, nanda' anona lowaf afitinai nowa'ana ma nombafana, nasapa'ana nawis hi'agif anama nalana nomon. Hi'agif anama sagwasana nawis anona owap lu'unai. Fowa' esis ina dei' sawa enin epenagon, ata' owa'. ⁵⁴Nemaf anama sa'i sogolopa gwa'aimianai. Nemaf sapoma noma'wanai sa'i Sabat felefele'ma neataga.

⁵⁵Nematawa awama Galiliwai nimbewa' waloma Jisas wafi'i, awau do'ok wagi' waila Josep wafe' wati hi'agif anama. Ea' wati nomon na'ama Josep nawa Jisasa. ⁵⁶Watolona ea' otanima wafe' ifagw awaumi, wandondomba wel maloma amamaga alogw bu'wami ma'ami ma bimb ofa'am ofe' hi'agif undisa alop Jisasi.

Nemaf anama Sabat nataga, wapoma noma'w si'i mi'uli Godi na'i.

Jisas nohafel wapoti'

24 ¹Wafilu nemaf anama Sande nali'ma wik, kuhimbita atona awau ohafel wafe' hi'agif. Agufuwama awama. Maria Makdalai'wi kwaloma ano'w awau agel atona Maria mama'wana Jemsi waloma Joana ea' waloma anowa wapoti'. Ea' ofa' wel maim alogw bu'wami ma'ami awau wali' wandondombami, ofa'am wafe' hi'agif. ²Ea' watologon, wati owap anama ina ata' nape nowalo uta, owa'. Enin epen nafe' nawisana

nafe' na'oh wa'ol. ³Wawis nomon ea' awau ina wati alop Dembinai Jisasi, owa'etin. ⁴Ea' awau ukup matamea mafe'ma amama. Ea' mehip wati anom amam biam mataga felefele'ma awou. Luwaguf amamumi membali endilisi. ⁵Ea' awau umbamahawa endilisi windiwa balagah wati etap. Ea' amam ma'ipawa ma'i, "Ipe' pafi'i pagolopa aman anama ambal napeinai ma na'ae epes saga'i ma main?" ⁶Anan ina ata' nape na'ae, owa'. Ea' nohafel ea'! Ipe' ukup mopoma basef amama fowa' nali' na'ipipemi. Nema'f anama ata' nape nalomepa ganima etap hiagoma Galili na'ipipa na'i,

⁷'Ae' ataga epen endilisiwei. Esi nambimb sese'e efe'ma amam manda' waf aonai, munde lawag usu'inai tu'wanainai. Ma nimeguf biam hi'itam, anona nema'f wapoti' etanima ehafel.' "

⁸Ea' awau ukup mandanda'ma basef amama fowa' na'iami. ⁹Ea' wakwaha hi'agif otanima wafe' wa'ipa amam alupumi ananiami 11-peleim maloma enis alupusi hiesi ananisi wapoti' ma amamaga amama. ¹⁰Nematawa awama wanowa Maria Makdalai'wi kwaloma Joana kwaloma ano'w Maria Jems mama'wana. Awau wape waloma anowa nematawa wa'ipa amam Apose' 11-peleim. ¹¹Ea' amam ma'i awau wambaso'mam wa'i basef atom wafimi. Owa' meme'awai.

¹²Ea' Pita nohafel nasagih nafe' hi'agif natambe' nati nomon ea', nati luwaguf mowa'anami atom ma'oh. Ea' notanima nafe' ipat okom ananinai nataneama amamaga amama matagai.

Anom amam biam mati Jisas eaf nafe' Emeusi

¹³Nema'f anama atona anom amam biam alupumi Jisasi mohafel mafe' anona wambel sa'unai felefele' agilinama Emeus. Eaf anama nakwaha Jerusalem nafe' Emeusi kilomita 11-peleina. ¹⁴Amam mafe' ea' manifa amamaga amama dei' matagai. ¹⁵Amam ma'iam mandahahali'mam mafe', ea' Jisas atona nataga felefele' nafe' nalomam. ¹⁶Ea' naep amamumi walufum, ina mati Jisas mogawana, owa'.

¹⁷Ea' na'ipam na'i, "Ipe' bipa pa'i main pafe'?"

Nahali'am na'ama, ukup amamumi aom maitu.

¹⁸Ea' anona amam biam Kliopas nahali'ana na'i, "Epes hiesi sape Jerusalem sati amamaga amama mataga nema'f anae' sogawam. Ea' ine' etina owa' negawai."

¹⁹Anan na'iam na'ama, Jisas nahali'am na'i, "Main de'im?"

Ea' ma'ipana ma'i, "Amamaga amama matagama Jisas Nasaretinai. Anan dembinai profet na'ipa esis amam nematawa basef bu'wami. Anan la'ifinai ma nawalipasa basef amama nanda' maol la'ifinai ma naep Godi naloma epes wapoti'. ²⁰Ea' amam pris dambami maloma agufumi ape'imi mase'ana nafe'ma amam gavman dambami. Ea' amam gavman manda'mana basef mohana naga'. Ea' maundana lawag usi'inai

tu'wanainai. ²¹Ea' fowa' afa' ukup ma'i endilisi wa'i, 'Aman anama notagaha ape' Israel meape wafifipa.' Ea' anom basef wapoti'. Amamaga amama mataga ea' nema'f dei'inai nafe'ma wanifi. ²²Dei' anowa nematawa afa'iwai wanda'afa gegelalaso'f kwapete'afa. Kuhimbita atona ohafel wafe' hi'agif, ²³ea' awo ina wati Jisas, owa'etin. Ea' otanima wafi'i wa'iam wa'i, 'Afa' wati anom ensel si'i wa'oh wandanda'ah watolom ma'lipafa ma'i." Anan nohafel nape namunai." ' "

²⁴Ea' anom amam afa'imi mafe' hi'agif mati amamaga na'ama etin si'i awau wa'iam. Ea' anan ina matolona, owa'."

²⁵Ea' Jisas na'ipam na'i, "Ipe' bipa nomonas a'ipei. Ukup ipe'imi ea' mase'epa, ina pembale'a basef hiami amam profeti, owa'. ²⁶Krais anan ata' nili' nofa' nimanimi ea' nigi' nofa' pepel howalagon ananinai nigi'!"

²⁷Ea' nali' nasefela basef hiami Baibelimi amam profet maloma Moses manda'ami nawalipamam. Na'ipam basef amama hiami ma'i anan nawalipamam ofagema hi'alam.

²⁸Ea' amam mafe' mataga felefele'ma wambel anama ma'i meafe'ma. Ea' Jisas na'i ata' nefe' etin, ²⁹ea' ma'ipana ma'i, "Ine' nepe nelomafa. Aon nowala felefele'ma owamb."

Ea' nawis nape nalomam.

³⁰Amam ma'i mea' gwa'a'imi, anan nape nalomam nafela bret nanifela God nawalona nase'amana. ³¹Anan nanda'am na'ama ma amam ea' naep amamumi pele'atam dei' mogawana. Ea' nohafel nafe' nakwaha amam matimana owa'.

³²Ea' ma'i, "Afa' wafi'i eaf ukup afa'imi ea' mohafel endilisi ma anan nawalapa basef mape Baibeli na'ipafam nogota anama."

³³Amam ma'iam na'ama ea', dei' atef mohafel motanima mafe' Jerusalem. Ea' mati alupumi 11-peleim Jisasi maloma enis alupusi amamisi sandatama sape. ³⁴Ea' sa'ipa amam biam sa'i, "Endilisi etis Dembinai notanima nohafel! Saimon natolona ea'."

³⁵Ea' amam biam ma'ipasa amamaga amama do'ok matolom eafi. Ma'ipasam ma'i, "Anan nalomafa wape nawala bret watolona ea' ogawana."

Esis alupusi Jisasi satolona

³⁶Esis ata' sa'i basef amama atom, Jisas naitu la'afena esis na'ipas na'i, "Ae' a'i opalef ipe'imi mope awanem."

³⁷Ea' satolona sohafel gegelalasis kwapete' umbamahas. Esis sa'i sati anona gamba.

³⁸Ea' na'ipas na'i, "Ipe' gegelalasisa kwapete'epa ma main? Dei' maina ukup ipe'imi matamea? ³⁹Ipe' piti lagufi bo'wagah ae'ami. Ae' atowe ea' ma'uwi ape si'iwu. Ipe' pesa lagofa ae' peme'e. Gambefah ina alop naloma bihitagof mapeis si'i pati mape alop ae'anai, owa'."

⁴⁰Anan na'iam na'ama ma ea', nihi'ambasa lagofi bo'wagah ananimi.

⁴¹Ea' sandanifela sati anan. Ea' esis gegelalasis kwapete' ukup matamea, owa' ata' seambale'efanai.

Ea' nahali'as na'i, "Ipe' anom gwa'aimi o owa'?"

⁴²Ea' sase'ana anona aol tu'waninai saofanai. ⁴³Nandalombasana na'ana ama naep asasimi.

⁴⁴Ea' na'ipas na'i, "Fowa' ae' ata' ape alomepa, a'ipipa ea' ma basef hiami mail buk Baibeli ma mi'uli God fowa' gani naso' Mosesanai. Buk anama amam profeti maloma Buk Songi, basef amama hiami ma'i ae'. Basef amama hiemi dei' mataga endilisi mandawalap alihim."

⁴⁵Anan nihi'ambas andeande'ma ukup asasimi ma segawa basef mail Buk Baibeli.

⁴⁶Ea' na'ipas na'i,

"Fowa' gani amam manda' basef amama mail buk Baibeli ma'i Krais nefa' nimanimi sohana noga' ma nimeguf bi'am hi'ilam anona neafe'ma wanomi, notanima nohafel hi'agif wapoti'. ⁴⁷Ama agel ananinai anona nemaf alupusi ananisi sili' sowalapa basef Jerusalem ea' si'ipasam amam nematawa hiesi hi'ilas sape wambel hiagomai ma seamboma opalefa God nokwahomasa waf aonai esis sanda'anai. ⁴⁸Ipe' pati amamaga amama matagamai ma nambimb pi'ipa amam nematawa hiesi. ⁴⁹Ipe' peme! Anom amamaga la'ifimi fowa' Ahalome na'iam endilisi na'i niesi'ipami felefele' miefi'imipei. Ipe' pepe la'ela'ef taun anama pefe'ma petaga nemaf anama la'ifimi amama misila'i heven ilifi meafi'mai ipe'."

God nofa' Jisas nalata heven ilif

⁵⁰Jisas nao'wa esis amam nematawa hiesi safe' sataga felefele'ma Betani ea' nasa'ma lagof malata nofalo'masa nonda'as la'ifis. ⁵¹Anan ata' nofalo'mas etin, God nagiana nakwaha esis nalata heven ilif.

⁵²Ea' sanifelana sanda' lotumana ea' sandanifel endilisi sotanima safe' Jerusalem sandanifel la'ela'ef sape. ⁵³Ea' la'ela'ef sape ipat lu'unai Godi sanda' lotuwanai safela agel ananinai lu'una endilisi.